


MGA PANGUTANA UG MGA TUBAG MGA HEBREOHANON

BAHIN III

 . . . nga maania na usab karong gabhiona sa tabernakulo, nga nagalaum sa niining maanindot nga pagpakig-fellowship ug pagsimba sa Pulong sa Dios nga gikahatag kanato nga walay bayad. Ug kita'y . . . gusto gyud nato nga mamahimong umalambit sa niini nga panalangin.

⁵⁵⁴ Ug nagasalig gayud ako nga panalanginan kita sa Dios niining gabhiona sama sa gibuhat Niya kaganinang buntag, sa pang-buntag nga mensahe. Ug gikaestorya ko ang akong silingan, si Mrs. Wood, kaganina, ug nagahisgot kami niadto, ug sila ni Mr. Wood usab. Ug nagatoo ko nga mao kadto ang pinaka maayo nga wali ni Igsoong Neville sa tanang maayo nga mga wali nga nawali na niya, para nako mao kadto ang pinaka maayo sa tanan nga nawali niya. Ginadayeg ug ginapasalamatan ko gayud ang ingon-niadto maanindot nga wali. Ug tungod nga nagahatag kadto og kaisog kanako, ug gitapyas ako niadto. Mao nga ako—gusto kong angkonon ang kamatuoran, kabalo mo. Ug, sa mga bahin mahitungod sa pagkamaisogon, kabalo mo, ang mahimong maisogon, ug kung unsaon nga . . . si David kaniadto, ug kung unsa nga siya . . . Sa dihang atua siya niadtong dakung pagsulay, imbis nga moingon, “Bueno, buhaton ko kini, Ginoo, basta Imo lang kong tabangan,” naghulat hinoon siya, miduol ug nangamuyo sa Ginoo kung unsay angay'ng buhaton. Gikuha niya ang ephod, kabalo mo, ug miingon, “Karon magpabilin sa ta ug pangutan-on ang Dios, ‘Unsa ma'y angay natong buhaton sa niini nga kalisdanan?’” Oh, madagayaon gayud kadto. Mas daghan pa kadto og bitamina kaysa tanang botika sa nasud. Oo, sir, may mahimo gyud kadto nga maayo kaninyo.

⁵⁵⁵ Bueno, karong gabhiona, dili nato—nato tinguha nga magpabilin ug dugay nga molapas na sa tungang-gabii, kung mahimo nato, bahin sa niini nga mga pangutana. Busa kita—moadto na kita sa mga niini, sa gilayon. Kini'y paghuman na man sa niini nga mga pangutana ug sa matag higayon nga hapit na kong mahuman niini. . . Karon, Igsoong Hattie, dili ingon niana ang buut kong ipasabot, kabalo ka niana. Ako—ginasulti ko lang kini, kita n'yo; ug sige. Tungod duna man gud ko'y nadawat dinhi nga pipila ka malisud gayud nga mga pangutana gikan sa usa ka ministro, ug malisud kaayong tubagon ang mga niini. Kabalo na mo, silang mga ministro, ginasusi man usa

nila kini sa tibuok Biblia ug gapaningkamot nga makakaplag og kaugalingon nilang tubag adisir pa sila mangutana kanimo, nakita n'yo. Ug dayon . . . ug ginarekord kini diha sa teyp, og ipadala kini ngadto sa Georgia sa usa ka ministro nga akong higala nga dunay walo ka mahinungdanon nga mga pangutana dinhi sa Biblia nga malisud, gyud kaayo.

⁵⁵⁶ Ug bueno, sa niining moabot nga semana, ayaw n'yo kalimti nga iampot kami.

⁵⁵⁷ Ug miarang-arang na diay ang akong asawa; nakatindog-tindog na siya karon, ug mitabang na gani siya sa pagluto, karong adlaw. Ang minahal natong mga higala nga taga Canada, si Igsoong lalaki, og Igsoong babayeng Sothmann, ania sila nga mibisita kanato, ug gikalipay gayud nato ang ilang pagbisita. Ug mao nga ang akong asawa, ingon nga nahibalo nga moanhi sila, bueno, naninguha gyud siya nga makaanhi aron iyang maabi-abi ug maka-fellowship kining minahal nga mga higalang Cristohanon. Malipayon kita nga makauban si Igsoong Freddie karong gabhiona, ug ang iyang asawa nagpabilin ra kauban . . . Dinhi siya kaganinang buntag, pero siguro nagpabilin ra siya kauban si . . . dili, diay, kauban niya si Meda, aron ubanan siya samtang paanhi kami dinhi; tungod kay kabalo ko nga medyo malangan gyud tá karong gabhiona, aduna man gu'y komunyong ug paghugas-sa-mga-tiil. Busa malipayon kita nga makauban sila ug ang ubang mga bisita usab.

⁵⁵⁸ Karon, sa dili pa nato sugdan nga sulayang tubagon ang mga pangutana . . . Ug timan-i n'yo nga ako—mahimo akong masayup, nakita n'yo, ako—wala ko ginapamahayag nga husto ako sa tanan-tanan nga ginabuhát ko. Hinoon ako—gapaningkamot ko nga mahimong husto, apan ako—basin sayup ako. Ug—ug kung sayup man ako, nan pasayloa lang ko ninyo; ug nagaampo ko nga pasayloon ako sa Dios, usab, tungod kay wala ko man ginatuyo nga masayup. Wala pud ko gapaningkamot nga tubagon ang mga niini para lang mahi- . . . o sa paagi nga akong . . . para lang mangdaut, kondili ginatubag ko ang mga niini kutob sa pinaka maayo kong nahibaloan, kita n'yo. Ug kung kinahanglan ko mang usabon ang akong hunahuna bahin sa usa ka pangutana sa Biblia, nan sa hunahuna ko mao gyud kana ang butang nga angay'ng pagabuhaton. Kinahanglan natong usabon, sa unsa mang higayon, pag manulti na ang Pulong sa Dios, tungod kay Pulong man kini sa Dios.

⁵⁵⁹ Ug karon, sa tan-aw ko magaampo na usab kita para sa mga may sakit karong gabhiona, sama sa naandan na. Ug usahay maghunahuna ka; ipananglitan na lang ang usa ka gamay'ng pundok nga ingon niini, o mas gamay pa, oh, ang gamay'ng tabernakulo dinhi, ug usahay dili mo makita ang mga resulta nga buut mo unta nga makita. Apan ang punto man gud, sa ginabuhát mo, nagasaksi ka lang sa mga duha ka gatus ka tawo.

Ug kon sa usa sa dagkung mga panagtigum, tingali'g nagasaksi ka sa tulo hangtud napulo ka libo, nakita n'yo, ug—ug tingali'g mas daghan pa gani. Busa ingon niana, makasaksi gyud ka sa mas daghan pa diha sa dagkung mga panagtigum. Pero niining gabhiona, mangtubag ra ko'g. . . Siyempre nagatunog man ang telepono sa tibuok adlaw ug bahin sa gabii.

⁵⁶⁰ Si Mrs. Reisert ba kining nagalingkod dinhi, nga akong ginatan-aw? Ang imong Biblia, igsoon, anaa kang Igsoong babayeng Wood dinha sa luyo. Gidala ko kadto kaganinang buntag para kanimo, ug ako—wala ko lang kadto nahatag sa imoha. Ug wala—wala man gud tá ka nakita kaganinang buntag, ug mao nga anaa kini kang Mrs. Wood.

⁵⁶¹ Bueno sa pagtubag ko sa telepono ug nahibaloan ko ang—ang halangdong mga butang nga nangahitabo. May usa ka babaye ang mitawag kanako, ingon siya, “Igsoong Branham, nakatambong ako kaniadto sa *ingon-ani-ingon-ana* nga panagtigum ug nag-antus ako sa *ingon-ani-ingon-ana* nga sakit sa ingon na ka dugay. Ug, abi nimo, sa pagsulti mo lang didto, ug basta na lang. . .” Miingon, “Halos makuyapan gyud ako sa dihang gibutyag Niini ang kanhi kong kinabuhi.” Ug ingon pa, “Ug wala na gayud ako nag-antus pa sukad niadto.”

⁵⁶² Ug may usa pud ka babaye ang mitawag ug miingon. . . Nagatoo ko nga ania siya karong gabhiona, o nagabiyahe pa siya gikan sa Bedford, siguro, o sa kung asa man. Nakatambong pud dinhi ang ilang anak nga lalaki, sa hunahuna ko, nga adunay sakit sa kasingkasing, og anaa na niadto sa grabe nga kahimtang. Ug ania siya dinhi sa panagtigum kaniadto, ug—ug nanglihok ang Ginoo ug gihikap. . . gisultihan ang batan-ong lalaki mahitungod sa iyang sakit, ug dili gani niya halos maipataas ang iyang bukton, tungod sa ataki sa kasingkasing, ug tungod nga ang iyang bukton gibikogan na og ayo, ug ang iyang kasingkasing ingon na niadto ang kahimtang. Ug dihadiha dayon nakasakay na siya sa sakyanan ug mibiyahe pauli, og wala na gyud sukad nahasol pa tungod niadto. Nakaabot na ba ang maong babaye nga taga Bedford? Ania ka ba, gining? Atua ra diay siya, sa luyo. Oo, iya akong gitawgan, kaganina.

⁵⁶³ Dayon aduna pu'y usa ka babaye nga mitawag kanako nga taga Evansville. Ug dili kono siya makaanhi dinhi tungod nga layo kaayo siya, wala pud siya kahibalo nga magpahigayon diay tá og panerbisyo sa pagpang-ayo karong gabhiona. Ug ang sulti niya, “Igsoong Branham, atua man ko kaniadto sa panagtigum sa Evansville,” ug ingon pa, “mitan-aw ka sa taliwala sa kadaghanan ug miingon. . . nagsulti ka kanako kung kinsa ako, ug kung unsa ang mga nabuhat ko, ug kung unsa ang akong giantus, ug uban pa nga sama niana.” Ug ingon pa niya, “Aduna ako'y sakit nga hubak, ug mao nga kinahanglan kong magsunog og Asthmador ug uban pa sulod sa lawak sukad pa niadtong bata

pa ako.” Miingon, “Pero duha ka tuig na ang milabay, ug wala na gayud ako’y ni usa ka sintomas niini sukad niadto.” Kita n’yo?

564 Ug para sa mga ania karong gabhiona, nga wala dinhi kaganinang buntag para madungog unta ang testimonyo; miadto ako sa baligyaanan, para mopalit og munyeka, kagahapon. Bueno, dili kadto para sa ako, kita n’yo. Para kadto sa akong batang babayeng, si Rebekah, nga anaa dinha. Ug—ug si Sarah aduna siya’y giadtoan, o ingon niana, niining adlaw. Ang usa sa iyang mga kauban sa eskwela nagpahigayon man og mora’g usa ka pagsaulog, sa adlaw’ng-natawhan o mora’g ingon-ana, ug gihatagan man niya og diyutay’ng regalo ang iyang kauban sa eskwela; ug mao nga nagpalit pud ko og gamay’ng munyeka, mga *ingon-niini* kadaku. Ug dunay usa ka babaye nga miduol didto, miingon, “Nahinumdum ka pa ba sa ako?”

565 Ug ingon ko, “Sa tan-aw ko mora’g wala na ko nakahinumdum sa imo.”

566 Ug nahibaloan ko nga, paryente diay kadto ni Igsoong Neville dinhi, nga mga . . . kaniadtong mibiyahе ako paingon sa Sweden, sila . . . Mitambong siya dinhi, nga may dala nga usa ka batang lalaki nga naka-wheelchair, sama ni luoy’ng Edith dinha, ug ang batang lalaki adunay kanser, makamatay nga bukol sa utok. Ug mikulo na gud ang iyang gamay’ng ulo, ug siya . . . ug gitagalan na siya sa mga doktor og tulo ka semana na lang nga mabuhi. Ila kadtong gioperahan ug gisusi kadto, ug nakita kadto nga . . . kung unsa kadto, ug gitagalan siya og tulo ka semana na lang nga mabuhi. Ug gisakay nila siya sa wheelchair, ug dayon gibalhin siya sa stretcher sa dihang gidala siya ngadto sa lawak para eksaminon, ug pagkahuman gibalik siya. Akong giadtoan ug giampo ang maong batang lalaki, ug nangamuyo ko sa Ginoo nga ayohon siya. Ug pagkasunod adlaw mismo, sa dihang dalhon na pud unta nila siya didto, miingon, “Dili na ko magkinahanglan nianang wheelchair.”

567 Misakay siya sa sakyanan ug miadto didto, ug gibukhad sa doktor ang stretcher, miingon, “Dili na ko magkinahanglan nianang stretcher.”

568 Milakaw siya didto ug milingkod, gieksamin siya sa doktor, miingon, “Bueno,” miingon, “imbis nga tulo ka semana, tagalan ko na ikaw og usa ka gatus ug walo ka tuig nga mabuhi ka.”

569 Ug, kagahapon, natagbo ako sa iyang inahan. Ug tingali’g ania siya, karong gabhiona, sa nahibaloan ko. Ug ang maong batang lalaki nagadula na og football, ngani olitawo na karon. Nagkaaduna kaniadto og makamatay, nga kanser sa utok, ug nagapakita lang kana . . .

570 Oh, liboan nga mga butang, kita n’yo. Dili mahimong mapakyas ang Dios. Siya—dili gayud Siya mahimong mapakyas.

571 Igsoong John, arang-arang na ba ang imong mata, igsoon? Nadisgrasya man gud siya, tungod sa pagpadulot og lansang ug naigo ang iyang mata. Ug mao nga nag-ampo kitang tanan para kang Igsoong John O'Bannon, ang atong igsoon nga taga Louisville nga nadisgrasya tungod sa lansang nga miigo sa iyang mata.

572 Bueno, kini nga mga pangutana nagagikan gyud sa—sa kinahiladman sa kasingkasing sa usa ka tawo; ingon nga nagbasa sila sa Kasulatan ug nakaplagaan kining mga butanga, ug dili nila . . . tingali'g dili nila masabtan mismo, mao nga ilang gihatag ang mga niini dinhi aron atong mapaningkamotan sa pagtubag. Ug nakita n'yo kung unsa ka malisud nga kahimtang ang nakapahimutang kanato; tungod kay, unsa man ang isulti mo, mosalig man sila niini. Busa kinahanglan gyud nimong siguradohon nga husto ka, ug akong . . . sigurado gayud kutob sa imong mahimo. Busa kung ingon-ana, ang butang lang aron makasigurado nga husto kita, mangamuyo kita sa Balaang Espiritu karon nga hubaron kini para kanato, samtang ginaduko nato ug atong ulo.

573 Karon, Langitnong Amahan, oh, pagkaanindot nga pribilihiyo kini nga moingon og “Amahan” ngadto sa gamhanang Magbubuhat sa mga langit ug yuta. Ug ginapangamuyo gayud namo nga dawaton Mo unta kini nga mga pangutana diha sa Imo Mismong pagtagad karon. Gitunol ang mga niini dinhi nga may kahalawum sa pagkasinero. Dios, sa kinasingkasing usab, nga may kahalawum sa pagkasinero, nga among tubagon ang mga niini sa labing maayo nga among nahibaloan kung unsaon; itugot kini.

574 Ug hinaut nga ang Imong mga kalooy magapabilin unta sa matag usa. Ug hinaut nga adunay butang nga maisulti dinhi karong gabhiona nga makatabang gayud sa matag usa nga ania karon. Ug pagmanguli na kami, human sa pag-ampo para sa mga may sakit ug sa pag-ambit sa komunyon ug uban pa, hinaut nga masulti namo ang sama niadtong sa mga naggikan sa Emmaus, “Dili ba ang atong mga kasingkasing nagdilaab man sa sulod nato samtang nakig-istorya Siya kanato diha sa dalan?” Kay amo kining ginapangamuyo sa Ngalan ni Jesus. Amen.

575 Bueno, sama sa gikaingon ko na sa makadaghang higayon, nga kini—kini dinhi mao—maoy kutob lang sa akong opinyon mahitungod sa mga niini, ug mao nga usahay maghinungdan kini og diyutay'ng panaghigot. Ang pinaka una dinhi, sa tan-aw ko usa kini ka butang nga natubag ko na kaniadto, og nga gibalik lang pag-usab. Dili ko na . . . buut kong basahon gihapon kini, kung gusto ninyo.

65. Kaniadtong nagkaaduna og mga anak sila Adan ug Eva sa Eden, aduna pa ba'y ubang mga tawo sa yuta niadtong panahona? Sa Genesis man gud sa ika-5 nga kapitulo ug sa

ika-16 nga bersekulo, si Cain mipuyo kono sa yuta sa Nod ug giila ang iyang asawa.

576 Karon, maanindot kana nga—nga pangutana. Karon, gikatudlo kanato diha sa Biblia...Ug sa makadaghan nang higayon nga kini...usahay ginadali-dali nato...Nagasulat man gud ko kaniadto diha sa gamay'ng papel, ug nagaingon, "Pangutana mo. Tubagon ko ang unsa man nga pangutana sa Biblia."

577 Ug aduna'y nangutana, "Bueno, si kinsa man ang asawa ni Cain?"

578 Oh, magpakatawa ako og diyutay mahitungod niadto o unsa man, ingon ko, "Oh, ang anak nga babaye kadto sa iyang ugangang-babaye," o mora'g ingon niana, kabalo na mo, o—o "Siya mao si Mrs. Cain." Pero dili man kana ang tubag sa maong pangutana. Adunay...

579 Hinoon aduna man gyu'y asawa si Cain kaniadto, tungod miingon man ang Biblia nga duna siya'y asawa. Ug kung adunay asawa si Cain, nan siguradong nakaplagan niya ang maong babaye sa kon asa man. Ug mao nga takdo kini mismo sa niining pangutana dinhi:

Aduna pa ba'y ubang mga tawo sa yuta kaniadtong nagkaaduna og mga anak sila Adan ug Eva didto sa tanaman sa Eden?

580 Karon, kung inyong matikdan, diha sa Biblia panagsa ra nga dunay nasulat mahitungod sa usa ka babaye nga gikahimugso. Ang batang lalaki ang pirmingham ginasulat nila sa Biblia, dili ang babaye. Panagsa ra nga mahisgotan ang mahitungod sa pagkahimugso sa usa ka masusong babaye, diha sa Biblia. O, sa tinuod lang, wala ko kabalo kung duna ba'y usa nga akong madumduman karon mismo, sa hunahuna ko, kon diin dunay nasulat mahitungod sa pagkahimugso sa usa ka masuso; ang gikaingon lang, "Nanganak sila og mga anak nga lalaki ug mga anak nga babaye."

581 Ngani, sa Biblia tulo lang ka anak ang nasulat nga nahimugso kang Adan ug Eva, ug kadto mao si Cain, si Abel, ug si Seth. Karon, kung kining tulo puro mga lalaki, ug kung wala ma'y mga babaye nga gipanganak kaniadto, kung ingon-ana diay sa dihang namatay ang bugtong babayeng (si Eva) kaniadto, nan ang kaliwatan sa tawo mihunong na unta nga mabuhi niadtong panahona mismo, tungod kay wala na ma'y paagi nga—nga sila magkaaduna og unsa mang...nga makapadayon ang kaliwatan sa tawo, tungod nga wala na ma'y mga babaye ang nahibilin. Kon si Eva lang diay ang bugtong babaye. Apan, nakita n'yo, dili man nila ginasulat ang—ang pagkahimugso sa mga masusong babaye, diha sa Biblia, busa sigurado gyud nga nagkaaduna pud sila og mga anak nga babaye sama ra nga dunay mga anak nga lalaki.

582 Bueno, ang karaang manunulat, usa sa pinaka karaan nga mga manunulat nga aduna kita, si Josephus, ginapamahayag niya nga nagkaaduna sila og setenta ka mga anak, sila Adan ug Eva; matud pa sa usa sa pinaka-karaan nga mga manunulat, “setenta ka mga anak, ug mga anak nga lalaki ug mga anak nga babaye kadto.”

583 Karon, kung . . . Ug kung miadto si Cain sa yuta sa Nod . . . Karon, kung inyong matikdan, ang nangutana niini utokan gyud, kaayo sa pagsulat niini. Namatikdan ba ninyo kung giunsa niya pagsulat kini?

Sa Eden, kaniadtong nagkaaduna sila og mga anak sa Eden . . . Bueno, dili man sa tanaman sa Eden, nasayod niana ang maong nagsulat. Kon kinsa man ang nagsulat niini dinhi, ang ingon: **Kaniadtong nagkaaduna og mga anak sila Adan ug Eva sa Eden . . .**

584 Dili man gyud sa tanaman sa Eden, tungod kay gipapahawa na man sila didto sa tanaman sa Eden. Pero atua gihapon sila kaniadto sa Eden, ug ang tanaman sa Eden nahimutang man sa sidlakan sa Eden. Tungod ang Eden mora man gud og usa ka probinsya o—o unsa man . . . o usa ka estado, ug dayon ang Nod usa usab ka estado o probinsya nga duol niini.

585 Mao nga, ang tawo lamang nga mahimong maangkon ni Cain, o minyoan, mao ang kaugalingon niyang igsoong babaye. Sigurado gayud. Tungod aduna lang ma’y usa ka lalaki ug babaye nga ilang gigikanan, kita n’yo, ug sigurado gyud nga ang giminyoan niya mao ang kaugalingon niyang igsoong babaye. Hinoon, legal pa kana niadtong panahona.

586 Ug ang giminyoan sàb ni Isaac ang iya mang kaugalingong ig-agaw igtagsa, nga si Rebekah, nga gikatagana-nang-daan sa Dios. Si Sarah igsoong babaye usab ni Abraham, iyang porsosong igsoong babaye; dili sa iyang inahan, kondili sa iyang amahan. Kita n’yo, usa ka porsosong igsoong babaye ang—ang giminyoan ni Abraham; lahi ang inahan, apan mao ra ang amahan.

587 Busa, nakita n’yo, ang pagpakigminyo kaniadto sa paryente, sa wala pa napukan ang—ang nagadagayday nga dugo sa kaliwatan sa tawo, legal pa ug okey lang kaniadto. Pero sa karon dili na. Ngani kung minyoan mo ang imong porsosong igsoong babaye sa karong panahon, ug makabaton mo’g mga anak, nan sila’y lagmit nga mamahimong . . . bueno, mamahimo gyud sila may diperensya ug tanan na. Bisan pa ngadto sa ig-agaw igtagsa ug igtagurha dili gayud puedeng makigminyo, kita n’yo, tungod kay ang nagadagayday nga dugo nagakapukan ug nagakapukan man.

588 Apan ang bugtong butang nga mahimong buhaton ni Cain kaniadto, mao ang, minyoan ang kaugalingon niyang igsoong babaye. Ug didto ang mga anak nga . . . Gikuha niya ang iyang

asawa, miadto sa yuta sa Nod ug giila siya didto, ug gikan didto nakabaton og—og mga anak. Kita n'yo, ang. . .

⁵⁸⁹ Ug kung matikdan ninyo, gikan sa kaliwatan ni Cain mitungha ang maantigo nga mga tawo. Gikan pud sa kaliwatan ni Seth mitungha ang relihiyoso nga mga tawo, ang buut kong ipasabot, ang—ang punoan sa pagkamatarung. Dinha mismo, kining duruha, ang nagbunga sa mismong kaliwatan nga atong gikinabuhian karon.

⁵⁹⁰ Kung inyong himatikdan sa karong panahon (sa pagtapos lang niini nga pangutana): ang kaliwatan ni Cain nagalungtad sa gihapon, ug ang kaliwatan pud ni Seth nagalungtad sa gihapon. Pareho sila nga nagapadayon sa gihapon. Ang mga anak ni Cain ania man sa Jeffersonville karong gabhiona, ug ang mga anak ni Seth ania pud sa Jeffersonville karong gabhiona. Samtang nagakapukan ug nagakapukan na ang nagadagayday nga dugo, apan anaa sa gihapon ang maong kaliwatan.

⁵⁹¹ Karon, matikdi. Ang mga anak ni Cain sa kanunay. . . ug sa wala pa ang paglaglag sa kalibutan pinaagi'g lunop, sila na mao ang maantigo nga mga tawo: ang siyentista, ang mga magtutudlo; ug mga relihiyoso kaayo, apan sila mao ang hinukman na nga grupo. Kita n'yo? Karon matikdi, sila'y sama ra gayud sa ilang amahan nga si Cain. Si Cain, usa siya ka relihiyoso nga tawo. Ngani nagtukod man siya og maanindot nga halaran, ug naghimo og maanindot nga simbahan, ug gipaningkamotan nga himoon kadtong mas maanyag kaysa niadtong gamay'ng misyon nga aduna si Seth kaniadto. Nasayod ba mo niana? Iya gayud. . . Iyang gidayan-dayanan ang halaran og mga bulak, ug gipanindot kadto, ug gipaanyag gayud; ug naghimo og daku, kaayong, maanindot nga simbahan, tungod kay nagdahum man siya nga makakaplag siya og kahimuut sa Dios pinaagi sa pagbuhat niadto.

⁵⁹² Ug si Abel miadto lang ug mikuha og usa ka gamay'ng cordero, ug hinay-hinay nga giguyod kadto paingon sa halaran, ug gipatong kadto sa usa ka bato ug gipatay kadto.

⁵⁹³ Ug karon, kung ang Dios ingon nga matarung, kung ang gikinahanglan lang Niya mao ang pagsimba, nan misimba man sa Dios si Cain nga may ingon ka dakung sinseridad sama ni Abel. Pareho man silang sinsero. Pareho silang naninguha nga makakaplag og grasya sa Dios. Wala ni usa kanila ang wala-nagatoo. Pareho silang, bug-os gayud, nga mga magtotoo kang Jehovah. Karon, dinha, makapahunahuna kana sa atoa og usa ka butang.

⁵⁹⁴ Ania pipila ka mga tawo karong gabhiona nga wala ko pa nakita, sukad-sukad; wala ko pa kamo nakita kaniadto sukad. Apan kinahanglan n'yong maamgo kini, ug timan-i ninyo kini. Kita n'yo? Bisan unsa pa kamo ka relihiyoso, wala gyud kana'y kahilambigitan ni usa ka butang. Mahimong sa simbahan na

kamo mopuyo, mahimong sinsero kaayo kamo, ug malaglag sa gihapon! Kita n'yo?

⁵⁹⁵ Ug moingon mo, “Bueno,” moingon mo, “ang among mga pastor man ang pinakamaalamon, gikan pa sila sa mga seminaryo aron makabaton og pinakamaayong edukasyon. Sila’y mga teologo, hingsayran nila ang tanan—tanang teolohiya ug uban pa. Ug sila’y mga maalamon gayud, binansay, ang labing. . . ang pinakamaayo nga gipili nga nahibaloan namo.” Ug mamahimo gihapon sila nga malaglag! Kita n'yo?

⁵⁹⁶ Bueno si Cain, sa iyang kaliwatan: sila, ang matag usa kanila, relihiyoso kaayo; ilado kaayo nga mga tawo; ug sila’y mga siyentista, ug mga doktor, ug mga magtutukod, ug mga magbubuhay, ug maantigo nga mga tawo. Apan ang tibuok niana nga kaliwatan sinalikway na, gikan kang Cain hangtud na sa tanang kaliwatan niya.

⁵⁹⁷ Ug sa kaliwatan pud ni Abel: dili sila mga magtutukod ni mga magtutudlo o maantigo nga tawo; sila’y, halos, mga mapainubsanon, nga mga magbalantay sa karnero, ug mga mag-uuma, nga nagakinabuhi lamang uyon sa Espiritu.

⁵⁹⁸ Karon, ang Biblia miingon, “Walay pagkahinukman sa silot niadtong mga anaa na kang Cristo Jesus, nga wala nagakinabuhi uyon sa unod kondili uyon sa Espiritu.” Ang espirituhanon nga tawo aduna ma’y espirituhanon nga kalag nga dili gayud mamatay. Ug ang karnal nga tawo sàb adunay pang-relihiyon nga kahimtangan sa palibot niya (ug nagatinguha nga mosimba ug uban pa) pero karnal; dili ingon nga usa ka dili-magtotoo, kondili usa ka karnal nga magtotoo; ug mao kana nga matang ang gisalikway.

⁵⁹⁹ Bueno, sukad niadto, miadto si Cain ug giminyoan ang iyang asawa didto sa yuta sa Nod. Karon, wala gikaingon kung kinsa ang giminyoan ni Seth, o kung kinsa ang giminyoan sa uban pa. Pero ang maanindot gayud nga butang bahin niana mao ang mahibaloan nga—nga, si Cain nagminyoy, og aduna kita’y tubag niana. Tungod kay sigurado man gyud nga ang igsoon niyang babaye ang iyang giminyoan, o iyang. . . o kon dili man aduna diay. . .

⁶⁰⁰ Wala na ma’y uban pang mga babaye sa yuta kaniadto, gawas lang niadtong mga naggikan kang Eva. Ingon nga siya mao ang inahan sa tanan nga mga buhi. Kana’y, ang tanang tawo nga buhi, siya mao ang inahan nila. Mao kana’y hinungdan nga siya mao’y. . . Ang pulong nga *Eva* nagakahulogan “ang inahan sa mga buhi.” Busa nahitabo nga gipanganak niya kini nga bata. Ug giminyoan ni Cain ang kaugalingon niyang igsoon babaye, mao lang kana ang bugtong paagi nga nakita ko mahitungod niini. Busa aduna na’y mga tawo nga nagakinabuhi niadtong panahona, tinuod gayud. Kita n'yo? Bueno, ug. . .

Kaniadtong nagkaaduna og mga anak sila Adan ug Eva sa Eden... Karon matikdi n'yo, mao kini ang pangutana: **Kaniadtong nagkaaduna sila og mga anak sa Eden, aduna ba'y uban pa nga mga tawo sa yuta niadtong panahona? Wala! Mao nga sa Genesis 5:16, nakita n'yo, mipuyo si Cain sa yuta sa Nod ug giila ang iyang asawa. Oo. Kita n'yo?**

⁶⁰¹ Sa Genesis 1, kon diin gilalang sa Dios ang tawo diha sa Iyang Kaugalingong dagway, nga anaa sa theophany. Ug sa Genesis 2, gibuhat Niya ang tawo gikan sa abog sa yuta, nga mao ang tawo nga aduna kita karon. Ug dayon, diha sa 3 mao na ang pagkahulog, ug mao nga gipapahawa sila gikan sa tanaman sa Eden; ug dayon ang mga anak nanganak sab og mga anak. Ug gikuha ni Cain ang iyang asawa ug nagpuyo uban kaniya didto sa yuta sa Nod, sa gawas, tungod kay gihimulag man siya sa Dios gikan sa pagpakig-uban sa iyang kaugalingong igsoon (tungod sa pagkamatay ni—ni Abel). Ug mao kadto ang iyang gikuha, ang kaugalingon niyang igsoong babaye, ug giminyoan kadto; kana lang ang bugtong paagi nga ako, mismo, nga nakita kung giunsa kaha—kaha niya pagkaminyo.

⁶⁰² Karon, gikaingon... Ug nagalaum ko nga ang akong itum nga mga higala nga ania dinhi pasayloon unta ko sa niini nga pahayag, tungod kay bug-os baya kini nga dili husto. Ang unang higayon nga aduna ko'y nahimamat sa tibuok kong kinabuhi, human nga nakabig ako... akong... nahimamat ko si Igsoong George DeArk ug ang uban pa didto. Ug naglakaw ko niadto, ug gipangunahan ako sa Ginoo ngadto sa usa ka gamay'ng lugar. Ug naghisingotanay sila kon diin kono naggikan ang itum nga tawo. Ug ginaingon nila nga ang itum nga tawo, tungod nga nakaminyo kono si Cain og usa ka hayop nga mora'g unggoy, ug mao nga didto kono naggikan ang itum nga kaliwat. Bueno, sayup kana! Bug-os gayud, nga sayup! Ug ayaw gyud ninyo baruhi kana. Tungod wala man kaniadto'y itum o puti, o uban pa, usa lang man ang kaliwatan sa tawo hangtud niadtong lunop. Dayon human sa maong lunop ug sa tore sa Babel, kaniadtong hinay-hinay na silang nangapatlaag, mao kadto ang panahon nga aduna na sila'y mga kolor ug uban pa. Pero silang tanan naggikan baya sa mao ra nga punoan. Eksakto gayud. Si Adan ug si Eva man ang amahan ug inahan, sa yuta, sa tanang buhi nga linalang nga mga tawo nga miabot sa yuta. Mao kana'y tinuod. Itum, puti, luspap, tabonon, dalag, unsa man ang kolor ninyo, kana'y tungod sa dapit nga inyong ginapuy-an, ug sa paagi nga— nga ang... Sama lang...

⁶⁰³ Siguro ipahayag ko na kini samtang nagahisgot ako bahin niini. Ang mga tawo dinhi karon sa niining mga panaglailain ug mga balaod ug mga ingon-anang butang nga ilang ginaduso, sa hunahuna ko binuang man kana. Tinuod bitaw. Paminaw, pasagdi na lang ninyo ang mga tawo, nasayod man sila kung unsa'y gusto nila. Gibuhat sa Dios ang tawo ingon nga usa

ka itum nga tawo, ug malipayon man siya niana. Walay pagduhaduha! Ngani kung gibuhat ako sa Dios ingon nga usa ka itum nga tawo, malipay ko niana; kung gibuhat Niya ako nga usa ka tabonon nga tawo, malipay gihapon ko; kung gibuhat Niya ako nga usa ka tawong puti, malipay gihapon ko; kung gibuhat Niya ako nga usa ka dalag nga tawo, malipay gyud gihapon ako. Gibuhat man tà sa Dios ingon nga may mga kolor, ug gibuhat Niya kita sa paagi nga gusto Niya para kanato, ug mga anak Niya kitang tanan. Tinuod gayud! Ug mao nga dili unta sila angay'ng maglalisay nga ingon niana. Sayup kana. Dili gyud nila angay'ng buhaton kana. Gibuhat man tà sa Dios . . . sa kung unsa kita.

⁶⁰⁴ Ug mao nga ang itum nga tawo, ayaw niyang mopahigawas dinha ug lahion ang iyang kaliwatan o ang iyang kolor, ug isagol kini sa puti ug tanan nang ingon niana. Dili ko siya mabasol. Dili. Ang itum nga tawo man gud adunay mga butang nga wala sa tawong puti. Tinuod! Eksakto gayud. Ug dili tuyo sa Dios nga mamaingon niana sila.

⁶⁰⁵ Bueno, tan-awa n'yo. Ang itum nga tawo mao'y . . . siya'y—siya'y usa ka . . . aduna siya'y—aduna siya'y kinaiya nga wala sa tawong puti. Aduna siya'y malipayon og walay-pagkabalaka nga kinaiya, usa ka kinaiyang “sumalig ka sa Dios, ug pasagdan ang tanang uban pa nga mahitabo”; kung madawat man niya kini o dili, malipayon gihapon siya bisan pa man. Gusto ko nga makabaton gayud niana, karong gabhiona, gusto ko gayud. Bueno, aduna siya niana, ug iyaha mismo kana; ayaw nila nga isagol kana sa uban pa nga kaliwat ug walaon, man lang. Tinuod gayud.

⁶⁰⁶ Sa hunahuna ko ang babaye didto sa Shreveport ang nagpahayag og usa sa pinakamaayo—pinakamaayo nga mga komentaryo nga nadungog ko sa tibuk kong kinabuhi. Nagkomentaryo siya, ug ila kadtong gimantala sa mantalaan. Mitindog siya, ingon niya, “Tungod niining mga butanga nga nagakahitabo dinhi, tungod niining panaglainlain, mao nga dili ko gustong paeskwelahan ang akong mga anak diha nianang eskwelahan sa mga puti.” Ingon pa, “Tungod dili man nila maangkon ang pagtagad nga ilang gikinahanglan kumpara sa maangkon nila kung aduna sila'y usa ka itum nga magtutudlo.” Maalamon gyud kadto nga babaye. Nahibalo siya sa iyang ginasulti, maangkon man gud nila ang mas maayo nga edukasyon. Tinuod gayud. Busa sa hunahuna ko nga nagakasayup ang mga tawo tungod sa pagbuhat niana.

⁶⁰⁷ Ug dayon moingon sila, “Si Cain ug si Abel . . .” ug uban pa nga sama niana. Dili, sir! Wala ma'y kahilambigitan ang kolor diha niana. Kondili ang espiritu mismo nga anaa sa kinasuloran ang may kahilambigitan niana. Eksakto gayud.

⁶⁰⁸ Bueno giila ni Cain ang iyang asawa, ug kadto ang igsoon niyang babaye. Ug sila . . . gidala niya ang maong babaye ngadto

sa yuta sa Nod, ug didto naggikan ang bantugang mga banay sa kalibutan: ang mga relihiyoso ug mga magsisimba.

⁶⁰⁹ Ug palandunga n'yo karon, higala, hunong sà ug palandunga n'yo sa makadiyut. Nga adunay napulo ka linibo ug napulo ka linibo ka pilo ug liboan, nga mga tawong bug-os gayud nga nagasimba, sila'y ingon gayud ka sinsero ug napahinungod sa simbahan, pero nangahisalaag gayud sa ingon ka halayo sama ni Cain kaniadto. Kita n'yo? Ang Dios man Mao ang nagapili! Ang Dios Mao ang nagapili! Kita n'yo? Ang Dios Ang maoy nagahatag og kalooy! Dili man mahimong sultihan sa lapok ang magkokolon, kondili ang magkokolon mismo ang may kagahum sa lapok. Husto.

⁶¹⁰ Karon ania'y usa nga maanindot, kining usa na usab dinhi:

Sa Ikaduhang Pedro 2:4—2:4 . . .

⁶¹¹ Kon kinsa man ang adunay Biblia, og gustong mopakli niining mga Kasulatan sa ingon ka paspas samtang ginabasa ko Kini, kung gusto n'yo, ug aron medyo matabangan ako niini, samtang atong ginatubag kini nga pangutana.

⁶¹² Karon, mahitungod niini kang Cain ug—ug uban pa, kung wala pa kana naiklaro gyud karon, nan ipahibalo lang kanamo. Malipay kaming . . .

⁶¹³ Karon Ikaduhang Pedro 2:4. Okey, sir, ania kini:

66. Ikaduhang Pedro 2:4, “Kay kon ang Dios . . . Kay kon ang Dios wala magpasaylo sa mga manulonda nga nakasala, kondili nga nagtambog kanila ngadto sa impiyerno,” nan nganong nagwali man si Cristo sa mga espiritu nga didto sa bilangoan, sa Unang Pedro 3:19?

⁶¹⁴ Karon, atong basahon ang Pedro 2:4, una. Sige:

Kay kon ang Dios wala magpasaylo sa mga manulonda nga nakasala, kondili nga nagtambog kanila ngadto—ngadto sa impiyerno, ug—ug nagbalhog kanila ngadto sa mga lungib nga mangiub, aron igatagana hangtud sa paghukom;

⁶¹⁵ Karon, karon tan-awon pud nato ang Unang Pedro (ang Ikaduhang Pedro man kadto), Unang Pedro 3:19, paminawa n'yo kini. Ania kita, dinhi mismo. Bag-o lang kining miabot, mao'y hinungdan nga wala ko kini naisulat.

. . . nga diha niana usab . . . miadto ug miwali sa mga espiritu nga didto sa bilangoan;

⁶¹⁶ Oh, oo, ania na kita. Sugdan nato diyutay adisir pa kana, sa ika-18 nga bersekulo:

Kay si Cristo usab . . . nag-antus sa makausa tungod sa mga sala, ang matarung tungod sa mga dili-matarung, aron kita pagadad-on niya ngadto sa Dios, sa gipatay siya diha sa unod, apan gibanhaw diha sa Espiritu:

Nga diha niana usab Siya miadto ug miwali sa mga espiritu nga didto sa bilanggoan;

Nga sa miaging panahon mga dili-masinugtanon, . . .

⁶¹⁷ Minahal kong higala, kung basahon n'yo ang sunod nga bersekulo, ug dinha gihatagan Kini ug katin-awan. Kita n'yo?

Nga sa miaging panahon mga dili-masinugtanon, sa naghulat pa ang pagkamapailubon sa Dios niadtong mga adlaw ni Noe, samtang ginatukod pa ang arka, diin may pipila ka tawo, sa ato pa, walo ka mga kalag ang nangaluwaw latas sa tubig. (Kita n'yo?)

⁶¹⁸ Karon, kung inyong himatikdan dinhi, sa hunahuna ko kini nga magwawali adunay usa pa mahitungod sa . . . usa ka butang mahitungod sa mao ra nga pangutana, nga pagatubagon ko pagkataudtaud.

⁶¹⁹ Unang Pedro 4 . . . o 2:4, kung inyong himatikdan, “kay kon ang Dios wala magpasaylo sa mga manulonda,” giunsa ba pagkasulat ang *manulonda*? Gamay nga “m.” Kita n'yo? Karon, dinhi, “ang mga espiritu nga atua sa bilanggoan nga wala naghinulsol niadtong pagkamapailubong mga adlaw ni Noe,” mao ra nga mga manulonda. Mga kalalaken-an kadto: mga mensahero, mga magwawali; “wala magpasaylo sa mga manulonda.” Kabalo ba mo nga ang usa ka . . . ang pulong nga *manulonda* naggikan sa pulong nga “usa ka mensahero”? Pila man ang nahibalo nga ang *manulonda* “mensahero”? Tinuod gayud, ang manulonda usa ka mensahero, “ug Siya wala magpasaylo sa mga manulonda.” Kita n'yo?

⁶²⁰ Ug dinhi sa Mga Hebreohanon, nahinumduman n'yo ba nga nahisgotan na nato kini pipila na ka semana ang milabay, “ang mga manulonda”?

⁶²¹ Ug dinha pud sa He . . . sa Pinadayag, “Ngadto sa manulonda sa iglesia sa Sardis isulat mo kining mga butanga. Ngadto sa manulonda sa iglesia sa Efeso isulat mo kining mga butanga. Ngadto sa manulonda sa iglesia sa . . .” Nahinumduman n'yo ba? Ug atong gibalikan ang pulong nga *manulonda*, sa diksyunaryo, ug nahibaloan nato nga nagakahulogan kini nga “usa ka mensahero.” Mahimong “usa ka mensahero sa yuta, usa ka supernatural nga mensahero,” ang pulong nga *manulonda*.

⁶²² Busa sa niini nga bahin, kung atong kuhaon ang lexicon ug balikan kini, mahibaloan ninyo nga nagsugod kini ingon nga “mga mensahero, ang unang mga mensahero.” Kita n'yo, “Kung ang . . . Kung Siya wala magpasaylo . . . Kay kung ang Dios wala magpasaylo sa mga manulonda nga nakasala,” (Kita n'yo?) “ug sa supernatural nga mga linalang,” (Kita n'yo?) “human sa paghulat . . .”

Karon matikdi n'yo, ingon niya:

. . .kung . . .wala magpasaylo sa mga manulonda nga nakasala, kondili nga nagtambog kanila ngadto sa impiyerno, ug nagbalhog kanila ngadto sa mga lungib nga mangiub, aron igatagana hangtud sa paghukom;

623 Dayon tan-awa n'yo pag-usab dinhi sa Unang Pedro, 3:19, matikdi n'yo karon kung giunsa kini pagbasa:

Kay diha niana usab siya miadto ug miwali sa mga espiritu nga didto sa bilangoan;

Nga sa miaging panahon mga dili-masinugtanon, sa naghulat pa ang pagkamapailubon sa Dios niadtong mga adlaw ni Noe, . . . (kita n'yo, ang mga mensahero kadto niadtong panahona, mga mensahero) . . .samtang ginatukod pa ang arka, diin . . .sa ato pa, walo ka mga kalag ang nangaluwas latas sa tubig.

624 Karon kung inyong himatikdan sa dihang atua sa Langit ang maong mga linalang. Karon, dinha sa Pinadayag 11 . . .o sa ika-7 nga kapitulo, sa hunahuna ko . . .o dili, dili, sa ika-12 nga kapitulo diay. Iyang gihulagway ang usa ka babaye nga nagatindog; ang bulan nga anaa sa iyang ulo ug ang adlaw . . .o, ang adlaw anaa sa iyang ulo ug ang bulan anaa sa ilalum sa iyang mga tiil. Ug mitindog ang dragon aron lamyon ang Bata sa diha nga Siya iganak na, ug gigamit niya ang iyang ikog ug giguyod ang ikatulo sa mga bitoon sa Langit ug gipangsalibay ang mga niini ngadto sa yuta. Namatikdan n'yo ba kana? Bueno, wala nagapasabot nga si Satanas adunay usa—usa ka hataas nga ikog nga iyang ginakaw-it sa mga tawo, kondili “ang sugilanon kini nga iyang *gisulti*,” ug giguyod ang ikatulo ka bahin sa mga bitoon. Kadto nga mga bitoon mao ang kaliwatan ni Abraham.

625 Miingon si Abraham, “Oh . . .”

626 Gisultihan sa Dios si Abraham, “Hangda ang kalangitan, ug ihapa ang mga bitoon kung mahimo mo.”

627 Ingon siya, “Dili ko kana mahimo.”

628 Ingon Niya, “Dili mo usab arang maihap ang imong kaliwatan,” ang mga bitoon.

629 Si kinsa ba ang Masiga nga Bitoon sa Kabuntagon? Si Jesus nga taga-Nazaret, ang pinakamasiga nga nabuhi diha sa tawhanong unod. Siya mao ang Masiga nga Bitoon sa Kabuntagon. Ug Siya mao ang Binhi ni Abraham, nga mitungha pinaagi ni Isaac. Ug kita, ingon nga mga patay na diha kang Cristo, nahimong Binhi ni Abraham ug mga manununod sumala sa saad.

630 Busa ang mga bitoon sa langit nagarepresentar kana sa mga espiritu sa tawo dinhi. Ug sa dihang ang mapula nga dragon (ang Roma, ilalum sa pagpanglutos niini) gisapupo ang duhasa-tulo ka . . .o ang ikatulo sa mga bitoon, ug gipangsalibay ang mga niini, kaniadtong pagkalansang sa atong Ginoong Jesus sa

dihang gisalikway nila Siya ug Siya’y . . . ug gipalagpot Siya ug ayaw nila nga magkaaduna og unsa man nga kahilambigitan Kaniya; kadto mao ang ikatulo ka bahin sa langitnong mga bitoon, sa langitnong mga linalang.

⁶³¹ Kita n’yo, sa inyong lawas, sa kinasuloran ninyo . . . (aduna kita’y usa pa ka pangutana mahitungod niana, mismo, para mas matubag kana og ayo). Busa sa dihang . . . Sa kinasuloran nimo mao ang usa ka espiritu, usa pa ka tawo. Sa pang-gawas nimo mao ang usa ka tawo, og sa kinasuloran nimo mao ang usa pa ka tawo. Busa sa kinasuloran nimo mao ang supernatural, sa pang-gawas pud nimo mao ang pisikal. Kita n’yo? Ug kini nga pagkatawo, kung ginapangunahan ka sa Espiritu, sa Dios, nan nahimo ikaw nga usa ka mensahero sa Dios, o usa ka manulonda. Ang *mensahero* sa Dios, ang *manulonda* sa Dios, mao ra mismo nga pulong; og dili mahimong lahion kana: ang mensahero sa Dios, o manulonda sa Dios.

⁶³² Ug kinsa man ang dunay pinakadakung pagbulot-an? Ang Manulonda ba nga gikan sa Langit o ang manulonda diha sa pulpito? Si kinsa man? Ang manulonda diha sa pulpito! Miingon si Pablo, “Kung ang usa ka Manulonda nga gikan sa Langit moabot ug magawali kaninyo og lain nga maayong balita gawas niining ako nang gikawali, ipatunglo siya.” Busa ang manulonda nga dinihogan sa Balaang Espiritu ug sa Pulong nagabarug sunod sa Dios. Husto kana. Sa Langit, ang iyang pagbulot-an . . .

⁶³³ “Ang tanang kagahum sa Langit ug yuta gikahatag na nganhi sa Akong kamot. Panglakaw kamo, ug Ako magauban kaninyo. Unsa ma’y inyong pagabugkoson sa yuta, pagabugkoson Ko sa Langit. Unsa ma’y inyong pagaluan sa yuta, pagaluan Ko sa Langit.”

⁶³⁴ Oh, kung maamgo lang unta sa halangdong balaang Iglesia ang gahum niini aron sa pagbuhat niining mga butanga! Apan daghan man gud kaayo og mga pagduhaduha ug kahadlok ug pagkurog, pagpanghunahuna kung mahitabo ba kini, “Mahitabo kaha kini?” Samtang anaa kana, dili gayud makabarug ang Iglesia. Pero kon mawala na ang tanang paghisgot-hisgot mahitungod sa kahadlok ug ang Balaang Espiritu ang bug-os nga nagakontrolar sa Iglesia, nan ang tanang kahadlok mawala gayud, ug ang Iglesia aduna na’y gahum. Kita n’yo? Aba, anaa na kanila ang tanan-tanan nga panag-iya sa Langit nga nagapaluyo kanila. Sila’y mga ambasadador gikan sa Trono. Sa walay pagduhaduha! Ang pinadala ni Cristo adunay pagbulot-an, ug ang tanang panag-iya ni Cristo panag-iya pud niana nga ambasadador. Ug ang ingon Niya, “Panglakaw kamo sa tibuok kalibutan, kamo mao ang Akong mga saksi human nga mokunsad na kaninyo ang Espiritu Santo.” Ug unsa man ang usa ka saksi? Maoy usa ka ambasadador; nga nagaadto ug nagapamatuod sa usa ka butang. Ang tanang gahum sa Langit anaa mismo sa inyong mga kamot! Oh, pero nganong

nagalingkod-lingkod ra man kita? Ug dili nagapamunga ang iglesia, ug wala kita'y ginabuhat. Tungod kay wala man nato ginaila kining mga butanga.

⁶³⁵ Bueno, ang mga kalag nga atua sa bilangoan (nga wala nanaghinulsol), dili sila ang mga Langitnong linalang nga—nga gipakanaug kaniadto diha sa porma sa mga Manulonda, kondili kadto mao ang mga espiritu sa mga langitnong linalang nga nahulog sa wala pa ang pagkatukod sa kalibutan, kaniadtong nagkaaduna og gubat sa Langit. Ug si Satanang ug—ug ang dragon giaway, ug dayon . . . o si Michael ug—ug ang—ang dragon nag-away (ug si Lucifer). Ug gisalikway si Lucifer uban ang tanan niyang mga anak (ang tanang mga manulonda nga iyang nalimbongan), ug kadto nga mga manulonda miabot sa yuta ug napailalum kaniadto nga mamahimong tawo. Ug sa nabuhat na nila, mao kadto ang panahon nga “nakita sa mga anak nga lalaki sa Dios ang mga anak nga babaye sa mga tawo nga maanyag, ug nagkuha alang kanila og mga asawa.”

⁶³⁶ Sila'y mga anak nga lalaki sa Dios. Ang matag tawo nga nahimugso dinhi sa yuta usa man ka anak sa Dios. Bisan pa kon makasasala siya o unsa man siya, anak gihapon siya sa Dios. Gilalang diha sa dagway sa Dios alang sa mga pagdayeg sa Dios, gilalang siya sa ingon-anang paagi. Apan ang Dios sa sinugdan pa lang nasayod na man kung kinsa ang modawat Kaniya ug kung kinsa ang dili modawat Kaniya. Busa makahimo Siya sa pagpili-nang-daan, o, dili magpili-nang-daan, apan pinaagi sa pagkahibalo-nang-daan masulti na Niya kung kinsa ang maluwas ug kung kinsa ang dili-maluwas, kay hingsayran na man Niya kung kinsa nga tawo ang magkaaduuna og asa man niini nga espiritu.

⁶³⁷ Ug kadtong mga espiritu nga naggikan sa Trono sa Dios, ug nagbarug sa atubangan sa Trono sa Dios, ug nabuhi . . . ug binilyon ug binilyon ug sulod sa hataas kaayo nga panahon nga wala pa kaniadto magsugod ang kalibutan, diha sa Presensiya sa Dios, sa hunahuna n'yo ba wala sila'y nahibaloan mahitungod sa pagsimba? Ug mikanaug sila ug misulod mismo sa tawo, ug gisimba gani nila ang Dios! Tinuod mismo, nga ginasimba nila ang Dios; ug aduna sila'y kahibalo mahitungod sa Dios, ug sila'y mga utokan, ug maalamon, ug edukado, sa kanunay. Apan gisalikway na sila sa Dios sa sinugdan pa lang!

⁶³⁸ Busa, higala, ang pagpamiyembro sa iglesia, o—o ang kahibalo mahitungod sa kung unsa nga teolohiya o unsa man, wala gyu'y ni usa ka kahilambigitan Niini. Kinahanglan nga ang Dugo gayud ni Jesus Cristo ug usa ka bag-ong pagkahimugso ang magahiusa kaninyo nganha Kaniya ingon nga usa ra ka persona. Mao kana.

⁶³⁹ Ang Dios, sa sinugdanan kaniadtong hingsayran na Niya nga . . . Ang mga lalaki ug mga babaye gibuhat man nga usa

ra, dili duruha, gibuhat sila nga usa ra. Pero gibulag ra sila, ang usa gipahimutang sa unod ug ang usa usab sa theophany. Hingsayran na Niya kana. Busa aron pamatud-an kana kaninyo: sa dihang gibuhat sa Dios ang tawong babaye, wala na Siya mikuha og abog para sa pagbuhat sa tawong babaye nga sama sa gibuhat Niya sa tawong lalaki; kondili mikuha ra Siya og usa ka gusok gikan sa kilid ni Adan, ug nahimo ang babaye nga binuhat lang gikan sa lalaki (tungod kay kabahin man ang babaye sa lalaki). Inyo na bang nasabtan Kini karon? Kita n'yo? Ingon niana.

⁶⁴⁰ Mao kana ang mga manulonda. Ug ang Dios ug ang espiritu nga nahiusa diha sa Dios usa ra ka Espiritu. Husto kana. Karon, ang Espiritu sa Dios nga nagapuyo sa Iglesia, mao mismo ang Espiritu nga gikan sa Langit, nga naila na sa Dios sa wala pa ang pagkatukod sa kalibutan, og nga misalikway sa bakak sa yawa. Ug kadto nga espiritu kinahanglan nga mogamit og lawas nga unod aron mahimong . . . aron masulayan siya. Kinahanglan niya nga mahimong unod sama niadtong uban pa, ug silang tanan nagpas-an og managsama ra nga yugo. Ug ang Dios, sa sinugdan pa lang, hingsayran na ang mga espiritu nga modawat, ug nga dili modawat. Ingon niana. Ang yawa pud maalamon kaayo nga malimbongan niya ang mismong mga pinili, kon mahimo pa.

⁶⁴¹ Busa kini nga mga espiritu, kining mga manulonda nga giwalihan kaniadto, atua sa bilangoan; *mga manulonda*, kung inyong himatikdan dinhi, gamay nga “m” kini nagakahulogan og “tawo”; mga manulonda, mga mensahero dinhi sa yuta. Nakasala sila, ug ang bugtong paagi nga makasala sila mao ang dili-pagtoo! Ug ang paagi. . . Aduna sila’y kaugalingong mga relihiyon, ug mao nga wala sila mitoo sa mensahe ni Noe kaniadto. Wala pud sila mitoo sa mensahe ni Enoch. Ug gisalikway sa maong mga tawo ang ilang Mensahe, “tungod hinukman na man sila,” ang Biblia miingon nga sila’y mga hinukman na.

⁶⁴² Nagpropesiya si Enoch ngadto kanila, miingon, “Moanhi ang Ginoo uban ang napulo ka libo sa Iyang mga balaan.”

⁶⁴³ Ug nagpropesiya sila. Ug si Noe nagbuhat og usa ka arka, ug sila miingon, “Usa siya ka holy-roller! Usa siya ka panatiko! Wala ma’y ingon nianang butang nga adunay ulan nga moabot.” Ug milabay ang usa ka gatus ug baynte ka tuig, ug atua kang Noe ang relihiyon nga dunay kaluwasan, aduna mismo’y gibuhat nga paagi aron makalingkawas, pero kontento na man gud sila sa ilang kahimtang.

⁶⁴⁴ Ingon niana usab karong panahona, nga kontento na ang mga tawo sa ilang kahimtang. Apan aduna ma’y paagi sa paglingkawas, ug kana nga paagi mao’y pinaagi ni Jesus Cristo. Amen. Mao kana: mao ra nga banay, mao ra nga mga espiritu.

645 Ug gani sila’y bug-os ka relihiyoso nga mga tawo, relihiyoso kaayo, pero nangapakyas sila sa pakigsaad.

646 Mao man usab karong panahona. Nagasimba ang tawo, ug nagapamiyembro sa dagkung mga simbahan, ug gapaninguha nga mahimong pinaka inila nga tawo sa siyudad. Kung gusto nilang magpamiyembro sa usa ka simbahan, ginapili nila ang pinakadaku sa siyudad, ang pinakanindot ug pinaka-ilado sa siyudad. Pagkahalayo gayud nila sa hustong pagtawag! Grabe ang pagkasipyat nila Niini!

647 Ang bugtong paagi nga maila mo si Jesus Cristo maoy pinaagi sa espirituhanong kapadayagan, dili pinaagi’g teolohiya ug kung giunsa mo pagtuon og ayo ang Biblia. Bisan kamo pa’y Christian Science, Methodist, Jehovah Witness, o unsa man kamo; bisan unsa pa kamo, dili n’yo gayud Kini maila nga pinaagi ra sa Pulong, pinaagi kini sa Espiritu sa Dios nga maoy nagapadayag Kaniya nganha kaninyo. Usa kini ka espirituhanong kapadayagan!

648 Si Adan kaniadto, didto sa tanaman sa Eden, ug si Eva, sa dihang gipapahawa kini nga mga anak, ania miabot si Cain nga dunay maayo nga teolohiya. Ingon siya, “Angay nga masayran sa Dios nga ginabuhat nato kini sa bug-os—bug-os kong kasingkasing. Magtukod ako og maanindot nga halaran, butangan ko kini og mga bulak, butangan ko kini og mga prutas, patahumon ko kini. Sigurado gayud nga mapahupay ko ang Dios pinaagi niini ug ipahibalo ko Kaniya nga matinud-anon ako sa kasingkasing ko.” Husto man siya kon sumala mismo sa Pulong; gusto man sa Dios ang pagsimba, mao nga misimba siya. Naghimo siya og usa ka maanindot nga dapit alang sa pagsimba, daku, og maanindot nga katedral (sama sa tawag nila niini karon). Ug maayo ang iyang pagkabuhat niadto, maayo ang iyang pagkatukod niadto ug gibutangan sàb kadto og halaran; dili siya usa ka tawo nga wala nagatoo sa Dios.

649 Apan si Abel, sumala sa Pulong sa Dios. . . Wala pa ma’y Biblia nga nasulat kaniadto, apan *gipadayag* kaniya sa Dios nga dili kadto tungod sa prutas nga gipapagawas kita sa tanaman sa Eden, nga dili kadto tungod sa mga mansanas nga gikaon ni Adan ug ni Eva, kondili sa walay pagduhaduha tungod kadto sa pagpakighilawas nga maoy nagpahimulag kanila ug nagpahawa kanila. Ug ingon nga nahibalo siya nga sila nahimo nang mortal, tungod sa dugo ni Adan, ug tungod sa dugo sa serpente nga mao’y nagpahinungdan niadto, si Abel, pinaagi sa Balaanong kapadayagan, miadto ug nagkuha’g usa ka cordero ug gihalad kadto. Ug miingon ang Dios, “Mao Kana!” Oo.

650 Kaniadtong mikanaug sila gikan sa Bukid sa Pagkabalhin, miingon si Jesus, “Sumala sa sulti sa mga tawo kinsa man kono Ako nga Anak sa tawo?”

651 “Ang uban nagaingon nga Ikaw kono si ‘Moises,’ ug ang uban nagaingon nga Ikaw kono si ‘Elias,’ ug ang uban nagaingon nga Ikaw kono si ‘Jeremias,’ ug ang uban pud nagaingon nga Ikaw kono ‘kadto nga Propeta.’”

652 Ingon Siya, “Apan kamo unsa ma’y sulti ninyo kung Kinsa Ako?”

653 Ang ingon ni Pedro, “Ikaw mao si Cristo, ang Anak sa Buhi nga Dios.”

654 Ingon Siya, “Bulahan ikaw, Simon Bar-jona, kay wala kini gipadayag kanimo sa unod ug sa dugo.” (Matikdi!) “Dili pinaagi’g sulat, dili pud pinaagi’g eskwelahan; wala mo gyud kini natun-an sa usa ka seminaryo, wala pu’y tawo nga nagsulti kanimo. Wala kini gipadayag kanimo sa unod ug sa dugo, kondili ang Akong Amahan nga anaa sa Langit mao ang nagpadayag niini kanimo. Ug ibabaw niining bato pagatukoron Ko ang Akong Iglesia, ug ang mga ganghaan sa hades dili gayud makabuntog Niini.” Mao kana. Mao kana ang Iglesia sa buhi nga Dios. Mao mismo kana. Ibabaw niana nga iglesia. . . Diha niana nga *kapadayagan*, natukod kini nga Iglesia. Usa kini ka Balaanong kapadayagan nga gipadayag sa Dios, nga si Jesus Cristo mao ang Anak sa Dios, ug gidawat mo Siya ingon nga personal mong Manluluwas, og miagi ka na gikan sa kamatayon ngadto sa Kinabuhi.

655 Ug ang Balaang Espiritu nagapanglihok ug nagapamuhat sa mga miyembro niining Lawas. Mao kini ang Iglesia! Bisan pa kung kabus ra kini, ug anaa sa pagpangmisyon, ug nagatindog ka lang ilalum sa kahoy’ng pino sa kon asa man, o bisan asa man kini, o kung anaa ra kini nagapahigayon og pribado nga panagtigum sa balay sa usa ka tawo, og bisan asa pa kini. Dili man ang kaanyag ug mga ingon-anang butang ang nagatawag sa pagtagad sa Dios. Kondili ang pagkasinsero sa kasingkasing tungod sa kapadayagan nga si Jesus Cristo gipresentar ingon nga Anak sa Dios, nga atong personal nga Manluluwas. Amen!

656 Aba, kita. . .dili mo gyud kini makuha, pagmagsige ta’g ingon niana, dili ba?

657 Mao kadto ang mga. . .didto Iyang giadtoan; ang mga mensahero, sila nga mga magwawali, sila nga mga intelektuwal, sila nga mga mensahero nga wala nanagpanoo kaniadtong nagwali si Noe ngadto kanila ug gisultihan sila, “Intawon, sumulod na kamo niining arka.”

658 Ang ingon nila, “Paminawa gani kini nga holy-roller. Paminawa n’yo kining panatiko. Aba, wala ma’y ulan. Kinsa ba ang nakadungog na og ingon-niana nga butang? Aba, grabe, dili ba aduna man kita’y mga simbahan? Dili ba diay ta mga relihiyoso?” Aba, mga relihiyoso bitaw sila!

659 Miingon si Jesus nga kini nga henerasyon mamahimong sama niadtong milabay na, mamahimo nga mahitabo pag-usab kadto

nga henerasyon sa dili pa ang Iyang Pag-abot, “Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo. Kay nanagpangaon sila, nanag-inom, nanagpangasawa, nanagpamana.” Ngani aduna sila’y Reno, Nevada kaniadto, sa kon asa man. Aduna pud sila og tanan nang matang sa mga binuang nga aduna ang mga tawo sa karong panahon; pagtapoktapok, ug pagsadya-sadya, ug pagbiaybiay, mga mayubiton ug uban pa; adunay dagway sa pagkadiosnon, apan ginapanghimakak ang tinuod nga Kamatuoran: ang pakigsaad, ang Mensahe sa grasya. Pero ang Dios nagahimo man og Iyang pamaagi, ug ginahatag sa mga tawo ang Iyang—Iyang pakigsaad, kung sa unsang paagi sila makalingkawas; ingon nga aduna Kini og kaluwasan, ang kaluwasan mao mismo ang dapit sa paglingkawas.

⁶⁶⁰ “Para sa unsa ba nga nagkinahanglan kami og kaluwasan?” Karong panahona nagaingon ang mga tawo, “Dili ba nagapuyo man kita ilalum sa usa ka maayong demokratiko nga matang sa gobyerno? Unsa pa ma’y atong gikinahanglan?”

⁶⁶¹ Dili ko igsapayan kung unsa man ka dakung demokratiko nga matang sa gobyerno ang atong ginapuy-an, ang Dugo ni Jesus Cristo mao gyud ang atong gikinahanglan. Tinuod! Gikinahanglan nato si Cristo. Hinoon ginadayeg ko ang usa ka demokratiko nga matang sa gobyerno; pero wala man kana’y kahilambigitan sa kaluwasan sa kalag. Tinuod gayud! Kini nga mga gobyerno mangahanaw ra, ug ang matag nasud usab mangahanaw ra. Ug nakaadto na ako sa . . .kon diin nagatindog kaniadto ang mga faraon, ug magkalot pa kamo og baynte ka piye aron makaplagan ang ilang mga trono nga gilingkoran nila kaniadto. Ang tanang mga faraon ug ang mga gingharian nila dinhi sa yuta, ug ang tanang lumalabay’ng butang niini mangapukan ug mangahanaw gayud, apan si Jehovah magahari hangtud sa kahangturan, kay Siya man ang walay-kamatayon nga Dios. Ibabaw sa Bato nga mao si Jesus Cristo kita malig-on nga nagabarug, kay ang tanang ubang mga dapit balas na man nga nagakaunlod.

⁶⁶² Dili ko igsapayan kon kini’y . . .ang mga gingharian motungha ug mangapukan, apan, oh, walay unsang butang, dili ko igsapayan kon unsa man kini, walay butang sa karon, walay butang sa umalabot, wala gyu’y unsa man (mga kagutom o mga katalagman o unsa man) ang makapahimulag kanato gikan sa gugma sa Dios nga anaa kang Cristo. Sa dihag natawo ang usa ka tawo sa Espiritu sa Dios, siya’y dili na usa ka linalang nga napailalum sa panahon, kondili siya’y usa na ka linalang nga iya sa Eternidad. Amen. Miagi na siya gikan sa kamatayon ngadto sa Kinabuhi. Miagi na siya gikan sa . . .Miagi na siya sa elemento sa panahon, paingon sa Eternidad. Dili gayud siya mamatay! Ug nagsaad man ang Dios nga Iyang pagabanhawon siya sa kaulahiang mga adlaw.

⁶⁶³ Busa naangkon n'yo ang tanan ninyong dagkung mga simbahan, ug ang tanan ninyong mga pagsadya-sadya, ug ang tanan nga gusto ninyo, nga magsulti'g mahugaw nga mga pagpakatawa ug magpahigayon og mga dula nga Bunco, ug mga pang-sosyal nga panihapon ug tanan nang uban pa nga gusto ninyo; ug magkaaduna og edukadong magwawali nga mobarug dinha. Tungod tingali'g mas maayo siya kaysa niining mga batan-ong lalaki nga halos wala gani nahibalo sa ilang ABC. Pero sultihan ko kamo sa tinuod, mas gustohon ko pa ang usa ka lalaki nga wala nahibalo sa iyang ABC ang mao'y magwali kanako (pero nakaila gyud kang Cristo) kaysa sa tanang bantugang mga teologo nga dala ang tanang edukasyon nga mahunahuna ninyo. Tinuod gayud!

⁶⁶⁴ Ngani didto sa Kentucky, dili pa lang dugay, may usa ka batan-ong lalaki nga dili halos makabasa sa kaugalingon niyang ngalan, ang ingon nga gitawag kono siya sa Ginoo aron magwali ug gusto niya nga didto sa usa ka eskwelahan. Aba, wala siya tugoti sa mga may awtoridad nga gamiton kadto. Pero dunay usa ka bantugan kaayo nga magwawali ang miadto didto nga may titulo sa iyang ngalan nga ingon *niini*, usa ka bantugang doktor sa divinidad, aba, ilang gitugotan siya nga magamit ang maong eskwelahan. Oo. Tuod man nagpahigayon siya og duha ka semana nga rebaybal, pero wala gyud ni usa ka kalag ang nakabig. Ug ang amahan sa batan-ong lalaki miadto didto, miingon, “Karon tugoti ninyo siya nga magamit kini, nagabayad man ko og buhis, mao nga aduna ko'y katungod para sa akong anak nga magamit kini. Ug angay ra nga makagamit usab niini ang akong anak.”

⁶⁶⁵ Busa mibalik ang amahan para hibaloon, ug hangyoon sila, ingon nila, “Bueno, tugotan na namo siya nga magamit kini og dili mominus sa duha ka gabii.” Ug nagpadayon sila ug gitugotan na siya nga magamit kadto sulod sa duha ka gabii.

⁶⁶⁶ Ug niadtong gabhiona mitindog na didto ang maong batan-ong lalaki ug dili gani siya makabasa sa Biblia, aduna pa'y tawo nga mibasa sa iyang teksto. Apan sa dihang miadto na siya sa entablado, gidihogan siya sa Espiritu Santo. Ug sa nagwali na siya, dunay mga baynte ang miduol ngadto sa altar; ug kadtong nagpakaingon nga magwawali mihilak gayud paingon sa Kalbaryo, didto sa altar.

⁶⁶⁷ Tinuod, igsoon, kini'y dili—dili sa kung unsa ang nahibaloan mo, kondili kung Kinsa ang naila mo. Mao kana mismo, mao kana ang gikinahanglan, gikinahanglan nga maila gayud si Cristo. Ang maila Siya, mao'y Kinabuhi; ang isalikway Siya, mao'y kamatayon.

⁶⁶⁸ Sa gilayon padayon ta sa ubang mga pangutana, kining mga pangutana karon gikan pa sa Georgia:

67. Unsa ba ang ginarepresentar sa mga bato diha sa . . . diha sa Pinadayag 21:19 ug 20?

⁶⁶⁹ Kung gusto n'yong mogahin og oras para ablihan ang inyong mga Biblia, ngani wala man gyud kita'y igong oras karon, pero paningkamotan kong tubagon ang mga niini sa ingon ka paspas. Pinadayag baynte- . . . nagatoo ko nga 21:19 ug 20 kini. Oo.

⁶⁷⁰ Okey, dinha inyong mahibaloan nga nagahisgot siya mahitungod sa mga bato nga anaa sa bilding. Ug ang maong mga bato mga patukoranan. Kung inyong himatikdan. . . nagatoo ko nga imo na kanang napakli dinha, Igsoong Neville. Ug ang matag bato usa ka patukoranan. Dili nga usa ra ka bato ang patukoranan, ug ang uban. . . Kondili ang matag bato usa ka patukoranan. Ang maong matag bato usa ka permanente nga patukoranan. Ug aduna didto og dose ka bato. Ug kung matikdan ninyo ang maong dose ka bato, nagahatag ang matag. . . Ang nahauna mao'y jaspe, ug sardio, ug uban pa nga sama niana, nga ginarepresentar sa matag bato.

⁶⁷¹ Dinha sa Biblia mahibaloan ninyo nga dunay mga ngalan ang maong mga bato. Ang uban niini medyo managlahi, nga wala pa ninyo nadungog sukad-sukad. Pero kung tan-awon n'yo sa diksyunaryo mahibaloan ninyo nga mao ra diay kana nga bato, lahi lang ang ngalan; giusab lang.

⁶⁷² Apan nagsugod kini sa—sa jaspe. Ang jaspe mao ang bato ni—ni Benjamin, o, ang bato sa. . . oh, sa unang anak, nga si Ruben. Ang unang bato mao si Ruben, nga mao ang jaspe. Ang ulahing bato mao si Benjamin, ang ulahing bato nga anaa sa ibabaw.

⁶⁷³ Bueno, kining dose ka bato nga gipahimutangan sa mga patukoranan, kining—kinig dose ka bato nakasab-it sa tabon-sa-dughan ni Aaron. Ug ang mga niini—ang mga niini nagrepresentar, nga si Aaron mao ang labaw'ng sacerdote sa niini—sa niini nga mga banay. Ang matag usa sa ilang bato-sa-pagkahimugso ania, niining—niining maong tabon. Ug mao nga pag makita sa mga tawo kini nga tabon, maila nila nga si Aaron mao ang labaw'ng sacerdote sa tibuok banay, pag makita nila ang bato-sa-pagkahimugso nga anaa niining tabon.

⁶⁷⁴ Karon, sa nasabtan nato sa mensahe ni Igsoong Neville kaganinang buntag. Nga sa makadaghang higayon kaniadto duna sila'y dad-on ngadto sa Urim Thummim. Makita ninyo kini nga gihisgotan diha sa Biblia nga mao kadto ang paagi nga mahibaloan nila kon ang mensahe nila Kamatuoran ba o dili. Kadtong mga bato, sa diha nga moadto sila og isulti kung unsay gisulti sa tawo, kung unsa ang gipropesiya sa propeta, ug kadtong mga bato dungan nga mosiga. Mohimo kadto og usa ka kombinasyon sa mga kahayag nga langkob ang safiro, ug jaspe, ug carbuncle, ug ang tanan niadtong uban pa nga mga bato nga magreplektar og kahayag, mohimo kadto og usa ka dakung

maanindot nga balangaw nga kolor ingon nga dungan kadtong tanan nga mosiga.

⁶⁷⁵ Bueno, karon, sa karong panahon, ingon nga giwala na man ang Urim Thummim uban ang pagka-sacerdote, karon kining Biblia mao na ang Urim Thummim sa Dios karong panahona. Ug pag mowali ang usa ka magwawali, kinahanglan dili kana usa lang ka bahin dinhi, ug mao na dayon kana ang pahimutangan niya sa iyang paglaum; kinahanglan nga tibuok Biblia gyud ang magreplektar sa mensahe nga ginawali sa maong tawo. Mao kana mismo. Dili ingon nga usa lang ka bahin, ug moingon na, “Bueno, ingon *niini* man ang ginasulti sa Biblia.” Oh, tinuod, tungod daghan mang mga butang ang ginasulti Niini. Apan kinahanglan mo kining mapatakdo tanan. Ug pag mokunsad ang Espiritu sa Dios ug mosulod sa—sa Pulong, ipatakdo Niini kining tanan ug magareplektar og usa ka dakung Kahayag, ug kana nga Kahayag mao si Jesus Cristo. Amen.

⁶⁷⁶ Karon, kining dose ka bato mao ang dose ka patukoranan nga nagsugod gikan kang Ruben, ug kang Gad, ug sa uban pa hangtud kang Benjamin; dose ka banay, dose ka bato. Ug kadto nga mga bato sa Templo, diha sa bag-ong Langitnong Jerusalem, ang matag patukoranan igapahimutang sa matag usa sa mga patriarca.

⁶⁷⁷ Karon matikdi, matikdi n’yo ang maong mga bato, karon matikdi n’yo silang mga patriarca nga nagareplektar sa usa pa ka butang, diha sa usa na usab ka pangutana.

68. Isaysay— isaysay ang ikaupat . . . ang upat ka mga mananap diha sa Pinadayag 5.

⁶⁷⁸ Igsoong Neville, kung nakapakli ka na haduol dinha, o si kinsa man kaninyo, sa Pinadayag 5, basahon sa nato kini sa makadiyut lang. Usa kini—usa kini ka maanindot nga hulagway dinhi mahitungod sa . . . Ania, napakli ko na, Pinadayag sa ika-5 nga kapitulo:

Ug nakita ko sa toong kamot niadtong nagalingkod sa—sa trono ang usa ka basahon nga sinulatan sa sulod ug walay ug—ug—ug sa gawas, nga giselyohan og pito ka selyo.

Ug akong . . .

⁶⁷⁹ Bueno, dili diay kana nga bahin. Gusto kong mobasa direktso na mismo, sa upat ka mga mananap. Atong tan-awon, sa ika-14 nga bersekulo. Okey, sir. Karon ania na kita, mao kini. Karon sugdan nato dinhi sa—sa ika-12 nga bersekulo, dili diay, diha siguro sa . . . “Ug ang upat ka mga mananap miingon, ‘Amen.’” Dili, aduna pa’y diyutay nga bahin adisir kana, Igsoong Neville. “Ania karon, nadungog ko ang tingog . . .”

680 Tan-awon sà nato, sa makadiyut, gibasa ko na kini kaganina. Oh, ania ra, atong sugdan sa ika-6 nga bersekulo. Sa ika-5 nga bersekulo diay:

Ug miingon kanako ang usa sa mga anciano, Ayaw paghilak: ania karon, ang Leon sa banay ni Juda, ang Gamut ni David, nga nakadaug sa pag-abli sa basahon, ug sa pagtangtang sa . . . mga selyo niini.

Ug nakita ko, ug, . . . sa taliwala sa trono ug . . . upat ka mga binuhat nga buhi, ug, sa taliwala sa mga anciano, ang usa ka Cordero nga nagatindog, nga daw gipatay, nga may pito ka mga ulo ug pito ka mata, nga mao ang pito ka mga Espiritu . . . nga gipadala gikan sa . . . ngadto sa yuta.

681 Gusto kong magpabilin sà kamo niana nga pangutana, ug kung dili ko man kana maisaysay pagkataudtaud, nan gusto kong ipahinumdum ninyo, tungod gusto pud nakong hisgotan ang mahitungod niini, “ang pito ka Espiritu sa pito ka mata nga anaa sa Cordero.” Oh, pagkanindot gyud niini. (Bueno, tubagon sà nato ang pangutana niining maong igsoon karon.) Sige, ayaw n’yo kana kalimti ha.

Ug miduol siya ug gikuha niya ang basahon sa toong kamot niadtong nagalingkod sa trono.

Ug sa nakuha na niya kini, ang upat ka mga binuhat nga buhi ug ang kaluhaag-upat ka mga anciano mihapa sa atubangan sa cordero, . . . ang tagsatagsa kanila may mga alpa, . . .

682 Karon, mao kana ang—ang upat—ang upat ka mga mananap, kung himatikdan ninyo. Karon padayon tà ug mobasa pa og dugang:

. . . bulawan nga mga alpa, . . . puno nga mga panaksan ug incienso, . . . ug mga pag-ampo sa mga balaan.

Ug nanag-awit sila sa usa ka bag-ong awit, . . . Takus ikaw . . . (ug nagpadayon ug naghimo sa ilang . . . sa tibuok nilang pagsimba sa Ginoo)

683 Karon, kining upat ka mga mananap sa Pinadayag, kung matikdan ninyo kini, sa matag bahin. . . (Kaninyo nga mga nagabasa sa Biblia, ug sa tawo nga magapaminaw niini nga teyp rekording). Kining upat ka mga mananap, aduna sila’y upat ka hitsura: ang usa adunay hitsura nga mora’g sa tawo, ang usa pa adunay hitsura nga mora’g sa laking-baka, ug ang usa pa ka hitsura mora’g sa agila, ug ang usa usab ka hitsura sa leon. Ug wala gayud sila nagaatras, tungod dili man nila mahimong moatras.

684 Pila man sa inyo ang nakahinumdum sa karaang basahon sa Pinadayag kaniadtong gitudlo nila kini pila na ka tuig ang milabay, sa dihang migahin ako og mga duha ka tuig dinhi sa

Basahon sa Pinadayag? Daghan sa inyo nga mga karaan na ang nakahinumdom niini.

⁶⁸⁵ Ania, dili nila mahimong moatras, tungod kay sa matag direksyon nga ilang padulngan nagaabante man sila. Kung mopaingon sila sa *niini* nga direksyon, nagaabante sila nga sama sa usa ka tawo; kung mopaingon pud sila sa *niini* nga direksyon, nagaabante sila nga sama sa usa ka leon; kon mopaingon sàb sa *niini* nga direksyon, nagaabante sila nga sama sa usa ka agila; kung mopaingon sila sa *niini* nga direksyon, nagaabante sila nga sama sa usa ka laking-baka. Kita n'yo, dili nila mahimong moatras, tungod nagaabante man sila sa tanang panahon.

⁶⁸⁶ Bueno kining upat ka mga mananap. Karon para masabtan kini sa gilayon, tungod dili ko gusto nga magdugay bahin niini. Apan ang upat ka mga mananap... Ang *mananap*, diha sa Biblia, nagarepresentar og “gahum.” Ug matikdi n'yo nga kini nga mga mananap wala diha sa linaw o sa dagat sa kon asa man nga nagatungha, kondili anaa sila sa may Trono sa Dios, ug ginasimba nila ang Dios. Kining upat ka mga mananap nagakahulogan og upat ka gahum nga mitungha sa yuta, ug kining upat ka gahum mao ang upat ka Ebanghelyo: si Mateo, si Marcos, si Lucas, ug si Juan; nga ang usa wala nagasumpaki sa usa pa.

⁶⁸⁷ Ug ang usa sa mga niini, ang... Sa diha nga ginapahayag ang Ebanghelyo ingon nga usa ka leon, kini mabagison, maisogon; maisogon ang Ebanghelyo sama sa usa ka leon, ug hari kini nga sama sa usa ka leon. Kung motungha kini nga may hitsura sa tawo, maalamon kini ug maalisto sama sa usa ka tawo. Kung motungha kini ingon nga agila, aduna kini'y paspas molupad nga mga pako ug ngadto sa kinatas-an sa kawanangan. Kini... Nasabtan n'yo ba ang buut kong ipasabot? Kung motungha kini ingon nga laking-baka, kini ang nagahagong mananap nga may kasarang mobira, laking-baka kini nga nagahago sa pagbira sa—sa—sa mga palas-anon sa Ebanghelyo. Ang maong upat ka mga mananap maoy upat ka gahum, nga mao: si Mateo, si Marcos, si Lucas, ug si Juan; upat ka Ebanghelyo nga nagalanog diha sa Presensiya sa Dios. Kana mao... .

⁶⁸⁸ Kung namatikdan ninyo, aduna sila'y mga mata sa atubangan ug sa likod. Sila—sila... Bisan asa man kini mopaingon, makakita kini. Makita nila ang tanang dapit nga ilang padulngan. Ug ingon niana ang gahum sa mga Ebanghelyo sa diha nga ginapahayag kini, mahimo niini... Anaa niini ang pagkamaalamon sa tawo; anaa niini ang kapaspas sa usa ka agila; anaa niini ang—ang—ang—ang gahum, ang gahum nga makabira, ang tigpas-an sa mga palas-anon sama sa usa ka laking-baka; anaa niini ang—ang pagkamabagison ug ang pagkamaisogon sa usa ka leon. Kita n'yo, mao kana ang upat ka Ebanghelyo, nga mao ang upat ka gahum sumala sa Pinadayag, sa ika-4 nga kapitulo.

Okey, karon ang sunod:

69. Si kinsa ba ang kaluhaan ug upat ka mga anciano?
Okey, nagatoo ko nga anaa kana sa—sa... **Si kinsa ba ang kaluhaa'g-upat ka mga anciano?**

⁶⁸⁹ Bueno simple lang kini, matubag ra nato kini. Ang kaluhaa'g-upat ka mga anciano nga nanaglingkod sa atubangan sa Trono. Anaa kana sa...nagatoo ko nga anaa kana sa bersekulo 4, dinha kana makita. “Ug adunay mitungha nga usa pa ka...” Kinahanglan ko únang...Atong tan-awon, akong...4:10.

⁶⁹⁰ Sige, sa Pinadayag, sa ika-4 nga kapitulo, ug sa ika-10 nga bersekulo. Husto. Atong basahon kini.

Ug ang kaluhaan ug upat ka mga anciano mihapa sa atubangan niadtong nagalingkod sa trono, ug nanagsimba kaniya nga mao ang buhi hangtud sa kahangturan, ug gipahamutang nila ang ilang mga purongpurong sa atubangan sa trono nga nagaingon,

Takus ikaw, Oh Ginoo, sa pagdawat sa himaya ug dungog ug gahum: kay ikaw ang nagbuhat sa tanang mga butang, ug tungod sa imong kabubut-on nangahimo sila ug gipamuhat.

⁶⁹¹ Karon ang upat ug kaluhaan ka mga anciano. Ang anciano mao'y usa ka tigdumala. Karon matikdi, sila mao ang dose ka patriarca ug ang dose ka apostoles. Ug nanaglingkod sila, dose sa usa ka bahin ug dose pud sa pikas bahin. Mao kana ang kaluhaan ug upat ka mga anciano, nga mao ang dose ka patriarca sa usa ka bahin, ang Daang Tugon, ang dose pud ka apostoles sa pikas bahin, ang Bag-ong Tugon. Dili ba miingon si Jesus, “Kamo magalingkod sa napulo'g-duha ka mga trono, og pagahukman n'yo ang napulo'g-duha ka mga banay ni Israel”?

⁶⁹² Karon, ang mga patukoran. Matikdi, aduna kahoy didto. Ug ang kahoy sa isig ka kilid nagapamunga'g dose ka matang sa mga bunga. Ug nagapamunga kini kausa sa usa ka bulan, diin dose ka bulan sa usa ka tuig. Nagapamunga kini og dose ka matang sa mga bunga sa matag tuig nga nagalabay. *Dose*, ingon nga numero sa “pagsimba”, nakita n'yo. Ug mao nga adunay kaluhaan ug upat, kaluhaan ug upat, tungod dose man ka apostoles ug dose pud ka patriarca. Nanaglingkod sila sa may Trono.

⁶⁹³ Sige, karon sa ika-4 nga bersekulo, o ikaupat nga pangutana diay:

70. Unsa ba ang ginarepresentar sa pula nga tanod diha sa Genesis 38?

⁶⁹⁴ Ang pula nga tanod, kung inyong himatikdan, si Juda man kadto. Ug duna siya'y mga anak nga lalaki, ug ang usa sa mga anak niyang lalaki nakaminyo og usa ka Canaanhong babaye.

Ug kini nga Canaanhong babaye wala makabaton og mga anak, tungod namatay man ang anak nga lalaki ni Juda. Dayon, ang balaod kaniadto nagamando nga kinahanglan kuhaon sa . . . kinahanglang kuhaon sa sunod nga anak nga lalaki ang asawa sa igsoon niyang lalaki, ug magpatungha og kaliwat alang sa maong namatay. Ug kining ikaduhang anak nga lalaki wala man miuyon ug wala gibuhat ang angay niya unta nga buhaton, ug mao nga gipatay siya sa Ginoo. Dayon aduna man siya’y usa pa ka anak nga lalaki nga bata pa; busa miingon si Juda, “Maghulat ka hangtud nga kini nga anak kong lalaki mahimong . . . modaku na hangtud nga moabot sa punto nga puede na nimo siyang minyoan.”

⁶⁹⁵ Ug sa dihang midaku na ang maong batang lalaki og miabot na sa pangidaron nga puede na niyang minyoan ang kanhing asawa sa iyang duha ka igsoon, bueno, kinahanglan minyoan na unta niya ang maong babaye kaniadto, aron magpatungha og kaliwat alang sa iyang mga igsoon nga dugay nang . . . nga namatay na. Pero wala gihatag ni Juda ngadto sa babaye (sa Canaanhong babaye) ang anak niyang lalaki, ang maong batanon, ug gipasagdan lang kadto. Ug tungod nakita sa babaye nga sayup ang gibuhat sa iyaha, mao nga migawas siya ug nagtabon og usa ka pandong sa iyang nawong, ug milingkod didto sa usa ka dayag nga lugar sama sa usa ka bigaon.

⁶⁹⁶ Miagi si Juda didto ug gikuha ang maong babaye isip iyang asawa, tungod nga usa siya ka bigaon, ug nakighilawas kaniya. Ug miingon, miingon ang babaye, “Bueno, unsa man ang isaad mo kanako?” Ug siya . . . ingon ang babaye . . .

⁶⁹⁷ Ingon niya, “Hatagan ko ikaw og usa—usa ka nati nga kanding.” Ingon siya, “Bueno, hatagi ako og timailhan nga buhaton mo gayud kana.” Busa gikuha sa babaye ang sungkod ni Juda ug ang iyang singsing ug uban pa, ug gitagoan kadto.

⁶⁹⁸ Ug sa dihang gidala na nila ang nati nga kanding, wala na nila hikaplagi ang bigaon, tungod kay dili man gyud siya usa ka bigaon.

⁶⁹⁹ Wala magdugay, nagpakita na siya nga mamahimo na siyang usa ka inahan. Ug sa nagpakita siya nga siya’y buros na, ilang giadtoan og gisultihan si Juda, “Ang imong umagad nga babaye nahimo nang usa ka bigaon.” Miingon, “Tungod kay siya—siya’y buros man, nga unta patay na man ang imong duha ka anak nga lalaki.”

⁷⁰⁰ Ingon si Juda, “Bueno, ipatawag siya, ug sunoga n’yo siya.”

⁷⁰¹ Ug busa nagpasugo ang maong babaye sa pag-ingon kang Juda, ug ingon siya, “Ang lalaki nga nagbuhat niini, mao’y tagiya niining sungkod ug niining singsing.” Bueno, ang iyaha man diay kadtong ugangang-lalaki.

⁷⁰² Ug ingon si Juda, “Siya’y labi pang matarung kay kanako.”

703 Bueno, sa hingsayran sa babbaye nga igaanak na ang iyang bata, kaluha diay kadto. Ug sa diha nga ang kaluha . . . Ang unang bata nga mahimugso, sumala sa nabatasan sa mga Judio kaniadto, ang unang anak ang makaangkon sa pagkapanganay, ang unang anak nga mogawas. Ug timan-i n'yo, mao kadto ang iyang panganay. Tungod wala man ni usa niadtong mga anak nga lalaki ang nakabaton og anak gikan sa maong babaye. Wala pa siya sukad nakabaton og anak gawas niadtong higayona.

704 Ug sa migawas na ang iyang unang anak, ang kamot pa lang ang migula. Ug gihiktan kadto sa mananabang og pula nga tanod, tungod kay ang pula nga tanod nagapahinungod man sa pagtubos nga ang unang anak sa birheng Maria mamahimong . . . magkaaduna og pula nga tanod sa pagtubos.

705 Ug sa dihang gibalik pagsulod sa bata ang iyang kamot, ang usa pa ka bata mao na ang unang migawas. Ug sa paggawas na sa bata, ang ingon, “Nganong gibuhat mo kini? Kadto mang usa ka bata ang nakaangkon sa pagkapanganay.”

706 Busa mao kana ang buut ipasabot sa Genesis 38, nakita n'yo, nga ang unang anak nagpabilin hangtud sa pag-abot ni Ginoong Jesus Cristo, ingon nga ang unang anak napailalum sa balaod sa pagtubos.

707 Kabalo mo sa gikaingon ko na . . . ang gamay'ng mula, kabalo na man mo, nga ako nang naestorya kaninyo, nga ang iyang mga mata . . . unsa pa man, nga ang iyang mga dalunggan nakadungo, apan, kung nahimugso siya ingon nga panganay, nan may usa ka walay-sala, hingpit nga nating karnero ang mamatay na nga puli kaniya. Ingon niana.

708 Busa nagapahinungod kadto sa pagkapanganay. Ang unang bata kadto nga migawas gikan sa maong inahan, ingon nga nakita na nila kadtong kamot (pero nasayod nga mahimo kadtong mosulod og balik). Ug sa gipagawas niya ang iyang kamot aron mapakita nga siya ang makaangkon niadto, ingon nga siya ang una, nan gihiktan kadto sa mananabang og pula nga tanod ug gibalik pagsulod sa bata ang iyang kamot. Kita n'yo? Apan, walay pagduhaduha, nga siya gyud ang una. Kadtong pula nga tanod, ang pula nga tanod adunay . . . sa tibuok Biblia, nagakahulogan kadto og pagtubos; nga nagapahinungod sa pag-abot sa unang anak.

709 Ang unang kabayo nga nahimugso, ang unang baka nga nahimugso, kung unsa man kini, ang tanan nga nahimugso'g una (nga migawas) napailalum sa pagtubos, og kinahanglan nga tuboson; ang tanan niini kinahanglan gyud nga tuboson! Alleluyah! Oh, nagapadasig gayud kini kanako. Nasabtan n'yo ba kini? Ang *panganay* kinahanglang tuboson. Usa kadto ka balaod. Bulahan ang Galan sa Ginoo!

710 Ug sa dihang natawo si Jesus Cristo, gitubos Niya ang tibuok kalibutan. Oo, gitubos Niya. Tungod Siya man ang Manunubos

sa tanang linalang nga gilalang dinhi ibabaw sa yuta. Siya mao ang Manunubos. Ug sa...ang tibuok katubsanan anaa diha Kaniya, ug wala gayu'y ubang paagi nga makaduol kamo ni pinaagi sa maayong mga buhat, pinaagi'g pagpamiyembro sa iglesia, o unsa man kini; kinahanglan n'yo nga moduol pinaagi nianang mapula nga tanod, nianang Manunubos, nianang kabanay'ng Manunubos.

Okey, karon ang sunod:

71. Asa man ang mga gasa... Unsa man nga mga gasa ang igapadala pagnamatay na ang duha ka mga saksi sa Pinadayag 11?

Oh, Igsoong Palmer, kung wala ka'y uban pang mga pangutana!

⁷¹¹ Bueno, ang pagtubos, kining mga tanod dinhi, kining mapula nga tanod, nasabtan nato nga nagakahulogan kini og pagtubos.

⁷¹² Karon ang sunod nga pangutana:

Unsa man ang mga gasa diha sa Pinadayag 11?

⁷¹³ Moabot ang panahon...Karon ania ang tubag sa usa ka pangutana nga natubag na niadtong miaging gabii, nga gisulat sa higala kong magwawali mahitungod sa mga Judio, kung sa unsang paagi kini mahitabo.

⁷¹⁴ Bueno kining mga Judio aduna pa'y tulo-ug-tunga ka tuig nga gikasaad kanila. Pila man ang nasayod niana? Setenta ka semana man ang gikasaad. Ang ingon, "Moabot ang Mesias ug pagapatyon Siya sa tunga-tunga." Nagwali si Cristo sulod sa tulo-ug-tunga ka tuig, og gipatay human sa eksaktong tulo-ug-tunga ka tuig, mao nga tulo ka tuig ug unom ka bulan Siya nga nagwali.

⁷¹⁵ Ug dayon ang pasipala nga nagalaglag, ang—ang moske sa moslem nga si Omar gitukod didto sa Balaan nga Yuta; sama sa gikaingon sa Dios, baynte-singko ka gatus ka tuig sa wala pa kadto mahitabo, nga pagatukoron kini didto. Nakita na kadto sa propeta, ug nasayran kadto, ug miingon nga sila, ang mga Gentil, ang magapanag-iya niadto hangtud nga matapos ang dispensasyon sa mga Gentil.

⁷¹⁶ Bueno aduna pa'y tulo-ug-tunga ka tuig nga gikasaad. Kung inyong himatikdan, kini nga mga saksi sa Pinadayag 11 magapropesiya sulod sa usa ka libo, duha ka gatus ug kanuman ka adlaw; eksaktong tulo ug tunga ka tuig. Karon... ug sila magbisti og sapot nga sako. Karon, matikdi n'yo ang ilang ministerio, kung unsa sila. Ngani, pagapatyon man kining maong duha ka saksi.

⁷¹⁷ Karon, ang...Mobalik sila ngadto sa mga Judio human sa Pagsakgaw sa Iglesiang Gentil. Ang Iglesiang Gentil Mopauli na alang sa Pang-kasal nga Panihapon, maingon nga gidala kaniadto si Rebekah ngadto sa dapit ni Abraham kauban si Isaac

ug didto siya gikasal. Ug si Rebekah ug si Isaac milakaw nga may bug-os na nga pagpanag-iya sa tanan-tanan nga panag-iya ni Abraham, tungod kadtong tanan napaingon man kang Isaac. Sigurado gayud! Ug dili pud kadto mapaingon kang Isaac kung dili usa' maminyo si Isaac. Oh hallelujah! Mao kana.

718 Ug si Cristo mamahimong . . . ang Dios hingpit og bug-os na gayud nga magapuyo, sa nianang guba na nga lawas hangtud sa kahangturan ug ngadto sa Eternidad. Pag ang Cordero ug ang Pangasaw-onon gikasal na didto sa Langit, nan magalakaw ang Pangasaw-onon nga may bug-os na nga pagpanag-iya. Sigurado gayud! Ingon nga si Isaac ug si Rebekah milakaw kaniadto nga may bug-os na nga pagpanag-iya.

719 Ug samtang nagakahitabo sa Langit kining seremonya, sa Pangasaw-onon, ingon nga ang Gentil nga Pangasaw-onon ginakasal na sa Principe (nga Anak sa Dios), didto sa Himaya; samtang ginakasal sila, aduna pu'y tulo-ug-tunga ka tuig nga nagakahitabo samtang ang . . . si Moises ug si Elias . . .

720 Bueno, wala man nawala si Moises . . . wala, kondili gikuha lang kaniadto ang iyang lawas. Gikuha siya sa mga Manulonda, wala gani siya natun-as, wala siya nadunot. Usa siya ka hingpit nga tipo ni Cristo. Namatay siya ug gikuha siya sa mga Manulonda, ug bisan ang yawa wala gani nakahibalo kon asa siya gilubong, ug nakiglantugi pa kang Michael nga Arkanghel mahitungod sa iyang paglubong. Mao kana'y giingon sa Biblia. Gilalin siya sa Dios diha sa Pagsakgaw.

721 Ug si Elias, sa nagalakaw siya kaniadto, usa ka propeta sa Dios, nga nagalakaw ngadto sa Jordan, gihukas niya ang iyang kupo ug gihampak ang tubig, ug nabahin kadto ngadto sa tuo ug wala. Misaka siya sa bukid. Miingon si Eliseo . . . Ingon siya, "Nganong nagasunod-sunod ka man kanako?"

722 Ingon niya, "Gusto ko og doble nga bahin sa imong Espiritu."

723 Miingon, "Malisud nga butang ang imong gihangyo, pero pagmakita mo ako sa akong pagtaliwan." Mao nga gibantayan gyud niya siya.

724 Ug wala magdugay, miabot gikan sa Langit ang usa ka carro nga kalayo ug mga Manulonda nga kalayo, mga kabayo nga kalayo, ug misakay si Elias ug mikayab paingon sa Himaya. Wala siya nakasinati og kamatayon, tungod gilalin man siya, pero kinahanglan gihapon niyang mamatay!

725 Ug kung himatikdan n'yo kining duha ka propeta sa Pinadayag 11, buhaton pud nila ang mao ra mismong butang nga gibuhat nila Moises ug Elias kaniadto. Moingon mo, "Igsoong Branham, buut mo bang isulti kanako nga buhi sa gihapon si Elias ug si Moises?" Sigurado!

⁷²⁶ Aba, sa Bukid sa Pagkabalhin kaniadto . . . Didto sa Bukid sa Pagkabalhin, sa wala pa si Jesus miadto sa Kalbaryo, atua man nagatindog si Moises ug si Elias nga nagapakigsulti Kaniya. Tinuod, atua mismo sila, dili sila patay. Ug wala man sila namatay; pero ingon nga mga mortal, kinahanglan gihapon nilang mamatay. Tungod anaa lang man sila sa gihimaya nga kahintang og nagahulat alang nianang panahona.

⁷²⁷ Ug dayon pagmobalik na sila ug magwali sa eksaktong tulo-ug-tunga ka tuig ilalum sa pagdihog sa Bautismo sa Espiritu Santo, samtang gikuha na ang mga panalangin gikan sa mga Gentil (ug ang Iglesia gilalin na); ug ang mabugnaw, pormal nga iglesia pagagukdon nga mora'g mga iro, sa komunista ug Romanong grupo, ug nianang panahona pagagukdon sila ug pagapatyon. Sila—pagapatyon pud sila nianang panahona; kining mga propeta nga magawali sulod sa tulo-ug-tunga ka tuig, ug miingon ang Biblia nga sila pagapatyon didto sa bantugang . . . didto sa dalan, nga espirituwal nga gitawag og, Sodoma ug Egipto, kon diin ang atong Ginoo gilansang sa krus kaniadto. Didto sa Jerusalem; kita n'yo, didto sa Jerusalem, nga gitawag og ingon niana sa espirituwal.

⁷²⁸ Ug magbuy-od sila didto sa dalan sulod sa tulo ka adlaw ug gabii. Ug pagkahuman sa tulo-ug-tunga ka adlaw, mokunsad kanila ang espiritu sa kinabuhi ug mabanhaw sila. Gikinahanglan man nilang mamatay sama sa uban pa nga mga mortal, kinahanglan nila nga masinati kana. Ug sa dihang patyon na nila kining duha ka propeta . . .

⁷²⁹ Nagwali sila batok sa sayup, ug naghatud sila og kalayo gikan sa langit. Si kinsa man ang mibuhat niana? Kita n'yo? Naghatud sila'g mga hampak gikan sa langit, ug gibunalan ang yuta sa ingon ka paspas . . . ug sa unsa mang orasa nga gusto nila. Ug naghatud sila'g kalayo gikan sa langit. Ug gisirhan nila ang kalangitan aron nga dili mag-ulan, sumala sa ilang gusto. Si kinsa man kadto? Si Moises ug si Elias mismo. Ug sila kining duha ka mga saksi.

⁷³⁰ Ug sa diha nga pagasakiton nila ang iglesia, o ang kalibutan, pinaagi sa ilang pagwali, ug dawaton balik ang mga Judio, ug ipahibalik sila ngadto sa paghinulsol, ipahibalik sila nga motoo sa . . . Pag makita nila si Jesus nga nagaabot alang sa Pangasaw-onon, moingon sila, “Tan-awa, mao kana ang atong Dios Nga atong ginahulat. Siya kana!” Apan dili man Siya moabot alang kanila; kondili moabot Siya alang sa Iyang Pangasaw-onon. Ug ang Iyang Pangasaw-onon . . .

⁷³¹ Sa dihang atua si Joseph sa Egipto, wala baya niya gidala ang iyang mga igsoon uban kaniya, apan didto niya nakaplagan ang iyang pangasaw-onon. Eksakto gayud! Apan sa dihang gipaila na niya ang iyang kaugalingon ngadto sa iyang mga igsoon, walay uban pa nga atua didto. Eksakto gayud. Ug sa dihang

ipaila na Niya ang Iyang Kaugalingon ngadto niining mga Judio, wala pu'y si kinsa man ang maatua didto gawas sa mga Judio. Sila nga mga mipatay kang Joseph, atua didto; ug miingon siya, "Bueno, ako si Joseph, nga inyong igsoon." Ug mihilak siya.

⁷³² Ug ingon sila, "Karon nasayod na tà nga pagabayran gyud nato kadto, tungod kay gipatay man nato siya."

⁷³³ Mao sàb gihapon, nga ang mga Judio makaagum gayud og dakung panahon sa kalisdanan sa dili pa ang pag-abot, sama sa mga pagpanglutos nga mao'y nagapabalik kanila sa ilang kaugalingong-yuta. Ginaabog sila nga mora'g panon sa mga karnero pabalik didto sa bukid sa Carmelo.

⁷³⁴ Pag moabot na ang Ginoong Jesus alang sa Iyang Pangasaw-onon, ug makita nila Siya, moingon sila, "Kana Mao ang atong ginahulat, mao na kana Siya!" Motungha Siya nga adunay kaayohan diha sa Iyang mga pako. Husto kana.

⁷³⁵ Ug ang iglesia, ang nahibilin nga mga Judio, sa dihang patyon na nila kining duha ka propeta, ug magbuy-od ang duha didto sa espirituwal nga dalan nga gitawag og Sodoma ug Egipto, kon diin ang atong Ginoo gilansang sa krus kaniadto, magpadala sila og mga gasa sa usa'g usa (ingon-ana sàb ang ginabuhat sa kalibutan).

⁷³⁶ Karon, Igsoong Palmer, ania na. Baliki n'yo ang Romanhong kasaysayan ug mahibaloan ninyo nga adunay usa lang ka nasud sa kalibutan ang nagapadala og mga gasa human sa pakiggubat, kana mao ang Imperyong Romano.

⁷³⁷ Mao kana'y hinungdan nga ginaingon ko nga ang anticristo nagagikan sa Roma. Ang mapintas nga mananap nagagikan mismo sa Roma, og dili mahimo nga magagikan kana sa Moscow. Magagikan kana sa Roma, ang mapula nga dragon nga miadto sa babaye aron lamyon ang iyang Anak inig mahimugso na Kini. Ang yawa kadto, asa man kadto nga yawa? Si kinsa man kadto? Si Caesar Augustus nga nagpasugo aron patyon ang tanang mga bata gikan sa duha ka tuig ang panuigon hangtud paubos. Ang mapula nga dragon, ang dragon, ang *mananap* nagakahulogan og "gahum." Ang gahum sa Roma nga nanglutos ug naninguha sa pagpangangita niadtong Bata nga Cristo.

⁷³⁸ Ug mao ra gihapon! Sa matag higayon nga ang mga Romano, ang karaang paganong Romano magkaaduna kaniadto og dakung kadaugan, nagapadala sila sa usa'g usa og puti nga mga bato ug tanan na, nga sama niadto ingon nga gasa, ingon nga handumanan. Busa kadtong mga bato nga . . . Kadto maoy, gagmay'ng mga gasa nga ginapadala tali sa mga iglesiang Romano. Walay pagduhaduha! Eksakto. Mao gayud kadto.

⁷³⁹ Ngani nakaadto na ako didto mismo sa Siyudad sa Vatican ug napamatud-an ko kana sa Biblia. Ang papa nga nagasul-ob og tulo ka korona, *Vicarivs Filii Dei*, og tanan na nianang mga butanga nga akong nadungog kaniadto ug uban pa, tinuod gyud

diay kana; usa ka relihiyoso nga grupo nga ginamandoan ang matag nasud ilalum sa Langit, ug may pangagamhanan kini. Mao kana, mao gyud.

⁷⁴⁰ Wala ko’y usa man nga batok sa mga Katoliko (wala, sir), mga buutan man sila sama ni kinsa pa man, apan sayup ang ilang relihyon sumala niining Biblia. Kung husto kining Biblia, nan sayup sila. Ginaingon nila nga dili sila . . . “Dili namo igsapayan kung unsa man ang ginaingon sa Biblia, ang importante mao’y sa kung unsa ang ginasulti sa iglesia.” Pero nagatoo kita nga nagasulti ang Biblia nga may pinakataas nga awtoridad! Walay pagduhaduha, nga kini mao ang Pulong sa Dios.

⁷⁴¹ Busa nakita n’yo dinha, kining mga bato nga ginapadala kaniadto, sumala dinhi sa Pinadayag, mao—mao ang mga bato ingon nga mga gasa nga ginapadala nila sa usa’g usa. Nga nagapakita lang . . . Ang Biblia miingon, dinhi sa Pinadayag, miingon, “Kaniya nga may kaalam ipakuwenta ang numero sa mapintas nga mananap. Kaniya nga may kaalam ipabuhat ang *ingon-ani-ug-ingon-ana*. Kaniya nga may espiritu sa mga gasa ipabuhat ang *ingon-ani-ug-ingon-ana*.” Nakita n’yo kung unsa ka kulang ang iglesia?

⁷⁴² Dunay usa ka batan-ong lalaki nga nangutana sa ako kaganinang buntag mahitungod sa espirituhanon nga mga gasa, mahitungod sa pagsulti’g laing mga pinulongan. Usa ka batan-ong lalaki, nga sinsero gayud, nagatoo ko nga mamahimo siyang usa ka ministro usa sa niining mga adlaw. Ug mahitungod sa iglesia, ang ingon ko, “Adunay daghan kaayo niana nga iya lang sa unod. Wala nato ginatinguha kana, ang ginatinguha nato mao gyud ang tinuod nga butang. Kana ang atong ginatinguha nga maangkon.”

⁷⁴³ Dili ka gani mahimong magtudlo niana sa iglesia; tungod mahibaloan mo na lang, aduna na’y, usa nga nagasulti’g laing pinulongan, may usa nga adunay salmo, dayon kinahanglan mo pang pakigbatokan ang maong butang aron mapahunong. Apan kon ang Dios mismo nga may kagahum ang magahatag og usa ka gasa, igapadayag mismo niini ang kaugalingon niini. Tinuod. Kita n’yo, ingon-ana ang mga gasa sa Dios, ingon-ana ang Iyang ginapadala sa Iglesia alang sa pagpangdaug.

⁷⁴⁴ Karon, ang anticristo aduna man gu’y mora’g pag-uyon ug pagsupak, aduna kini og—og tinuis nga pamaagi sa pagbuhat niana. Ug kana mao ang imperyong Romano nga nagapadala og mga gasa sa usa’g usa, mga natural nga gasa. Ang Dios nagapadala og espirituhanon nga mga gasa alang sa mga mananaug; ang Romano nagapadala pud og natural nga mga gasa sa usa’g usa.

⁷⁴⁵ Nagatoo kita nga ang Espiritu Santo usa ka Espiritu, og madawat nato Kini pinaagi sa bautismo nga gikan sa Kahitas-an.

⁷⁴⁶ Pero nagatudlo ang iglesiang Katoliko, “Ang balaang eukarista mao kono ang lawas ni Cristo; nga kon dawaton n’yo kining tinapay ug kosher, nan kini *mao* kono ang Balaang Espiritu, ang Espiritu Santo, ang balaang eukarista.” Kita n’yo?

⁷⁴⁷ Nagatoo kita nga usa lang kana ka tinapay, wala tà nagatoo nga mao kana mismo ang lawas ni Cristo, (hapit na natong tubagon kini sa pipila ka minuto). Kondili nagatoo kita nga nagarepresentar kana sa lawas ni Cristo. Apan dili kana . . .

⁷⁴⁸ Mao kana ang kalahian tali sa doktrina sa Katoliko ug sa Protestante. Kita n’yo? Ginaingon sa iglesiang Katoliko, “Ang lawas mao ang . . . Ang tinapay kono *mao* ang literal nga lawas. Pero aduna kono’y gahum ang simbahan aron usabon kini.” Nakakita na ba mo og Katoliko nga paglabay niya sa simbahan, iduko niya ang iyang ulo, og manguros? Ug kana’y tungod kono sa kahayag nga nagasiga sulod sa simbahan dinha ilalum sa gamay’ng tabernakulo. Aduna ma’y gamay’ng kahayag dinha, ug anaa kono dinha ang kosher nga tinapay. “Ug kana mao kono ang lawas ni Cristo. Ug pag kaonon mo kana, bug-os kono nga ginakaon mo ang literal nga lawas ni Cristo sa imong unang komunyon ug sa imong mga pagsugid ug uban pa. Literal mo konong, ginakaon, ang lawas ni Cristo.”

⁷⁴⁹ Ang ginaingon nato nga *nagarepresentar* ra kana sa lawas ni Cristo, kita n’yo, tungod kana wala ma’y lain kondili usa lamang ka tinapay. Ug bisan pa kung dili kana tinapay, bisan unsa pa kana, nagarepresentar lang gihapon kana. Ingon—ingon ka eksakto gayud. Kon kana ma’y . . .

⁷⁵⁰ Sama ra sàb sa ginaingon sa mga tawo, “Dili ko gustong magpabautismo diha sa bautismohan, gusto nako nga sa sapa mismo magpabautismo.”

⁷⁵¹ Unsa ma’y kalahian niana, basta mabautismohan ka lang? Kung diha man sa bautismohan, ug . . . Aba, si Felipe gani nagbautismo man didto sa bautismohan . . . kaniadtong gibautismohan niya ang eunoco. Ngani sa dihang gibautismohan na ni Felipe ang eunoco didto sa bautismohan, gisakgaw gayud siya sa Balaang Espiritu hangtud nga gidala Niya si Felipe sa halayo, og wala na siya makit-i sa gilay-on nga duha ka gatus ka milya. Gisakgaw siya sa Espiritu, og gihatagan siya’g usa—usa ka carro nga gikan mismo sa Langit sa gilay-on nga duha ka gatus ka milya. Amen. Pagkanindot!

Karon:

Asa man mahiadto ang mga balaan human sa usa-ka-libo-ka-tuig nga paghari? Ug unsa man nga matang sa lawas ang ilang mabatonan? Balikan ko ra kini pagkataudtaud. [Ginatubag ni Igsoong Branham kini nga pangutana sa parapo 820, ingon nga pangutana 74—Ed.] Makauban na nila si Jesus.

⁷⁵² Sige, ang—ang ikapito nga pangutana:

72. Sa unsa mang paagi nato pagahukman ang mga manulonda?

⁷⁵³ Makita kana sa . . . Sa unsa mang paagi nato pagahukman ang mga manulonda? Pinaagi sa pagkahimong mga anak nga lalaki ug mga anak nga babaye sa Dios. Ang mga manulonda mga alagad lang; kita'y mga anak nga lalaki ug mga anak nga babaye sa Dios. Ug miingon man ang Biblia nga kita ang magahukom sa mga manulonda. Husto kana. Karon, karon kung inyong . . .

Ang ika-8 nga pangutana:

73. Ngano man nga buhok tungod sa mga manulonda diha sa Unang Mga Taga-Corinto?

⁷⁵⁴ Karon basin adunay makapakli para sa ako sa Unang Mga Taga-Corinto, sa—sa ika-11 nga kapitulo, ug atong tanawon dinha, aron inyong mahibaloan nga ang—ang . . . Diha sa Unang Mga Taga-Corinto, sa—sa ika-11, makita nato nga nagapamulong si Pablo dinha. Moabli na lang sa ko niini sa makadiyut, ug dayon atong basahon kini sa gilayon ug pagkahuman atong—atong hisgotan kini.

⁷⁵⁵ Aduna diay ko'y isulti mahitungod niining usa pa ka bersekulo dinhi, nga nagalaum kong ginahatag kini sa Ginoo kanato sa paagi nga angay natong madawat kini. Kung aduna na'y nakakita niana . . . sa hunahuna ko sa ika-11 kana nga kapitulo, oo, sige. Karon paminaw gyud mo, og ayo ha, aron nga masabtan ninyo. Karon ihiklin sa ninyo ang tibuok n'yong konsensiya ug isulod usa sa bulsa sa inyong saleko hangtud nga mahuman ko sa pagbasa niini, nakita n'yo, og magkomentaryo bahin Niini. Paminaw mo og ayo, kini'y MAO KINI ANG GINAINGON SA GINOO:

Magma-awaton kamo kanako, maingon nga ako . . . nagamaawaton kang Cristo. (Ang ingon ni Pablo, "Awata n'yo ako, maingon nga ginaawat ko si Cristo.")

Karon ginadayeg ko kamo, mga igsoon, tungod sa inyong paghandum kanako sa tanang mga butang, ug ginabantayan ninyo ang mga pagtulon-an, ingon sa akong pagbilin . . . nganha kaninyo.

Apan buut ko nga hibaloan ninyo, nga ang ulo sa matag usa ka lalaki mao si Cristo; ug ang ulo sa babaye mao ang lalaki; ug ang ulo ni Cristo mao ang Dios.

⁷⁵⁶ Kita n'yo na kung unsa kini? Ang Dios, si Cristo, ang lalaki, ang babaye. Karon:

Ang tagsatagsa ka lalaki nga magaampo o magatagna, nga may pandong sa iyang ulo, nagapakaulaw kang Cristo.

Apan ang tagsatagsa ka babaye nga magaampo o magatagna nga wala magpandong sa iyang ulo nagapakaulaw sa iyang ulo: . . .

757 Karon mobasa pa kita sa makadiyut lang, ug ipakita ko kaninyo nga ang buhok sa babaye mao ang iyang pandong:

...kay ang...sama ra nga kiniskisan ang iyang ulo.
(Nagapasabot kana nga kung—kung putlan man niya ang iyang buhok, nan pakiskisan niya na lang kini.)

Kay kon ang babaye dili man magpandong, nan kinahanglan putlon na lang niya ang iyang buhok:
(ang pagpapatol nagapasabot og pagpakiskis, kita n'yo)...*apan kon makauulaw man alang sa babaye ang pagkainalutan o pagkakiniskisan og ulo, nan magpandong siya.*

758 Karon paingon na tà dinhi sa pangutana nga inyong gipangutana. Kita n'yo? Bueno, karon sayup para sa usa—usa ka babaye nga putlan niya ang iyang buhok, sumala sa Biblia. Karon paminaw mo niini mismo ug tan-awa n'yo kung ang Biblia dili ba nagahatag sa usa ka lalaki og legal nga katungod para bulagan ang iyang asawa kung putlan man sa babaye ang buhok niya, hibaloa n'yo kung husto ba kini o dili.

Kung ang lalaki...Kay sa pagkamatuod ang lalaki dili angay magpandong sa iyang ulo (kana mao, ang magkaaduna og hataas nga buhok), *kay dagway ug himaya siya sa Dios: apan ang babaye mao ang himaya sa lalaki.* (Nahunahuna n'yo ba kana?)

759 Karon gusto kong mohunong úna dinhi, tungod kay gusto ko nga motuhop gyud kini og ayo, kita n'yo. Ug karon timan-i n'yo, nakakita na ako og napulo ka linibo nga mga hiligugmaong babaye (ngani duna ko'y mga kaila sa ilaha karon, ug daghan kanila ang ania dinhi sa simbahan) nga may mugbo og buhok, nga mga Cristohanon. Ug wala ko kamo ginabasol, tungod ingon-ana man ang pagkatudlo sa inyo. Kita n'yo? Ingon niana. Wala sàb kamo sultihi niini sa inyong magwawali. Apan kung aduna ma'y mga babaye nga taga dinhi mismo sa tabernakulo ang ingon niana, nan sad-an gyud sila. Kita n'yo, tungod kay siguradong ginasultihan man namo sila mahitungod niini.

760 Karon, karon matikdi n'yo kini:

...ang lalaki...Kay... (ika-7 nga bersekulo)...Kay ang lalaki...

761 Karon, si kinsa man kining nagasulti dinhi? Bueno, usa ka higayon may usa ka gining nga miingon, “Oh, si Pablo usa man gud siya ka madulomtanon sa mga babaye.”

762 Bueno, karon samtang ania pa kita niini nga hisgotanan, moabli sà kita dinhi sa Mga Taga-Galacia 1:8, ug hibaloon kung unsay ginaingon ni Pablo mahitungod niini, kita n'yo, sa Mga Taga-Galacia 1:8. Mahibaloan ninyo nga miingon si Pablo dinhi sa Mga Taga-Galacia 1:8:

. . . bisan kon kami, o usa ka manulonda nga gikan sa langit, magawali og lain nga maayong balita gawas niining inyo nang nadungog, ipatunglo siya.

763 Karon ayaw ko ninyo basula, basula ninyo Siya, kita n'yo.

Kay sa pagkamatuod ang lalaki dili angay magpandong sa iyang ulo, kay dagway ug himaya siya sa Dios: apan ang babaye mao ang himaya ug dagway sa lalaki.

764 Karon matikdi n'yo ang sunod nga bersekulo:

Kay ang lalaki wala buhata gikan sa babaye; kondili ang babaye hinoon gikan sa lalaki.

Ug ang lalaki wala usab buhata alang sa usa ka babaye; kondili ang babaye hinoon gibuhat alang sa usa ka lalaki.

765 Karon, buut kong isulti kini karon nga may tinuod nga gugma ug pagkamalulot, ug nagalaum ko nga masabtan n'yo unta kini sa paagi nga isulti ko kini. Apan ang Amerika . . . Ingon nga nagabiyaha ako sa tibuok kalibutan, ang Amerika ang dunay pinaka talamayon, og dautan nga mga kalagdaan para sa ilang mga kababayan-an kaysa unsa mang nasud sa kalibutan. Ang Paris, France sàb mahimong mosunoray sa Amerika paghisgotan na ang bahin sa pagpanglihok sa ilang mga kababayan-an. Kaulawan gayud!

766 Naamgo ba ninyo nga ang dios-dios sa Amerika babaye? Mapamatud-an ko kana kaninyo pinaagi niining Biblia. Tinuod. Naamgo ba ninyo nga kinahanglan kining mamaingon niana aron mapasulod sa iglesiang Katoliko ang ilang doktrina mahitungod sa birheng Maria?

767 Karon, kung ang babaye wala gibuhat alang sa lalaki, wala . . . Kung ang lalaki wala gibuhat alang sa babaye, kondili gibuhat hinoon ang babaye alang sa lalaki, kung ingon niana nganong ginasimba man ninyo ang babaye? Kita n'yo? Bueno, ang nagpahinungdan niini, misugod kini sa Paris ug miabot dinhi sa Hollywood. Ngani karon ang Paris na ang nagaanhi sa Hollywood aron mokuha og ilang mga modelo ug mokuha og mga urog ug mga ingon-anang butang, tungod kini sa pagkadautan sa atong mga kababayan-ang Amerikano.

768 Unsa man kini? Ang atong nasud nahimo nang ingon gayud ka ubos hangtud nga giilog na nila ang mga trabaho nga iya sa lalaki, ug mga kababayan-an na ang gipahimutang sa niini nga mga puwesto, og hangtud nga nubenta porsyento kanila, halos, mga bigaon na. Ug kung hisgotan ang mga kalalaken-an nga wala na'y mga trabaho, tinuod, tungod kay mga kababayan-an na man ang ilang gipangpuli dinha sa mga trabaho nila. Ug sila'y nahimo nang ingon ka talamayon tungod nga nagpahimutang na man sila og mga babaye nga mao'y mahimong mga tigpanalipod

sa kalinaw diha sa kalsada. Kaulawan gyud kana sa unsa man nga nasud! Oo, sir. Unsa ma'y inyong buhaton niana?

⁷⁶⁹ “Unsa ma'y imong buhaton niana, Igsoong Branham?” Kinahanglan kong tahuron kana, tungod usa man ako ka lungsoranon sa Amerika, buhaton ko gihapon ang ginasulti sa lider nga pagabuhaton. Kung ako'y . . . Kung ang usa—kung ang usa ka pamilya mawad-an na og pagtahud para sa pamilya (ang mga anak mawad-an na og pagtahud sa ginikanan), nan bungkag na kana nga pamilya. Kung ang usa—kung ang usa ka simbahan mawad-an na og pagtahud sa pastor niini, aba, wala na kana nga simbahan. Ug kung ang usa pud ka nasud mawad-an na gani og pagtahud sa Kinatas-ang Hukmanan ug sa desisyon niini, nan napukan na kana nga nasud. Eksakto gayud. Mao nga kinahanglan gihapon natong tahuron ang maong mga butang tungod kay sila man ang lider, kita n'yo. Apan dili gyud kana husto sa sinugdanan. Mao gyud!

⁷⁷⁰ Kabalo ba mo nga ang lalaki sa Biblia . . . sa Genesis, sa ika-1 nga kapitulo, sa dihang gilalang sa Dios ang babaye ug—ug lalaki, ug gibuhat ang lalaki ug babaye, gisultihan sa Dios si Eva nga “Ang imong bana mao'y mangulo kanimo, ang mahimo mong tigpangulo”? Pero isulti kana sa Amerika ug tan-awa kung unsa kaha'y madangatan nimo! Aba, pero dili na ingon niana, tungod ang babaye na man mao'y nangulo sa lalaki; sila na ang nagapangulo, ngani ang pangpubliko nga mga lugar nakahanay na man . . .

⁷⁷¹ Kung kinahanglan ko mang buhaton, mahimo kong dalhon dinhi ang mga kababayen-an, nga akong nahinabi dinha sa akong lawak, dinosena nga disente nga mga kababayen-an . . . hinoon wala ko nagaingon nga ang tanang mga babaye dili na gyud puedeng motrabaho usahay; tungod basin man gud og dunay sakit ang ilang bana o unsa man, ug mao nga gikinahanglan nilang motrabaho. Apan kung dili man nila gikinahanglan, nan dili na sila kinahanglan pang motrabaho. Ang ilang lugar anaa man sa panimalay, sa ilang gamay'ng palasyo, dinha mismo sila eksaktong nahiangay.

⁷⁷² Pero ang atong mga kababayen-ang Amerikano nagkaaduna na man hinoon og pribilihiyo nga manggawas ug magkinabuhi nga mauswagon o mamatay. Bisan sa tanang mga hayop ug uban pa, pag mopatigbabaw kana nga butang, nan mahitabo gyud kini ug ginaus-us niini ang tibukaliwatan.

⁷⁷³ Adunay usa ka gamay'ng langgam didto sa Africa, ug usa kini ka gamay'ng langgam nga ginatawag og pick.

⁷⁷⁴ Karon, kasagaran, ang babaye sa kanunay ang pinakamaut sa duha. Ang laki gyud sa kanunay ang pinaka matahum, ang laking lagsaw, ang laking lagsaw'ng-elk, ang laking pheasant, ang—ang laking manok, ug sa kanunay mao ang pinaka . . . Tungod kay, ang babaye mao man ang langgam nga balaynon.

Nagalumlom ra siya diha sa pugaran, og ginaatiman niya ang iyang mga piso. Ngani nagatago siya gikan sa banog, sa bitin, sa lobo, og unsa pa man, aron atimanon niya ang iyang mga piso.

⁷⁷⁵ Apan sa kaliwat kon diin ang. . . o sa sekso nga—nga—nga ang tawong babaye, o ang babaye, ang mas maanyag, mao kana sa kanunay ang ubos nga matang. Didto sa Africa, ipananglitan tà ang usa ka langgam. . . Aduna didto’y usa ka gamay’ng langgam, ug ang bugtong langgam sa tibuok kontinente nga nasayran ko, nga ang babaye ang mas matahum kaysa laki. Ug pag ingon niana. . . Kana—kana nga langgam usa gayud ka bigaon. Magsige siya’g lupad-lupad ug mangita og lakeng langgam, ug moadto didto ug mangitlog na dayon human nga makaipon niya ang maong lakeng langgam, ug ipalumlom sa maong lakeng langgam ang mga itlog samtang siya maglupad-lupad na sab para mangita na pud og laing lakeng langgam. Eksaktong mao gayud kana. Kita n’yo? Nasabtan n’yo ba ang buut kong ipasabot?

⁷⁷⁶ Dinhi, karon matikdi n’yo, ang atong mga kababayen-an, dinhi sa Amerika. Dunay usa ka batan-ong lalaki nga taga Kentucky ang nagsulti sa ako, pipila na ka adlaw ang milabay, nga aduna kono’y walo ka gatus nga mga kababayen-an ang nagatrabaho sa usa ka pabrika didto sa Kentucky. Ug ingon pa siya, “Sigurado gayud nga mapanumpa ko nga ang upat ka gatus kanila bug-os gayud nga mga bigaon diha sa dalan, ug minyo na nga mga kababayen-an nga may mga anak na.” Ngani dunay usa ka lalaki kono nga gikuha ang iyang asawa didto ug gipusposan og tabla ang babaye, ug mora’g patyon na gud kono sa lalaki ang babaye. Ug aduna pa’y usa nga miadto sàb og gipusil ang usa ka lalaki. Ug dunay usa usab nga nangdunggab ug nangaway. Dili man unta angay’ng ingon niana. Dili gyud kana husto.

⁷⁷⁷ Mao nga ipabalik na ang babaye sa kusina kon diin siya nahiangay, dayon mamahimong okey na ang tanan. Apan kon ibutang n’yo siya dinha sa pangpubliko nga trabaho, nan mawala gyud siya. Bug- . . . wala ko nagaingon nga . . .

⁷⁷⁸ Pero ang mga kababayen-ang Amerikano mongisi ra ug moingon, “Wala Kana’y pulos.” Ug, “Ipakita mo diay kanako.” Sigurado gayud, siguradong ingon niana ang inyong buhaton, tungod kay gipanagna na man sa Biblia nga ingon-ana ang inyong buhaton. Mao nga buhaton gyud ninyo.

⁷⁷⁹ Ug dinhi kaniadto . . . Kaniadto, dugay na nga panahon ang milabay, diha sa iglesiang Methodist, kung putlan sa babaye ang iyang buhok, nan ipalagpot gyud siya sa iglesia. Tinuod gayud, ingon-ana ang ginabuhat nila kaniadto. Oo, mao gyud. Ang mga Nazarene, Pilgrim Holiness, mga Pentecostal, silang tanan ingon-ana man ang ginabuhat nila kaniadto. Pero unsa ma’y nahitabo?

⁷⁸⁰ Kabalo ba mo kung ngano? Aduna man gud kamo’y mga bayot sa luyo sa pulpito. Eksakto gyud kana. Mga tawo nga nahadlok nga basin ang ilang panginabuhian . . . nahadlok nga basin ipalagpot sila, og papahawaon sila sa iglesia. Tungod wala man sila’y igong kaisog nga mobarug, mobarug sa Pulong sa Dios bisan pa kon makapasakit Kini o dili Kini makapasakit. Mao gayud.

⁷⁸¹ Paminawa n’yo kini, ang lalaki mao man ang tigpangulo. Mao nga ayaw n’yo hunahunaa nga kamo ang mangulo sa panimalay. Dili kamo ang tigpangulo sa panimalay. Kamo’y bug-os gayud. . . Dili kamo ulipon ha, kondili usa kamo ka kaabag. Ug si Adan. . . Ang lalaki ang magabuot sa iyang asawa, ug siya ra ang manubag para sa iyang asawa. Papanubagon sa Dios ang lalaki tungod sa iyang asawa. Bueno, karon basaha n’yo ug hibaloa kung gisulti ba gyud kana sa Dios.

Kay sa pagkamatuod ang lalaki dili angay magpandong sa iyang ulo, kay dagway ug himaya siya sa Dios: . . .

⁷⁸² Ang Dios dili man usa ka babaye, ang Dios usa gayud ka Lalaki. Kabalo mo sa dihang gihimo nila ang birheng Maria ug tanan na, ug ang pagpanga- . . . o ang mga pagpangaliya ug tanan nang ingon niana, ug mag-ampo sa birheng Maria, kabalo ba mo kung unsay akong mahinumduman niana? Ang bantugang diosa kaniadto nga si Diana, nga gibadlong ni Pablo ug gihinginlan. Husto kana. Ingon siya, “Aba, ang Dios dili gayud babaye!”

⁷⁸³ Aduna man gud kono og usa ka bato nga nahulog sa umahan kaniadto, ug miingon sila nga gipakanaug kono sa diosa ang ilang rebulto, mao kana’y hinungdan nga ang mga kababayen-an sa Corinto, ug didtong dapita, ang . . . nga nanagsimba kang Diana, gusto nila nga mahimong mga magwawali.

⁷⁸⁴ Ingon sila, “Aba, gisulti man sa espiritu nganhi kanamo nga puede kaming magwali.”

⁷⁸⁵ Ingon ni Pablo, “Unsa? Diha ba kaninyo migula ang pulong sa Dios, ug kamo ra ba gayud ang mga naabot niini? Kung adunay maghunahuna nga siya espirituhanon o usa ka propeta, pailha siya nga ang akong ginasulti mao’y mga sugo sa Ginoo: ang babaye kinahanglan magpakahilum ug kinahanglan magpasakup sulod sa iglesia, dili magtudlo o magkaaduna og bisan unsa man nga pagbulot-an.” Eksakto gayud! Mao kana ang giingon sa Kasulatan. Kita n’yo? Ug papanubagon gayud sa Dios ang pundok sa mga magwawali tungod niana sa Adlaw sa Paghukom.

⁷⁸⁶ Bueno, paminaw! Moingon mo, “Bueno, sultihan tà ka, ingon-ana na man gud ang gikatudlo kanako.” Pero nasayod na gyud mo karon! Husto. Ngani kung ikaw o may usa ka tawo nga motumar og tambal, ug adunay moingon kanimo nga arsenic kana, ug ikaw—ug magpadayon gihapon ka ug imnon gihapon

kana bisan pa man, nan imoha na mismong sayup kana human nga nasultihan ka na. Kita n'yo?

787 Karon paminawa n'yo kini:

Kay ang lalaki wala buhata gikan sa babaye; kondili ang babaye hinoon gikan sa lalaki.

Tungod niining hinungdan ang usa ka babaye kinahanglan nga may timaan sa pagbulot-an diha sa iyang ulo tungod sa mga manulonda.

788 Aduna ba kaninyo ang nagabasa niini? Unang Mga Taga-Corinto, sa ika-11 nga kapitulo, ug sa ika-10 nga bersekulo. Kung inyong himatikdan, “pagbulot-an,” (Ngano man?) “sa mga manulonda,” Unang Mga Taga-Corinto, tungod kay ang mga manulonda tawo man, ang mensahero. Matikdi, gamay nga “m” na usab. Kung mga Manulonda ang hisgotan, nga Langitnong mga Manulonda, kini’y daku nga “M,” daku nga “M.” Pero kung gamay nga “m,” nan nagapahinungod kini sa mga tawong manulonda.

Bisan pa niini walay lalaki...o babaye,...walay babaye nga gawas sa lalaki—sa lalaki, diha sa Ginoo.

Kay maingon nga ang babaye gikan sa lalaki, ingon man usab ang lalaki pinaagi sa babaye;...ang tanang mga butang gikan sa Dios.

Maghukom...sa inyong kaugalingon: angay ba nga mag-ampo sa Dios ang babaye (nga may mubo nga buhok) nga walay pandong? (palandunga n'yo kini karon)

789 Karon matikdi:

Dili ba ang kinaiya mao man ang nagatudlo kaninyo, nga, kung ang lalaki may buhok nga hataas,...

790 Moingon mo, “Unsa man ang ginapahinungdan niana?” Buhok. Wala ba ninyo masabti ang ginasulti ni Pablo? Buhok, hataas nga buhok! Kung...Ang babaye kinahanglan nga adunay hataas nga buhok. Ika-14 na nga bersekulo karon:

Dili ba ang kinaiya mao man ang nagatudlo kaninyo, nga, kung ang lalaki may buhok nga hataas, kini mao’y usa ka kaulawan kaniya?

791 Nasabtan n'yo ba? Kaulawan para sa usa ka lalaki nga magkaaduna og hataas nga buhok, apan ang usa ka bab-... lugar man kana sa babaye. Gibuhat man sa Dios ang lalaki nga lahi sa babaye, sa sekso ug sa hitsura, ug sa tanan nang uban pa. Ang babaye usab dili angay’ng magsul-ob og bisti nga... Miingon ang Biblia nga, “Kung ang usa ka babaye magsul-ob og karsones o unsa man nga bisti nga iya sa lalaki, kini’y dulumtanan ug mahugaw ug malaw-ay nga talan-awon sa atubangan sa Dios.” Ug papanubagon gyud siya sa Dios tungod

niana. Kang kinsa man kamo magapatalinghug? Sa niining Biblia lamang!

⁷⁹² Ug magbagdoy-bagdoy kamo ug moingon, “Aba, siguro mora’g nindot man...makita ang mga kababayen-an nga magsul-ob og karsones.” Apan lahi man ang pagkabuhat kanila sa Dios, mao nga ang gusto Niya nga magbisti pud sila og lahi.

⁷⁹³ Ug ang ingon sa Biblia, “Kung ang usa ka babaye magsul-ob gani og bisti nga iya sa lalaki, dulumtanan kini.” Kabalo ba mo kung unsa ang *dulumtanan*? Kini’y “usa ka butang nga malaw-ay sa atubangan sa Dios.” Ug ang Gamhanang Jehovah Nga nagadungaw kaninyo ingon nga usa ka malaw-ay nga butang... Ug ang ingon sa Biblia... .

⁷⁹⁴ Ug kamong mga nagaingon... Ang pipila sa inyo nga mga hamtong nga babaye karon, og sa inyong mga anak nga dalaga, nga dise-otso, baynte anyos ang panuigon, nga ginapasagdan ra silang manggawas dinha nga nanagbisti og ingon niana!

⁷⁹⁵ Ug kamo, usab, nga mama! Kita n’yo? Pag manggawas kamo nga nanagsul-ob og mga karsones ug mga ingon-anang butang ug nagakinabuhi... ug manggawas dinha sa dalan, ug nanagsul-ob nianang mga bisti nga ginapanghimo nila sa karon, ug ang inyong mga hitsura nahimo nang daw sa kung unsa nga dili baya kamo angayan. Kita n’yo? Ug pag manggawas kamo dinha sa dalan nga ingon gayud ka mahilas, mahimong ingon gayud kamo ka inosente ug putli sa atubangan sa inyong bana ug tanan na, apan kung manggawas kamo dinha sa dalan ug dunay lalaki nga motan-aw kaninyo tungod kay gipasundayag n’yo ang inyong kaugalingon nga ingon niana, nan sad-an kamo, ug manubag gayud sa Adlaw sa Paghukom tungod sa pagpanapaw uban ang matag lalaki nga mitan-aw sa inyo nga nakaingon niana. Mao kana ang giingon sa Biblia.

⁷⁹⁶ Ang ingon sa Biblia, “Ang si kinsa man nga nagatan-aw sa babaye nga may pagkaibog kaniya, nakapanapaw na uban kaniya sa iyang kasingkasing,” ug sad-an gyud kamo ug mahimong... .

⁷⁹⁷ Pag moatubang na kamo ngadto sa Paghukom ug moingon, “Ginoo, nasayod Ka man sa akong kasingkasing; wala baya ko nakapanapaw, nagkinabuhi gyud ako nga matinuuron sa akong bana.”

⁷⁹⁸ Apan aduna man didto’y usa ka lalaki, adunay usa na usab, adunay usa pa, usa pa, og usa pa, kinse, baynte, traynta, kuwarenta sila nga moatubang didto og sultihan, “Sad-an sa pagpanapaw!” Ngano man? Mitan-aw man sila kanimo.

⁷⁹⁹ “Bueno, wala gyud ko’y unsa man nga kahilambigita niana.” Bueno, nganong gipasundayag mo man ang imong kaugalingon nga ingon niana? Sa dihang nagsulti kaninyo ang Dios nga dili magsul-ob niana, tungod nga dulumtanan gayud

ang pagbuhat niana, pero sige gihapon kamong nagapaminaw sa *Who Loves Susie?* O kung unsa ma'y . . .

⁸⁰⁰ Nasayod ba mo kung unsay nahitabo sa bana niadtong artista sa *Who Loves Susie?* sa iyahang bana? Nabasa na ninyo kadto sa mantalaan dinhi bag-ohay pa lang. Kaniadtong atua kami sa Casper, Wyoming, namantala kadto. Ug unsa gani ngalan sa lalaki? Kadtong lalaki nga . . . sa *We Love Susie*, o unsa man—unsa man gyud kana? Ang . . . Oh, ang hinungdan nga nagapabilin ra kamo sa balay inig ka Miyerkules sa gabii ug nga dili na motambong og panagtigum sa pag-ampo aron lang motan-aw niana. Unsa gani kana? *We Love* . . . Unsa gani ngalan niana? [Nagaingon ang usa ka igsoong babaye, "*I Love Lucy*."—Ed.] *I Love Lucy*, ang iyang bana nga . . . nagaikyas-ikyas, pero nasakpan ra didto sa Reno, Nevada, nga dunay gikauban nga itum nga babaye, nga nakigpuyo sa maong babaye sulod sa pila na ka tuig. Ug mao kana'y hinungdan nga nagapabilin ra kamo sa balay aron motan-aw sa maong programa imbis nga motambong, og magpatalinghug sa Ebanghelyo. Miangkong na mismo ang babaye. Oh, kaloy-an unta! Wala gayu'y mahinlo kung anaa ka sa gawas ni Jesus Cristo!

⁸⁰¹ Panalanginan ang imong kasingkasing, igsoon, ako—sultihan ko kamo—kamo higala, ang pipila sa . . . Moingon mo, "Oh, grabe, tan-awa ba ang ilang matang." Ang pipila baya sa—sa pinakadautan nga mga buitre nga aduna kita, mga nagakaon og patay na, matahum baya kini nga mga langgam. Mao nga dili ka makahukom sa usa ka langgam pinaagi sa mga balhibo niini, kita n'yo. Busa timan-i n'yo kana. Oh, grabe!

⁸⁰² Karon matikdi:

Dili *ba ang kinaiya* . . . (sa ika-14 na kana nga bersekulo) . . . *mao man ang nagatudlo kaninyo, nga,* kaulawan para sa usa ka lalaki nga magkaaduna og hataas nga buhok? (Tungod iya man kana sa babaye.)

Apan kung ang babaye may buhok nga hataas, kana usa ka himaya kaniya: . . .

⁸⁰³ Karon unsa man kining ginasulti niya? Usa ba kini ka kalo nga ginasul-ob ninyo nga mga Katoliko sa sulod sa simbahan? Dili gayud! Usa ba kini ka gamay'ng pandong ibabaw sa inyong ulo, nga usa ka panyo? Ang ginapahinungdan niya mao mismo ang inyong buhok!

⁸⁰⁴ Karon! Ug kung putlan sa babaye ang iyang buhok, nan ginaputol sab niya ang iyang himaya, ug dili na katugotan nga moadto sa altar aron mag-ampo. Kita n'yo, sama lang sa gikaingon dinhi, "Angay ba para sa usa ka babaye nga mag-ampo nga walay pandong ang ulo?" Ginaingon pud dinhi, ang ingon, "Bueno, kinahanglan putlon na lang niya ang iyang buhok." Busa magpakiskis na lang siya kung ingon niana.

“Ug kung magpakiskis siya,” ang ingon, “pagpakaulaw kana, kaulawan para sa usa ka babaye nga buhaton kana.” Busa ang ingon, “Kinahanglan nga magpandong siya.” Bueno, ako lang—ako lang ginabasa ang sulat ni Pablo. Sa inyong tanan, anaa ra kini kaninyo, kita n’yo.

Apan kung ang babaye may buhok nga hataas, kana usa ka himaya kaniya: kay ang buhok gihatag para kaniya ingon nga igpandong.

⁸⁰⁵ Gikaingon ba nga pagahatagan siya og kalo? Kamong mga Katoliko o kamong mga Protestante, si kinsa man sa inyo, nga nagasimba ug gusto nga magsul-ob og kalo, moingon, “Bueno, mosimba baya ko, kinahanglan kong magsul-ob og kalo.” Dili, kinahanglan n’yo hinoon nga pataason ang inyong buhok. Mao kana ang kalahian. Kita n’yo?

. . . kay ang buhok gihatag para kaniya ingon nga igpandong. (Ug mao nga kaulawan para sa babaye nga mosulod sa simbahan nga walay pandong, og moadto sa altar aron mag-ampo.)

Apan kon ang uban daw sa—daw sa . . . (sa tan-aw ko mora’g dili nako malitok kini nga pulong, m-a-k-i-g-l-a- . . .) . . . *Makiglalis—makiglalis* (kabalo na man mo kung unsa ang makiglalis), *wala kita nianang batasana, bisan ang Iglesia sa Dios.*

⁸⁰⁶ Karon kung gusto n’yong makiglalis bahin niini, nan pakiglalis mo nianang Biblia. Sige, kung gusto n’yong makiglalis bahin niini, “Oh, wala man kana’y diperensya. Pasagdan na lang nato sila. Aba, sa tan-aw ko mora’g wala man kana’y pulos. Ako . . . Tungod dili man kini sa buhok, bisan pa, ang importante ang kasingkasing.” Tinuod bitaw; pero kung husto ang kasingkasing, nan mamahimong husto usab ang buhok (Uh-huh).

⁸⁰⁷ Sige padayon lang, kung gusto n’yong makiglalis, basta ang ingon ni Pablo, “Wala kita nianang batasana, bisan ang Iglesia sa Dios.” Miingon, “Kung gusto n’yong modapig kang Cain, bueno, padayon lang.” Apan Kini mao gayud ang ginaingon ni Pablo.

⁸⁰⁸ Oh, ug wala ko ginatuyo nga makatawa, tungod kay dili man kini butang nga kataw-anan. Apan sultihan ko kamo mga higala, kaulawan gayud nga makita ang paagi nga kining mga butanga gikatugotan ra nga buhaton. Ako . . .

⁸⁰⁹ Paminaw mo! Kamo, nga minahal kong mga igsoong babaye, gusto man nako nga pinakamaayo gyud ang inyong hitsura ug mahimo kamong pinakamaayo, angay pud nga ingon niana kamo. Angay ra nga ingon niana kamo. Ug kinahanglan nga kamo ingon gayud ka malumo ug makapahimuot ug tanan na kutob sa mahimo n’yo pag nagaabot ang inyong bana, sama ra kaniadtong uyab pa lang ninyo ang inyong bana. Ug kinahanglan nga sugaton n’yo siya sa may pultahan nga—nga mohalok kaniya

nga ingon ka tam-is sama niadtong adlaw nga mihalok kamo kaniya didto sa may altar aron mahimo ninyo nga bana. Husto. Dili ko kamo mabasol kon gusto n'yo nga matahum ang itsura ug maayo kaayo mamustora. Ug gusto man pud nako nga ingon niana kamo, nasayod ang Dios nga mao kana'y akong gusto.

⁸¹⁰ Dinhi usa ka higayon kaniadto, kaistorya ko si Jack Shuler. Kinsa ba ang nakadungog na kang Jack Shuler? Ang pinaka ilado nga magwawali sa Methodist. Ingon siya, “May usa ka babaye kono nga miduol ug . . . hugaw kaayo'g buhok, ug naga-usap-usap pa gyud og chewing-gum, ug siya'y halos hubo na, miingon kono, ‘Kabalo ka, dili na gyud ako dawaton sa akong bana.’”

⁸¹¹ Mitubag pud siya, “Dili ko siya mabasol.”

⁸¹² Husto kana. Karon, apan ang kinahanglan n'yong buhaton, gikinahanglan nga anaa kamo sa husto nga paagi. Ayaw n'yo awat-awata gikan sa Hollywood ang inyong katahum ug kaanyag, kondili awata ninyo kini gikan sa Biblia, sa atubangan sa Dios. Magmahimong usa ka tarung nga babaye, panaggawi kamo ingon nga usa ka maligdong nga babaye, pangbisti mo ingon nga usa ka gining, magmahinlo kamo. Managgawi ingon nga usa ka maligdong nga babaye, ayaw mo pagsul-ob nianang mga . . .

⁸¹³ Ang si kinsa mang lalaki nga tugotan ra ang iyang asawa nga mogawas ug nagasul-ob nianang mugbo nga mga bisti sa atubangan sa mga kalalaken-an, ug ang ingon nianang mugbong malaw-ay nga mga bisti . . . mogawas pa gyud diha sa nataran ug manghagbas kono og sagbot, ug mga ingon nianang butang, mister, sultihan tà ka, igsoon! Dili ko—dili ko tuyo nga mabagison, ako . . . nasayod ang Dios nga mao kini ang sa kasingkasing ko. Apan gikinahanglan kong . . . Gikinahanglan ko únang magbag-o gayud adisir kong pasundon ang akong asawa. Gikinahanglan kong mahimo nga tigpanguna dinha ibabaw sa bungtod kutob sa mahimo ko, nakita n'yo; ug kon dili man, nan mohawa na lang ko gikan dinha. Husto.

⁸¹⁴ Oh, igsoon, makauulaw ug kaulawan gayud para sa mga kababayan-an nga buhaton kana. Ug ako—dili ko tuyo, igsoong babaye . . . ako—dili ingon nga ginapakaubos ko kamo, kondili ginapaningkamotan ko lang isulti . . . Ang atong simbahan dinhi wala ma'y mga pagpamiyembro, nagapanambong lang dinhi ang mga tawo. Apan tungod nga kini'y balay man sa Dios, ug mao nga bug-os gyud namong ginasultihan ang mga tawo nga dili magsul-ob nianang mga butanga. Tungod kana'y . . . manubag gyud kamo tungod niana sa Adlaw na sa Paghukom. Karon matikdi n'yo dinhi. Ug pataasa n'yo ang inyong buhok, kita n'yo, ug magmahimong usa ka tarung nga babaye.

⁸¹⁵ Karon:

Apan sa . . . nagahatag ako kaninyo niini nga sugo wala ako magdayeg kaninyo, kay sa hinungdan nga nagatigum kamo para . . . dili aron molabi ang kaayo, kondili aron mosamot hinoon ang kadautan.

Kay una sa tanan, sa magakatigum kamo sa iglesia, hingdunggan ko nga may pagkabahinbahin kaninyo; ug uban pa, . . . (nahitabo kini kaniadto sa may lamesa sa komunyon)

⁸¹⁶ Karon paminawa n'yo Kini. Mao kana'y hinungdan nga ang mga manulonda . . .

⁸¹⁷ Karon, Igsoong Palmer, wala ko nagasulti kanimo sa niini nga teyp nga iwali mo usab dinha ang mao mismong butang nga akong ginabuhat dinhi. Apan nasayod ka gayud, ingon nga usa pud ikaw ka magwawali, nasayod ka nga Kamatuoran kini, igsoon. Oo.

⁸¹⁸ Busa ang *mga manulonda* dinhi “mga tawo.” Kung matikdan mo kini, Igsoong Palmer, gamay nga letra kini, ang “mga manulonda.” Ug nagpadayon pa ang Biblia. . . Nagahisgot na siya mahitungod sa lalaki ug sa asawa niini, kita n'yo, mao kana mismo ang hilisgotanan.

⁸¹⁹ Sa ingon nianang paagi nga nagakalibog gayud ang mga tawo sa Biblia, moingon sila, “Bueno, nagasulti man ang Dios og usa ka butang *dinhi*, ug usa . . .” Dili, kamo—mapahilayo hinoon kamo sa hilisgotanan. Pabilin lang mo sa mao mismong hilisgotanan, kana lang. Nagahisgot siya mahitungod sa lalaki ug sa asawa niini.

⁸²⁰ Karon usa pa ka butang ang gusto kong hisgotan sa dili pa kita magtapos, mogahin lang ko niini og mga dos minutos:

74. Asa man mahiadto ang mga balaan human sa usa-ka-libo-ka-tuig nga paghari? Ug unsa man nga matang sa lawas ang ilang maangkon?

⁸²¹ Sa tan-aw ko mao kana ang pinakamaanindot nga pangutana, gusto ko gayud kana. Karon diretso na tà niini mismo.

⁸²² Sa sinugdanan, ang Dios. . . Balikan sà nato ang atong pagtudlo mahitungod sa Hebreohanon sa pipila ka minuto. Ang Dios mao ang halangdong dakung Tuboran sa pito ka kolor. Pila man ang nasayod niana? Kita n'yo? Ug pila man ang nasayod nga ang Dios adunay pito ka Espiritu? Eksaktong, pito ka Espiritu. Ug aduna pu'y pito ka mga mata sa Cordero, ug uban pa, og magkasumpay-sumpay kining tanan karon. Kita n'yo? Bueno, mao kana ang Dios.

⁸²³ Bueno sa dihang Siya (ang Logos) migula kaniadto gikan sa Dios, nga mao ang Dios nga naggikan sa niining usa ka dakung tuboran paingon sa lawas nga porma sa usa—sa usa ka tawo; ug nahimo kadtong Logos, nga atong ginatawag nga theophany.

⁸²⁴ Karon, kung tan-awon n'yo ang theophany pagtan-awon n'yo kana, usa kana ka tawo. Karon ingon nga atong. . . Bueno, ingon niana kita sa sinugdanan. Karon, dili n'yo kini masabtan karon, apan ingon niana gyud kamo sa sinugdanan kaniadto. Sa dihang gibuhat ang tawo. . . Sa dihang gibuhat sa Dios ang tawo diha sa Iyang dagway, gibuhat Niya ang tawo nga usa ka theophany. Ug gipahimutang lang Niya ang tawo diha sa unod. . . Sa dihang gibuhat sa Dios ang tawo diha sa Iyang dagway, diha sa Iyang porma, sila'y. . . Sa Genesis 2, adunay. . . o Genesis 1:28, nagatoo ko nga mao kana, "Wala pa'y tawo nga magatikad sa yuta," ug human na kaniadto nga gibuhat sa Dios ang lalaki ug babaye. Husto kana, "Pero wala pa'y tawo nga magatikad sa yuta."

⁸²⁵ Dayon medyo gipaubos sa Dios ang tawo ug gipahimutang siya diha sa kahayopan, mao na kini nga lawas, nga sama sa mga hayop aron nga matikad niya ang yuta, og makahikap na. Ang theophany dili man gud makahikap, dili makakita, makatitlaw, makasimhot, ni makadungog; walay ingon niining mga sensya nga aduna kita. Busa gipahimutang sa Dios ang tawo diha nianang mas ubos nga kahimtang aron—aron makahikap ug makabati.

⁸²⁶ Ug—ug samtang nagalakaw ang tawo didto sa tanaman sa Eden, sa una ingon nga usa ka theophany (sama sa Balaang Espiritu nga ania karon nga nagalakaw dinhi), kadto ang nagapanguna sa mga kahayopan. Kontrolado niadto ang tanan-tanan, apan dili kadto makatikad sa yuta, kita n'yo. Busa gipahimutang siya sa Dios diha sa unod aron nga matikad niya ang yuta. Gihatagan siya og lima ka sensya, aron matikad ang yuta ug makatanum og—og mga kaparrasan ug—ug uban pa, ug pagkahuman mora'g nagmasulob—on man gihapon ang tawo. Oh, usa kini ka maanindot nga hulagway.

⁸²⁷ Ania, kay kaniadtong una nga gibuhat ang tawo, gibuhat man siya ingon nga duha ka tawo nga magkauban. Gibuhat siya nga parehong lalaki ug babaye, ang tawo. Miingon ang Biblia nga gibuhat siya nga ingon niadto. Gibuhat sa Dios ang tawo nga parehong lalaki ug babaye, "gilalang Niya siya." Matikdi karon, kaniadtong gihimulag ang tawo gikan sa theophany ug gipahimutang sa unod, siya'y—siya'y dili gyud nga kumpleto na; tungod duna pa'y bahin sa iyang pagkatawo nga theophany gihapon, busa mora gihapon og dili husto.

⁸²⁸ Ngani aduna na ma'y lalaki ug babaye sa baka, mao usab sa kabayo, ug aduna pu'y toro, ug mao usab sa tanan nang uban pa, nga pares-pares. Apan si Adan, siya. . . kaniadto. . . Kita n'yo, aduna gyu'y kulang. Kadto mismo nga tinguha nagapakita lang nga adunay kapikas nga nagahulat kaniya. Nasabtan n'yo ba kini? Ug ang hunahunaon mismo nga kinahanglan natong mamatay dinhi, nga kita nagakaguol ug nagakalibog, ug nga nagapangandoy kita alang sa usa ka Kinabuhi nga wala na'y

kamatayon, nagapakita lang nga nagahulat ang ingon niana kanato. Kita n'yo?

⁸²⁹ Ug tuod man nagmasulob-on si Adan. Ug ang Dios, aron ipakita nga dili sila mahimong bulagon . . . Karon balikan ko úsa kining mao gihapon nga butang, sa makadiyut lang.

⁸³⁰ Matikdi, ang Dios wala na miadto ug mikuha og abog aron magbuhat og usa ka Eva, kondili nagbuhat ra Siya gikan sa orihinal nga abog, nga si Adan. Mikuha Siya og usa ka gusok gikan sa kilid ni Adan ug nagbuhat para kaniya og usa ka kaabag, ug si Eva kadto. Gibuhat ang babaye alang sa lalaki, ug ingon nga kabahin sa lalaki. Ang babaye kabahin na sa lalaki sa sinugdan pa lang, sa paglalang, diha sa theophany. Ang babaye kabahin na sa lalaki dinhi niini nga paglalang. Mao nga dili mahimong ilahi siya sa usa na usab ka paglalang, kinahanglan buhaton siya gikan sa mao ra nga linalang.

⁸³¹ Mao kana eksakto kon ngano nga si Cristo ug ang Dios mao ra mismo nga Persona, og dili mahimo nga lahi. Kung usa lang Siya ka maayong tawo o kaha usa ka propeta, nan dili unta Siya nahimong Manunubos; kinahanglan nga Siya ang Mismong Magbubuhat. Apan usa gihapon Siya ka theophany karon, nakita n'yo, ug sama sa kung unsa Siya kaniadto.

⁸³² Bueno miabot dinhi ang tawo ug siya—maanindot siya; ug gusto sa Dios kadto, ingon Siya, “Maanindot kana, papuy-on sila sa yuta ug mabuhi hangtud sa kahangturan. Ingon niana; sa Eternidad, ug hangtud sa hangtud. Patuboon kini, ug ang matag tanum pamungahon, ug tanan nang ingon niana. Ug mabuhi ang tawo, ug mabuhi ang mga mananap, ug tanan nang uban pa, hangtud sa kahangturan. Maayo gyud kana.” Kita n'yo?

⁸³³ Ug dayon misulod ang sala. Ug buut kong mohimo niini nga pahayag. Sa . . . Daghang mga tawo ang nagakasayup gayud mahitungod sa niining usa ka Kasulatan, ug anaa kini sa ika-23 nga Salmo. Ingon niini ang pagkasulti nila Niini, “Oo, bisan magalakaw ako latas sa *mangitngit* nga walog sa landong sa kamatayon.” Bueno, wala ma'y ingon niana. Ang Biblia wala man nagaingon, nga, “Ang mangitngit nga landong sa walog . . . ang mangitngit nga walog sa mga landong sa kamatayon.”

⁸³⁴ Ang ginaingon, “Bisan magalakaw ako latas sa walog sa landong sa kamatayon.” Bueno, sa dili pa magkaaduna og landong, kinahanglan man nga adunay kahayag aron makahimo og landong. Kita n'yo, si David ingon nga usa ka propeta ug anaa ilalum sa pagdihog, wala siya nasayup, kondili gisulti lang niya ang Kamatuoran: “Oo, bisan ako . . .” dili nga, magalakaw latas sa *mangitngit* nga walog, kondili, “latas sa walog sa *mga landong* sa kamatayon.”

⁸³⁵ Busa kinahanglan nga adunay pipila ka porsyento nga kahayag aron makahimo og landong. Ug ingon niana sàb dinhi. Pareho kita nga natural ug supernatural. Ingon nga kining

lawasa napailalum man sa kamatayon, ug gihimugso pinaagi sa usa ka babaye; dili pinaagi sa kung unsa man kondili pinaagi sa . . . Dili pinaagi sa Dios, tungod kay mga kaliwat man kamo ni Adan ug ni Eva. Maitum, puti, o unsa man kamo, kaliwat kamo, mga anak kamo nga gikan kang Adan ug Eva. Kana ang nagapahimo sa inyong lawas nga “natawo sa sala, giumol diha sa kadautan, mianhi sa kalibutan nga nagapanulti’g bakak.” Mao nga tinunglo ug hinukman na kamo sa sinugdan pa lang sa inyong kinabuhi, wala ni, usa man lang ka kahigayonan.

⁸³⁶ Karon, tungod nga ang espiritu nga aduna kamo miabot kaninyo pinaagi sa kinaiyahan, ug pinaagi sa kinaiyahan nga gumikan sa pagpakighilawas, nga pangibog sa kalalaken-an ug kababayen-an mao nga dunay mahimugso nga usa ka yutan-ong bata. Ug kon pasagdan n’yo kanang maong bata, ug dili n’yo siya tudloan og unsa man nga husto, mopaingon gyud siya sa sayup. Bisan pa kon dili n’yo siya tudloan sa husto o sayup, ang sayup gihapon ang iyang pillion. Tungod kay kinaiyahan man niya nga buhaton ang ingon niana.

⁸³⁷ Matikdi n’yo ang usa ka gamay’ng bata, nga mga *ingon-niana* kadak-on, pag sapoton siya; siya gayu’y . . . iyang—iyang kumoton ang iyang mga kamot, ug mamula ang iyang nawong, ug moutong siya. Oo. Unsa man kana? Kinaiyahan niya kana. Nakuha niya kana sa iyang amahan o iyang inahan, o sa usa kanila; ang iyang inahan tingali’g dunay kainit sa ulo nga makig-away gyud nga grabe ang pagsupak, o kaha ang iyang amahan. Kung dili man sa ginikanan, basin sa iyang lolo o lola. Kita n’yo, sa kaliwatan man gud kana.

⁸³⁸ Busa kana ang nagapahimo . . . Nahimugso kamo sa kalibutan. Mianhi kamo pinaagi sa kinaiyahan, ug ang tibuok ninyong pagkatawo maitum ug mahugaw, ug hinukman na, ug tinunglo na, ug paingon mismo sa impiyerno. Mao gyud!

⁸³⁹ Apan kon natawo na kamo pag-usab, nan ang Kahayag sa Dios nagadan-ag niana nga kalag (alleluyah) dayon dili na kana usa ka mangitngit nga walog, kondili usa na ka walog nga may landong diha niini. Tingali’g nataptapan kamo niini nga unod, ug sa mga butang nga nakatabon sa atong nawong, apan aduna gyu’y igong Kahayag dinha. Ug sa umaabot nga adlaw ang Kahayag ug ang kangitngit kinahanglan gayud nga mahimulag! Ug pag nagadan-ag na ang kahayag, nagahawa na ang kangitngit. Ug sa diha nga mobiya na kita nga kauban si Cristo diha niana nga lawas, ang kangitngit ug ang kamatayon mawala na, ug motungha kita paingon sa hingpit nga Kahayag. Himaya sa Dios! Mao kana; wala na’y balatian, wala na’y kangitngit nga nakasagol dinha.

⁸⁴⁰ Pero sa karon aduna pa kita’y balatian ug kalipay, ug may maayong panglawas ug kusog, ug may *pagsulod* ug *paggawas*, ug *mga kadaugan* ug *mga kapakyasan*, ug may kalipay ug kagul-

anan, og uban pa. Bueno, usa lang man kini ka landong. Aduna man kita'y igong kahayag aron masayran nga aduna gayu'y Kahayag dinha; ug tungod ania pa man kita niini nga lawas, sa unod. Apan sa umaabot nga adlaw mobanagbanag gayud ang Adlaw. Mao kana ang higayon nga ang manulonda sa kamatayon maanaa na diha sa may tiilan sa higdaanan, mao kana ang higayon nga moingon ang doktor nga tapos na ang tanan; ug kining iya sa natural mahimulag na gikan sa supernatural, ug ang kahayag magabalik na mismo ingon nga Kahayag, ug ang kangitngit magabalik na ingon nga kangitngit. Dayon kining may-kamatayon pagailisan na og walay-kamatayon. Mao kana ang higayon nga kining may-pagkadunot pagailisan na og walay-pagkadunot. Mao kana ang higayon nga kining may-kamatayon pagailisan na og walay-kamatayon, ug gikan sa pagkalinalang nga napailalum sa panahon mamahimo na kitang linalang nga iya sa Eternidad. Dili ka na mahimong mopaingon dinha ingon nga bug-os ang kangitngit, siguradong aduna ka na'y kahayag diha sa kangitngit. Mao kana. Mao kana ang lawas nga inyong madawat.

⁸⁴¹ Unsa ma'y angay natong buhaton? Bueno, minahal kong balaan nga igsoong lalaki, minahal kong balaan nga igsoong babaye, sa wala pa ang pagkatukod sa kalibutan, kaniadtong gilalang ka sa Dios diha sa Iyang dagway, o gilalang ang—ang lalaki diha sa Iyang dagway, ug gilalang ang babaye diha sa dagway sa lalaki alang sa himaya sa lalaki, gibuhat Niya kamo nga usa ka theophany. Sama lang Kaniya, kaniadtong miingon Siya “Atong” ngadto sa mga linalang nga Iyang gibuhat, “buhaton Nato ang tawo diha sa Atong Kaugalingong Dagway, diha sa Atong porma, nga usa ka theophany.” Wala pa kaniadto nahimong unod ang Dios, Siya anaa pa sa theophany.

⁸⁴² Ug nakita Siya ni Moises kaniadto. Mituaw si Moises, “Ginoo, itugot nga makita ko Ikaw.”

⁸⁴³ Miingon Siya, “Adto ka didto ug pagtago sa bato, diha sa liki niini.” Ug si Moises miadto sa maong liki; ug sa dihang miagi ang Dios, may kilat ug dalugdog. . . Ug sa dihang miagi ang Dios, nakatalikod Siya nga ingon *niini*.

Ug miingon si Moises, “Likod kadto sa usa ka Tawo.” Alleluyah!

⁸⁴⁴ Si kinsa man Kadto? Ang Melquisedec nga mikanaug, ang Hari sa Salem, nga walay amahan o inahan, walay sinugdanan sa mga adlaw o katapusan man sa kinabuhi. Siya kadto! Ug mikanaug Siya. Kadto Mao ang nagpakigsulti kang Abraham; nga nagporma para sa Iyaha og gamay'ng lawas nga unod nga ingon niadto, ug “Whew!” gihuyop kadto, misulod niadto, ug mikanaug ug mikaon og karne sa usa ka nating baka, miinom og gatas gikan sa baka, ug mikaon og mantekilya ug tinapay nga hinimo sa mais. Ug ang duha ka Manulonda.

⁸⁴⁵ Ug sa dihang miadto na sila didto, ug ang tanan niadtong mga butanga basta na lang, “Whew!” nahanaw ug nawala.

⁸⁴⁶ Ngani wala nako nahunahuna kana. Dinhi usa ka higayon kaniadto, sa pagkarga ko og bala sa pusil, aduna man ko’y .22 nga riple, usa ka .220 nga ripleng Swift. Ug sa inyo nga mga kaigsoonan dinhi nga mahilig pud og pusil nasayod man mo niini. Ang gamay’ng bala, kuwarenta’y-otso ang kabug-aton niadto nga bala, nga mga ingon *niana* ka taas, regular nga .22 nga bala. Ginakarga kadto sa usa ka sudlanan og pulbora nga halos .30-06. Bueno ako. . . Pero sa pabrika ginakarga lang kadto nga may kakusgon nga mga kuwarenta’y-kuwatro ka gatus ka piye kada segundo. Oo, pero puede man kono nga magkarga ka og igong. . . ikaw mismo ang magkarga, ug puede nimong ikarga kadto nga bala nga dunay kakusgon nga lima ka libo ka piye kada segundo. Ug—ug kung dili man, kung nagapamusil ka’g. . . Namusil kami, niadtong miaging adlaw, nga may duha ka gatus ka yarda ang kalay-on, ug pag moigo ang bala diha sa yuta, manglupad na gani ang yuta sa dili pa madungog ang paglanog sa pusil. Ingon niana ka paspas.

⁸⁴⁷ Dayon pagkuha gani og igpangiki (kabalo na mo, ang lapad nga bahin sa igpangiki) ug ituslob kana sa pulbora ug lukopa kana’g pulbora, nga mga upat o lima ka gagmay’ng lugas, ug ibutang kana diha sa ibabaw niana, ug dayon ibutang ang bala dinha. Motindog ka dinhi, ug aduna ka na’y bala sa imong kamot dihadiha dayon. Ug pabuthon kana ngadto sa ground hog nga may duha ka gatus ka piye ang kalay-on gikan kanimo, ug ang ground hog wala na gani nakalihok. Nagabalik man gud ang bala ngadto sa orihinal niini nga porma, nagabalik sa pagka-gas. Pananglitan aniyang usa ka bala nga gisagol nga tumbaga ug tingga, ug wala pa’y usa ka segundo, nagabalik kana nga dili na gyud nimo makita pag-usab. Mibalik kana ngadto sa kung unsa kana kaniadto usa ka gatus ka bilyon ka tuig ang milabay, nagabalik sa pagka-gas. Ang maong mga gas kinahanglan na pud nga moporma ug mobalik ngadto sa pagka-tumbaga ug pagka-tingga, ug uban pa, nga sama niana. Kana nga mga gas kinahanglan nga molugdang.

⁸⁴⁸ Bueno, mao kana. Ingon niana usab kita dinhi, gikan kita sa mas hataas nga linalang. Sa sinugdan kaniadto anaa man kita diha sa dagway sa Dios. Ang taptap ug ang kangitngit lang ang padayon nga nagababag kanato nga masayran kana sa karon. Apan gisultihan man ni Jesus ang Iyang mga tinunan nga Siya “kauban na kanila sa wala pa ang pagkatukod sa kalibutan.” Kita n’yo? Kita usab! Dili pa ninyo masayran kana sa karon, apan ingon niana usab kamo sa sinugdan pa lang. “Ug kung kining yutan-on nga tabernakulo matun-as man, aduna na kita’y usa nga nagahulat!” Alleluyah! Ug dayon mosulod kita sa niini nga theophany, nga atong gikapuy-an kaniadto, aron nga makakaon kita ug makalamano. Ug ang mga kalag

nga anaa ilalum sa halaran nanagtuaw, “Unsa pa ba ka dugay, Ginoo?”

⁸⁴⁹ Aduna ma’y pito ka ang-ang paingon sa Dios, ingon nga adunay pito ka Espiritu sa dihang—sa dihang mikanaug Kini. Bueno, pagmoadto ka ilalum sa halaran sa Dios, nanagtuaw sila, “Ginoo, unsa pa ba ka dugay? Mahimo na ba kaming mobalik, sa ubos dinhi?”

⁸⁵⁰ Miingon ang Dios, “Diyutay pa nga panahon, hangtud nga ang inyong mga isigkalungsuranon magaat usab sa mao rang butang nga inyong giantus.” Kita n’yo?

⁸⁵¹ Ug dayon ang maong mga kalag magabalik, ug mamahimo sila nga kalalaken-an ug kababayen-an pag-usab, ug mabuhi hangtud sa kahangturan pag ang tanang kangitngit ug kamatayon ug balatian ug kagul-anan sa kangitngit mahanaw na; wala na’y landong, kondili bug-os gayud nga kahayag na sa adlaw!

⁸⁵² Paminaw mo. Ania. Pasagdi nga mahimong ingon na gayud ka mangitngit; tungod dili na mongitngit og ayo pag bungkagon na sa adlaw ang matag tipik sa kangitngit. Ang kangitngit ug kahayag dili man puedeng mag-uban og dugay. Kay ang. . . Unsa ba ang pinaka gamhanan? Ang kahayag. Ug pag nagadan-ag ang kahayag, nagahawa na ang kangitngit. Amen. Wala ba mo malipay? Wala ba mo malipay nga kamo nasayod na? Walay pagduhaduha, nga wala na gayu’y landong sa kon asa man. Tungod kining mapanalanginong Kahayag nga ania mismo sa atong mga kasingkasing karon, mao man ang usa ka butang nga nagapamatuod: ang Anak sa Dios, ang gahum sa Dios.

⁸⁵³ Ug ngani nagatambong man tà dinhi, nga nasaksihan ang gahum sa Balaang Espiritu nga nagakunsad ug nagaabot sa panagtigum, ug nagaingon, “Ikaw si Mrs. *Ingon-ani-ug-ingon-ana*, nakabuhat ka og *usa* ka butang, sa *usa* ka lugar. Nagaantus ka niini sa *ingon-ani* na ka dugay, apan MAO KINI ANG GINAINGON SA GINOO, ‘Tumindog ka, giayo ka na.’” Ug makatindog na ang mga bakul ug mga buta. Ug ang landong sa usa ka tawo, nga giut-ot na sa kanser, makabangon na nga may kabaskog ug may maayo na nga panglawas pag-usab.

⁸⁵⁴ Walay pagduhaduha, nga miingon si Jesus, “Kining mga butang nga Akong ginabuhat, pagabuhaton usab ninyo.” Ug ingon Siya, “Dili Ako magabuhat sa bisan unsa hangtud nga ipakita kanako sa Amahan.”

⁸⁵⁵ Unsa man kana? Kana mao ang Kahayag nga mianhi og misagol sa niining kangitngit, nakita n’yo, aron tuboson kita. Nasabtan n’yo ba ang buut kong ipasabot?

⁸⁵⁶ Bueno, sa umaabot nga adlaw mobalik kana didto, ug dayon sa diha nga ang theophany mahimo na pag-usab nga walay-kamatayon nga unod sama sa kung unsa kini sa sinugdan kaniadto, nan moabot si Jesus, ug ang Dios. . . pag si Cristo

mamahimong usa na. Si Cristo magalingkod na sa Trono, ug ang tanang katawohan mamahimo na nga tawo. Si Cristo maanaa na sa Trono ni David, ingon nga usa ka Tawo, ang Ginoong Jesus; nga dili gayud mamatay. Dili na kita mamatay, dili na kita magmasakiton, dili na magkaaduna pa og mga kasub-anan, ug mabuhi kita sa usa ka libo ka tuig.

⁸⁵⁷ Ug pag matapos na ang usa ka libo ka tuig dinhi sa yuta, nan motungha balik ang yawa; ug mahitabo na ang ikaduhang pagkabanhaw, ang pagkabanhaw sa mga dili-matarung. Tigumon nila ang daghang kasundalohan nga sama sa gidaghanon sa balas sa dagat, ug motungha sila aron palibotan ang kampo sa mga balaan, ug pagmahitabo na kana, magpaulan ang Dios og kalayo ug asupre gikan sa langit ug laglagon sila.

⁸⁵⁸ Ug ang ingon ni Juan, “Nakita ko ang usa ka bag-ong langit ug usa ka bag-ong yuta, kay ang unang langit ug ang unang yuta nangahanaw na man, ug ang dagat wala na. Ug ako, si Juan, nakita ang Balaang Siyudad, ang Bag-ong Jerusalem, nga nanaug sa Langit gikan sa Dios, nga naandam ingon nga usa ka pangasaw-onon alang sa iyang bana.” Mao kana.

⁸⁵⁹ Dinha ingon siya, “Ang asawa...Ang Cordero ug ang Pangasaw-onon mamaatua didto hangtud sa kahangturan.” Magkaaduna og usa ka bag-ong yuta, nga minilyon ug minilyon ka milya kwadrado. Oh, pagkanindot. Ang Siyudad, ang pagsukod sa Biblia sa maong Siyudad kinse ka libo ka milya kwadrado. Kana’y kinse ka libo ka milya ang katas-on, kinse ka libo ka milya ang kalapdon, ug kinse pud ka libo ka milya ang kahabogon. Ingon niana mismo ang paghulagway sa Biblia mahitungod sa maong Siyudad. Dili ikatingala nga wala na’y dagat, tungod wala na ma’y luna para niana.

⁸⁶⁰ Oh, pagkaanindot gayud niana! Ug didto, adunay usa ka tuboran didto mismo sa Trono sa Dios, nga nagadagayday sa atubangan sa Trono. Aduna pud didto’y usa ka kahoy sa isig ka kilid sa punoan...sa sapa sa Kinabuhi. Ug sa niini nga kahoy anaa ang dose ka matang sa bunga, ug nagapamunga kini matag bulan.

⁸⁶¹ Atua didto ang kaluhaan ug upat ka mga anciano. Atua pud ang Pangasaw-onon. Atua sàb ang kap-atan ug upat ka libo, ang mga eunoco sa templo. Oh igsoon, aduna gyud ta’y paingnan nga dapit! Ang maong mga butang anaa na sa unahan alang kanato. Ang upat...Ang kaluhaan ug upat ka mga anciano. Ang usa ka gatus kap-atan ug upat ka libo nga mga eunoco. Ang Pangasaw-onon nga nagalingkod tupad ni Cristo. Pagkanindot gyud, paghisgotan...ang ako kanang Panimalay, maanindot nga Panimalay! Amen.

⁸⁶² Ang hunahunaon nga aduna ako’y pribilihiyo nga makaadto didto, ug kamo sàb adunay pribilihiyo nga makaadto didto. Pero nganong pilion man gyud ninyo nga magkinabuhi diha

nianang kangitngit ug walay makita nga Kahayag, ug mamatay ug mopaingon ngadto sa grabeng kaguliyang ug mamahimong wala'y pulos? Kay sa diha nga gamiton na sa Kahayag ang pinakataas nga awtoridad niini, wala na gayu'y lugar para sa kangitngit. Lakaw og pangitaa n'yo kung asa nagapaingon ang kangitngit pag nagaabot ang kahayag. Ingon niana gayud, pag ang tanang butang mahibalik na sa Dios. Ingon nga kining, kangitngit adunay sinugdanan, aduna pud ang kangitngit og katapusan. Pero ang kahayag wala gyu'y sinugdanan o wala gyud kini'y katapusan. Ang Dios wala man pu'y sinugdanan ni katapusan. Busa, sa umaabot nga adlaw, ang tibuok ngil-ad na kaayo nga kalibutan uban ang tanan niining sala ug kaanyag niini, kono, ug ang tanang kapritsohan niini ug mga sensasyon, ug ang tanang kamadanihon niini ug ang tanan-tanan niini mopaingon na ngadto sa pagkahanaw, ug mamahimong wala na. Mawala na gayud, og dili na mahunahuna pa! Gani, gikaingon man, "Dili na gayud kini madumduman pa."

⁸⁶³ Apan ang mga gipanalanginan sa Ginoo makauban na Niya sa kanunay. Magkaaduna kita og usa ka lawas nga sama sa Iyang Kaugalingong mahimayaon nga lawas; ug magkinabuhi na uban Kaniya, ug mokaon kauban Niya, ug molingkod kauban Niya, ug magapuyo kauban Niya hangtud sa kahangturan ug sa hataas kaayo nga panahon; ug sa Eternal nga mga kapanahonan nga magaabot pa sa kalibutan nga wala na'y katapusan.

⁸⁶⁴ Ug aduna kamo'y pagpili karong gabhiona. Kung dili pa kamo andam nga makita ang maong dapit, bisan pirmi pa kamong nagasimba, unsa pa kamo ka maayo nga miyembro, mangalaglag gyud kamo gawas kon ihatag kaninyo ni Cristo ang bag-ong Kinabuhi diha nianang kangitngit nga inyong ginalaktan. Mahimong relihiyoso kamo. Relihiyoso lagi, paminaw, mga higala, ang relihiyon pang-intelektuwal ra man. Kita n'yo? Ang tanang mga anak ni Cain sa kanunay aduna ma'y relihiyon. Ngani ang mga Judio aduna man pu'y relihiyon kaniadtong mianhi si Jesus, apan ila man gisalikway ang kaluwasan.

⁸⁶⁵ Tingali'g relihiyoso kaayo kamo karong gabhiona. Tingali'g Presbyterian kamo, Methodist, Pentecostal, Nazarene, Pilgrim Holiness. Tingali'g ingon kamo ka relihiyoso gayud; nagatambong mo sa inyong simbahan ug nagatestimonyo, tingali'g nagaawit ug nagasinggit ug nagadayeg kamo sa Ginoo, tingali'g ginadala n'yo ang inyong ikapulo ngadto sa iglesia, tingali'g ginatagad n'yo sa husto ang inyong silingan, pero wala gyud kana'y kahilambigitan ni usa ka butang sa inyong Eternal nga kapaingnan. Gibuhat man sàb ni Cain ang tanang ingon niana. Eksakto gayud.

⁸⁶⁶ Miingon ang Biblia nga "ang trigo ug mga bunglayan dungan nga nagatubo." Atua ang luoy'ng trigo, nga nagakauhaw sa ulan, ug ang—ang mga kadyapa usab. Pag-abot sa ulan, ang

mga kadyapa ingon man usab ka nalipay nga nakadawat og ulan sama sa trigo. “Apan, pinaagi sa ilang mga bunga, maila ninyo sila.”

Karon mag-ampo kita samtang ginasusi n’yo ang inyong mga bunga.

⁸⁶⁷ Karon, Amahan nga Dios, ingon nga adunay pipila ka malisud nga mga pangutana dinhi karong gabhiona. Mahimong wala nako nabuhat ang hustong butang, apan kutob sa akong nahibaloan; nasayod Ka sa akong kasingkasing. Ginaampo ko, Dios, nga dawaton Mo unta kini. Ug karon, tingali, ang pipila sa niining mga pangutana, kung wala ko man kini natubag sa husto, nan Ikaw na ang manulti sa kasingkasing sa mga tawo, ug Ikaw nang magtul-id kung asa angay’ng itul-id ang mga niini. Nabati ko man nga Ikaw ang nagsulti kanako. Apan kung nasayup man ko, nan pasayloon Mo unta ako.

⁸⁶⁸ Ug ginaampo ko, Dios, nga ang matag usa kanila dawaton unta kining mga butanga diha sa ilang kasingkasing, ug hinaut nga pamalandongan nila ang mga niini ug maghunahuna nga sama niini, “Oo, mao kana ang iglesia, ingon niana gyud kining mga butanga. Mao man kana ang gisulti sa Biblia.”

⁸⁶⁹ Tingali ang mga kababayen-an, Ginoo, nasayod Ka man nga wala ko’y unsa mang personal nga ginapahinungdan pag nagasulti ako kanila. Apan, Dios, ako—gihigugma ko gayud ang mga igsoon kong babaye, ug nasayod Ka niana, Amahan. Nasayod Ka sa kung unsa nga naghunahuna gayud ako para kanila. Apan ang mobarug ug sultihan sila og butang nga sayup, nan mamahimo akong usa—usa ka manglilimbong kanila. Dili ko tinguha nga mahimong manglilimbong sa akong mga igsoong babaye, kondili ginatinguha ko gayud nga sultihan sila sa Kamatuoran. Ug, Amahan, ginakuha ko man Kini gikan sa Imong Pulong.

⁸⁷⁰ Ug karon dili nako ginakondena ang akong mga igsoon, apan, Ginoo, ginasulti ko lang nga sayup gyud sila kon ipahanugot nila ang ingon niining mga butanga. Ug kung ang usa ka babaye nasayod na ug nagpadayon ra gihapon ug gibuhat ang ingon niana, nan anaa ra kana kaniya, dili na ang pastor ang sad-an.

⁸⁷¹ Abba Amahan, kining mga butanga Imoha man nga Pulong, ug sa Imoha gayud kini. Karon manulti Ka sa mga kasingkasing sa mga tawo. Ginatugyan ko silang tanan nganha Kanimo. Makita ko ang Imo nang gibuhat, Amahan; nasayod Ka. Manulti Ka sa matag kasingkasing. Nagapangamuyo kami sa Ngalan ni Cristo.

Ug samtang nakaduko ang atong mga ulo:

⁸⁷² Aduna ba kaha’y magpataas sa ilang kamot, og moingon, “Igsoong Branham, hinumdumi gyud ako aron mamahimo akong bug-os nga mananaug, ug nga sa kaulahiang adlaw masuk-ob ko

ang bisting pangkasal ug makauban si Cristo.” Mahimo n’yo ba nga ipataas ang inyong kamot, moingon, “Iampo ako”?

⁸⁷³ Ang tanan ipapabilin nga nakaduko ang inyong ulo karon, ug magduko lang. Panalanginan kamo sa Dios, maayo kana. Dinha, panalanginan kamo sa Dios, mga igsoon kong babaye; ug mga igsoon kong lalaki, usab, nga nagapataas sa inyong mga kamot. Maanindot kana.

⁸⁷⁴ Karon, Amahan, nakita Mo ang ilang mga kamot. (Nasayod ko, nga usahay nagahunahuna kamo, “Bueno, bisan diyutay lang nga pag-ampo nga sama niana?”) Dios, ginahunahuna ko ang mahitungod niadtong inahan, nga miingon kagahapon, “Sa diyutay lang kono nga pag-ampo didto sa iyang balay niadtong adlaw sa diha nga naghimalasyon na ang batang lalaki, og may tulo ka semana na lang nga mabuhi, tungod sa bukol sa utok, ug karon nausab na kono ang mga butang.”

⁸⁷⁵ Nahunahuna ko usab si Ezechias, nga ginasandig kaniadto ang iyang nawong sa may dingding, ug nagatuaw, “Ginoo, ako nagapangamuyo Kanimo, kaloy-an Mo unta ako. Hunahunaa ako, kay milakaw man ako sa Imong atubangan nga may hingpit nga kasingkasing.” Tungod niadto nausab gyud ang kamatayon ngadto sa kinabuhi.

⁸⁷⁶ Ngani usa ra ka singgit sa Anak sa Dios, “Lazarus, gula ngari!” ug migula mismo ang usa ka patay na nga lalaki.

⁸⁷⁷ Oh Dios, miingon man Ka, “Magsulti, mangayo, ug kini igahatag. Kung unsa man ang isulti mo, toohi nga mamatuman gayud kung unsa ma’y imong gisulti, nga maangkon mo kung unsay imong gisulti.”

⁸⁷⁸ Karon, Amahan, ginaampo ko nga ang matag usa nga nagpataas sa ilang kamot madawat gyud unta kung unsa man ang katuyoan nga gipataas nila ang ilang mga kamot. Ug hinaut nga mapanalanginan sila. Ug Dios, ginaampo ko nga Imong tabangan ang among mga igsoong babaye, nga sila mamahimong . . . manggawi sila nga tarung sa ilang mga kaugalingon, aron si Satanas pinaagi’g telebisyon ug *True Story* nga mga magasin ug uban pa, nga mapasagdanon ra kaayong ginamantala, ug mga programa nga wala man lang gipangtuki, kung unsa nga grabe na gyud ang kahugawan ug kalaw-ayan nga anaa sa mga telebisyon ug uban pa, nga mahimong . . . Puede unta nga mahimong usa ka instrumento aron makapangkabig og minilyon nga mga kalag nganha Kanimo, apan grabeng mga pagpasagad nga wala man lang gipangtuki ang mga niini, ug ginapasalida ra ang tanan niining mahugaw’ng mga butang nga ilang. . . Oh, makaluluoy gayud! Ug ingon nga hingsayran namo nga ang espiritu sa yawa nakasulod na ug ginapapalibotan na mismo ang among mga igsoong babaye, ug gapaninguha nga mapasunod sila sa urog ug mangbisti nga ingon niana.

879 Ug nahibaloan namo nga sa . . . sa among mga igsoong lalaki, usab, Ginoo, daw sa unsa nga ginahunahuna nila nga puede ra silang manigarilyo ug maghubog-hubog, ug kung unsa na lang ang ginapamuhat nga sama niana, ug mga Cristohanon gihapon kono tungod kay ginaingon man nila nga sila “nagatoo.” Ipahibalo kanila nga “ang yawa nagatoo man, usab.” Ug siya dili gyud luwas, “siya nga nagatoo ug nagakurog.”

880 Ug karon, Amahan, among ginaampo nga kaloy-an Mo unta kaming tanan, ug pasayloa kami sa among mga sala, ug tingali’g dunay pipila nga wala nagpataas sa ilang mga kamot, Oh Dios, malooy Ka sa gihapon. Hinaut nga sa sunod nga kahigayonan nila, hinaut nga ipataas na nila ang ilang mga kamot.

881 Nagaandam na kami nga mosalmot sa komunyon, Ginoo. Pasayloa intawon kami sa among mga kalapasan ug sa among mga nangagi sa kinabuhi. Ug hinaut nga madawat namo ang Imong panalangin, kay amo kining ginapangamuyo sa Ngalan ni Cristo. Amen.

882 Panalanginan kamo sa Ginoo. Pasayloa ko kon nalangan ko kamo nga ingon niini. Nahunahuna ko lang, sa dili pa magkomunyon, kung aduna ba kaha’y moduol aron maiampo, og nga gustong maiampo, bueno, malipay gyud kami nga buhaton kana niining orasa mismo, kung aduna ma’y gustong maiampo.

883 Sige, igsoon, dalha siya dinhi, maayo hinoon. Ug sa makadiyut lang, ug pagkahuman kita’y—magpapauli na kita. Ug dayon pag makapapauli na tà, kadtong mga gusto nga magpabilin para sa komunyon, mahimo ra nga magpabilin. Apan karon maghalad sa kita og pag-ampo alang sa mga may sakit. Unsa ba ang giingon sa Biblia?

884 Kung ang igsoong lalaki dili makatindog . . . Okey lang kana, palingkora lang siya dinha, kami na lang ang moduol sa iyaha. Okey lang kana, palingkora lang siya dinha mismo. Ug kami na ang moanha ug iampo siya. Okey ra. Sige, sir, palingkora lang—lang siya dinha mismo. Tungod malisud man para sa iyaha nga motindog pa dinhi, bueno, malipay man kami nga moduol nganha sa iya.

885 Karon gusto kong isulti kining usa ka gamay’ng pahibalo, minahal kong higala. Kita n’yo, ako—nasayod ko nga gipamatud-an na kini sa Ginoo sa makadaghan na gayud nga higayon. Kita n’yo? Dili gyud ako usa ka magwawali, wala gani ako’y edukasyon ug uban pa. Gihigugma ko lang si Ginoong Jesus, nasayod ang Dios nga gihigugma ko Siya. Apan ang usa ka butang nga gitawag ako para buhaton, mao ang mag-ampo alang sa mga may sakit. Nagatoo ba mo niana? Bisan sa wala ko pa nahibaloan ang mahitungod sa niini nga gasa, nagaadto na man ko kaniadto sa ospital; ug ngani akong mahinumduman ang mga nars nga moingon, “Karon mamaayo na ka.” Kita n’yo? Ug usa gayud ka butang, nga ang Dios nagmaloloy-on kaayo

sa ako nga ginadungog ang akong mga pag-ampo para sa mga tawo.

⁸⁸⁶ Nahunahuna ko, karong gabhiona, kung ihangyo man gyud, diha sa usa ka pangtibuok kalibutan nga pagsibya ngadto sa tanang dapit sa kalibutan. Ug moingon, ang tanan nga naiampo ni Igsoong Branham, pag-anhi mo, buut ko nga motubag kamo sa gobyerno sa Estados Unidos, pinaagi sa usa ka sulat. Ug ingon nga usa kana ka pangtibuok-kalibutan nga pagpasibya. Sa tan-aw ko, aduna siguro'y upat o lima ka milyon ka tawo ang motubag niana nga paghangyo kung maipahibalo man kana. Kita n'yo?

⁸⁸⁷ Ug kadto nga mga tawo, o ang pipila kanila mga patay na gani, nga gideklara na sa doktor, ug—ug sa embalsamador. Ang uban kanila namatay tungod sa mga disgrasya; ang uban pud kanila namatay sa natural nga kamatayan. Ang uban kanila mga buta, kimpang, piang, baldado, nanag-antus, may sakit sa pangisip. . . didto sa mga ospital, nga wala gani nakahibalo nga atua kami sa ospital aron iampo sila. Ginadala sila, gikinahanglan man nga dalhon sila didto. Nakigbisog aron lang sila makasulod ug nangasamdan pa, og wala gani nakahibalo kung asa na siya. Pero sulod sa singko minutos, nahimong normal na, nagbinuutan, mahiligugmaon nga mga tawo, ug husto na ang pangisip sa nahibilin nilang mga adlaw. Kita n'yo?

⁸⁸⁸ Kana'y. . . Unsa man kana? Dili kana si Igsoong Branham. Kondili si Jesus Cristo mismo, Iya ra akong gipadala aron iampo ang mga may sakit. Karon ania kung unsa. Dili kini nahimong ingon ka malampuson dinhi sa Jeffersonville, tungod kay, ania kung ngano. Karon, gusto kong masayran ninyo nga ania mismo niining siyudad ang pipila sa akong pinakasuo ug pinakamaayo nga mga higala. Bisan ang siyudad mismo, ang kahimtang sa siyudad, wala nako magustohi. Wala nako magustohi ang maong kahimtang, ug wala gyud nako magustohi sukad; ngani niadtong bata pa ako, samtang nagalingkod, nga nagabasa sa akong mga libro bahin sa kasaysayan, ingon ko, “Sa umaabot nga adlaw mobiya gyud ko dinhi.” Kita n'yo?

⁸⁸⁹ Dili ko ganahan sa Jeffersonville, tungod kalapokan man gud kini, dinhi dapit. Kalapokan kaayo, ug—ug dili gyud maayo dinhi. Saka gani mo dinhi ibabaw sa Spickert Knobs o kon asa man, ug dungawa n'yo ang New Albany ug Jeffersonville, kung gusto ninyo nga makita. Ania, ang mga doktor na mismo ang nagasulti ha, nga, “Ang mga tawo sa niini nga walog nagkaaduna na'y anemia tungod sa kahimtang dinhi.”

⁸⁹⁰ May usa ka gamay'ng babaye dinhi, si Mrs. Morgan, nga naayo na sa kanser, gidala niya ang iyang iro sa klinika dinhi, nagdahum man siya nga gikagid kadto. Kabalo ba mo kung unsa kadto? Tungod kadto sa mga hugaw nga gikan sa planta sa Colgates ug mga ingon-anang butang nga anaa na sa kasagbotan

kon diin kana mipaingon. Pinaka makadaut sa panglawas kini nga lugar.

⁸⁹¹ Duna pu'y usa ka lalaki nga anaa sa Kasundalohan, ang mianhi dinhi ug adunay. . . Aduna siya'y asthma. Pag-adto niya didto sa Florida ug nangitum man og ayo ang iyang mga mata, ug mao nga miadto siya sa doktor, ug ingon siya, "Doktor. . ."

⁸⁹² Miingon ang doktor, "Bueno, duna ka'y giaway, dili ba?"

⁸⁹³ Ingon siya, "Wala, sir oi, wala gyud."

⁸⁹⁴ Kung gusto n'yong masayran kung kinsa kini, Herby ang iyang ngalan. Karon, kung madumduman ko lang. . . Sa—sa Union National Bank diay, sa New Albany, usa siya ka teller. Adto lang mo didto ug pakigkita mo sa usa nga ang ngalan "Herby," pangutan-a n'yo siya.

⁸⁹⁵ Ug ingon siya. . . Miadto siya, ingon siya, "Doktor," ingon niya, "Aduna man ko'y sinus."

⁸⁹⁶ Ug gieksamin siya sa doktor, ang ingon, "Tinuod kana." Ingon pa, "Abi ko og nahilambigit ka sa usa ka away." Miingon, "Dong, asa diay ka nagapuyo?"

⁸⁹⁷ Ingon siya, "Tingali'g wala ka mahibalo sa lugar," miingon, "Nagapuyo ako sa usa ka gamay'ng siyudad nga tabok lang sa Louisville, Kentucky, nga gitawag og New Albany, Indiana."

⁸⁹⁸ Miingon, "Buut mo bang isulti kanako nga nakuha mo kining sakit sa sinus gikan niining tubig-dagat dinhi sa Miami, gumikan sa pag-anhi mo?" Miingon, "Kung mahimo mong mopuyo sa Jeffersonville, Indiana, o New Albany, Indiana, nan mahimo pud nimong mopuyo sa bisan asa man sa kalibutan kon diin ipadala ka sa kasundalohan sa Estados Unidos." Ingon-ana lang. Kita n'yo?

⁸⁹⁹ Mao kini ang lugar sa kalibutan nga pinaka makadaut sa panglawas, nga akong nasayran, gawas sa kalapokan ka na nga ginapuy-an og malaria. Kita n'yo? Ug ako—ako—ako—aduna man gyud ko'y mga higala dinhi.

⁹⁰⁰ Ania, mahimo ko gani nga hinganlan sila. Tan-awa n'yo si Dr. Sam Adair, nga akong higala. Oo, anaa pud si Mike Egan, nga nagalingkod dinha. Oh, my, pagkadaghan gyud sa akong mahinganlan! Gatasan mismo nga mga buutan kong higala, dugay ko nang mga higala, nga akong mga suod. . . Bisan unsa pa ka daghang bag-ong mga higala ang akong mahimamat, wala gyu'y makapuli sa usa ka dugay na nga higala. Nasayod mo niana.

⁹⁰¹ Anaa pud ang akong tigulang na nga inahan nga nagalingkod dinha sa luyo, dili na ingon ka daghan ang mga adlaw niya dinhi sa yuta, siya'y sobra na sa mga saisenta anyos karon. Anaa pud ang inahan sa akong asawa, setenta na, hapit nang magsetenta'y-uno; sa tan-aw ko, nagalingkod siya dinha sa luyo kon asa man, karong gabhiona. Ug dinha, gibiyaan na

siya. Ang akong amahan anaa dinhi gilubong; ang akong asawa gilubong pud dinhi sa Walnut Ridge; ang akong bata didto sàb gilubong. Nasabtan n'yo ba ang buut kong ipasabot?

⁹⁰² Ako—ako—dili nako gusto . . . ako—ako—ako—dili ko gusto nga magpabilin dinhi, ug nagatoo ko nga hapit na, sa gilayon kon mahimo, kinahanglan ko nang mobiya. Kita n'yo, tungod kay dugay na kining nagaabot kanako, ginasulti ko kini sa pulpito uban ang akong Biblia, sa kanunay.

⁹⁰³ Kaniadtong gisultihan ko ang akong asawa, sa dihang gihatag nila kanamo ang kuwarta para sa pagpatukod sa parsonage nga ako nang gitunol dinhi sa simbahan . . . Kining simbahan na ang nanag-iyà sa maong parsonage; anhi lang mo, og hibaloa kung mao ba gyud. Kita n'yo, dili man ko gusto nga angkonon ko mismo kadto.

⁹⁰⁴ Bueno, sa dihang ipatukod ko na kadto, miingon si Meda, “Gusto kong magpabilin ra dinhi tungod sa akong inahan.”

⁹⁰⁵ Ingon ko, “Honey, bisan gusto gayud nato, pero magmahay lang tà. Kita mo, dili gyud magsilbi. Ang ingon sa Dios, ‘Pahimulag ka,’ mao nga kinahanglan gyud nakong buhaton kini.”

⁹⁰⁶ Ug miingon, “Bueno, usa na lang ang akong inahan!”

⁹⁰⁷ Ingon ko, “Ang akong inahan, pud diay. ‘Apan ang tawo nga dili motalikod sa iyang mga minahal, ug mosunod Kanako, dili takus nga pagatawgon nga Akoa.’ Ug tinuod kana.”

⁹⁰⁸ Sa umaabot nga adlaw, sa dili madugay, mabati ko nga kinahanglan ko nang mobalhin, kanang, mobiya na. Apan ania ang hinungdan, dili man gud magsilbi ang mga panagtigum dinhi. Dili kini magsilbi kung ikumpara sa uban pa nga lugar, ug ang si kinsa man nga nakatambong na sa panagtigum nasayod gyud nga tinuod kana, tungod kay dinhi man kana sa kaugalingon kong lungsod. Mao kana.

⁹⁰⁹ Mao ra usab gihapon ang gisulti ni Jesus kaniadtong mianhi Siya.

⁹¹⁰ Ingon sila, “Kinsa man kini nga lalaki? Dili ba anak ra man kini sa panday nga taga dinhi? Unsa ba nga tulonghaan ang iyang gieskwelahan? Asa man niya nabatonan ang iyang nakatonan? Karon ipakita kanako nga nagabuhat ka . . . Ingon ka man nga nakabuhat ka na og mga milagro, nan ipakita kanako nga ginabuhat mo ang mao gihapon nga mga milagro dinhi. Ang gibuhat mo sa Capernaum, ipakita kanako nga buhaton mo ang ingon-niadto dinhi.”

⁹¹¹ Miingon si Jesus . . . “Natingala gyud Siya sa ilang pagkawalay-pagtoo.” Milingi Siya ug miingon, “Sa pagkatinuod, sa pagkatinuod, sultihan Ko kamo, ang propeta dili mahimo nga walay ganti gawas kon anaa siya taliwala sa

kaugalingon niyang mga tawo sa kaugalingon niyang lungsod.”
Tinuod ba?

912 Ug hingsayran nato...matikdi n’yo...Tan-awa n’yo si Finney, tan-awa n’yo si Sankey, si Moody; tan-awa n’yo si John Wesley, nga wala gyud nagmalampuson niadto, kita n’yo, gawas ra nga mibiya na siya sa iyang nasud. Matikdi—matikdi—si—si Moody. Sa dihang si Moody, usa ka sapatero nga taga Boston, kaniadtong dili na siya makapadayon, miadto siya sa Chicago adisir siya nahimong ilado. Kita n’yo? Gikinahanglan niya úna nga mahilayo sa kaugalingon niyang nasud. Ingon niana ang kinahanglan mong buhaton sa kanunay.

913 Apan karon, dinhi, tubagon ra sa Dios ang inyong pag-ampo kung hikalimtan n’yo nga si William Branham kini (Kita n’yo?), kung hikalimtan n’yo nga aduna og unsa man nga kahilambigitan niini si William Branham, kondili mibarug lang siya ug nag-ampo para kaninyo. Si Jesus Cristo kini mismo nga gibuhat na ang gipangamuyo ninyo nga mahitabo, kung motoo lang kamo niini. Kita n’yo? Wala kini’y unsa man nga kahilambigitan...wala ako’y unsa man nga kahilambigitan niini, kondili ang mahimo lang nga saksi. Apan ingon nga midaku ako dinhi uban kaninyo, ug nasayod kamo sa matag kaluyahon nga aduna ako, ug sa matag sayup nga nahimo ko... Ug nasayod pud mo kung unsay gibuhat sa Dios, dinhi mismo niining siyudara.

914 Ngani kining siyudara, sa Adlaw na sa Paghukom, manubag gayud og daku sa umaabot nga adlaw, tungod kay duna na ma’y gatusan ug gatusan ka mahimayaong mga pagpang-ayo dinhi mismo (Husto kana.), dinhi mismo. Mga ilhanan ug mga katingalahan, ug ang pagpakita sa Manulonda didtong dapita, ug gimantala pa sa mga mantalaan ug tanan na, pero sa gihapon ang mga tawo wala... Nganong ingon niana man?

915 Bueno sa umaabot nga adlaw, mobiya ako dinhi. Nagahunahuna ako: “Unsa kaha ang mamahimo kong katapusan? Nahuman na ba? Haduol na ba? Kuwarenta’y-otso anyos na ako. Nahuman na ba kaha kini?” Nagahunahuna gyud ko niini. Kung mao man...

916 Tan-awa n’yo, ngano man nga wala naila sa kalibutan kanang maong retrato dinha? Nganong wala man nila masabti kana sa gilayon? Nganong wala man nila masabti kining uban pang mga butang? Nganong wala man nila masabti kining mga propesiya ug mga ingon-aning butang? Kabalo mo, dili pa nila mahimo sa karon, apan usa ka adlaw mobiya man ako sa kalibutan, ug pagmobiya na ako, nan mao pa kana ang panahon nga maila nila Kini. Pipila sa inyo nga mga kabatan-onan ang makaamgo niini pag wala na ako. Kita n’yo? Apan dili pa man pahanugotan sa Dios nga mahitabo kini sa karon. Nasabtan ba

ang. . .nasabtan n'yo na ang buut kong ipasabot. [Blangko nga bahin sa teyp—Ed.]

⁹¹⁷ . . .Pulseras sa usa ka batang babaye. Basin aduna kaninyo ang nakapunit niini. Ug nagtoo ko nga miingon pud si Igsoong Sothmann nga nabilin niya kono dinhi ang usa ka Biblia niadtong ulahing higayon nga ania siya, sa hunahuna ko. Aduna ba kaninyo ang nakakita og Biblia, usa—usa ka Biblia nga nabilin dinhi? Kung aduna man, panag-iya kana ni Igsoong Fred Sothmann nga taga Canada. Karon mag-ampo kita.

⁹¹⁸ Ginoo, malooy Ka, samtang maanindot nga ginatugtog ang musika ug si Igsoong Neville mangpahid na og lana, ako usab magapandong og mga kamot diha sa mga may sakit sa Ngalan ni Jesus. Itugot kini, Ginoo, alang sa ilang kaayohan. Amen.

⁹¹⁹ Mag-ampo na ang tanan, karon, ang matag usa. Sige.

Ginoo, kining gamay'ng bata, samtang nagatindog dinhi ang iyang lolo para kaniya. Allergic siya sa gatas, sa tanang gatas. Apan Ikaw man ang may bug-os nga Gahum ug ang gamay'ng bata dili pa arang magkaaduna og pagtoo para sa iyang kaugalingon. Ug busa, Ginoo, nagkaaduna ako og pagtoo alang sa maong bata, uban ang sa mga ginikanan ug sa mga apohan ug nagaingon kami, sa Ngalan ni Jesus, nga kini nga bata makainom na og gatas ug mabuhi alang sa himaya sa Dios. Amen. Mamaingon niana gayud.

Oh Dios, nagaampo siya para sa iyang amahan. Nagaampo ako uban kaniya nga ayohon Mo unta ang iyang amahan ug ihatag kaniya ang iyang gikinahanglan, sa Ngalan ni Cristo. Amen.

⁹²⁰ Karon, yano lang dili ba? Nagaampo ang mga tawo, apan ang mga tawo. . . Pero ang ginatan-aw nila ang daku man nga butang ug ginahimo nila kining komplikado. Ginahimo ra man untang yano sa Dios. Pero ginahimo n'yong komplikado ug mao nga masayloan n'yo hinoon kini. Kita n'yo? Himoa lang. . .Himoa lang ninyo nga yano sama sa giingon sa Dios: “Kini nga mga ilhanan maganunot kanila nga nagatoo; kung pandongan nila sa ilang mga kamot ang mga masakiton, mangaayo sila,” sama sa gikaingon sa Dios.

⁹²¹ Ginapandongan namo og mga kamot kining babaye, Ginoo, kining among igsoong babaye nga nagatindog dinhi, ug hinaut nga mamaayo na siya ingon nga amo kining ginapangamuyo, sa Ngalan ni Jesus Cristo. Amen.

⁹²² Amahan, samtang ginapandongan namo og mga kamot ang among igsoong babaye, sa Ngalan ni Jesus Cristo, sa paghandum sa Biblia ug sa gitudlo sa Ginoo, hinaut nga mamaayo na siya.

Amahan, sa Ngalan ni Cristo, among ginapangamuyo ang kaayohan sa among igsoon, ug ginaampo ko nga hingpit Mo siya nga ayohon samtang ginatuman namo ang Imong Pulong,

wala gyud ni usa ka pagduhaduha sa akong hunahuna kondili mamahimo gyud siyang . . . ? . . . Amen.

⁹²³ Amahan, ginapandongan namo og mga kamot ang among igsoong babaye, ug ginapangamuyo nga, sa Ngalan ni Ginoong Jesus, ayohon Mo unta siya ug hingpit gyud siya nga ayohon. Amen.

Sa Ngalan ni Ginoong Jesus, ginapandongan namo og mga kamot ang among igsoong lalaki ug ginapangamuyo nga hingpit Mo siyang ayohon alang sa kahimayaan sa Dios.

Amahan, sa Ngalan ni Ginoong Jesus, ginadihogan namo ang igsoong babaye, ug nagapandong og mga kamot nganha kaniya ug nagapangamuyo alang sa iyang kaayohan sa Ngalan ni Jesus.

Amahan nga Dios, ginapandongan namo og mga kamot ang among igsoong lalaki, ginapangamuyo namo, sa Ngalan ni Jesus Cristo, samtang ginadihogan namo siya nga hingpit Mo siyang ayohon.

Amahan, ania, ang iyang minahal nga asawa . . . ? . . . ginadihogan siya ug ginapandongan siya og mga kamot, og ginapangamuyo kini, sa Ngalan ni Jesus Cristo.

⁹²⁴ Ginoong Dios, ginadihogan namo ang luoy'ng si Edith, ginapandongan siya og mga kamot, ug nagapangamuyo sa Ngalan ni Ginoong Jesus Cristo nga itugot Mo ang iyang hangyo.

Amahan, alang sa iyang inahan, ginadihogan usab namo ug ginapandongan siya og mga kamot ug nagapangamuyo alang sa iyang kaayohan, sa Ngalan ni Ginoong Jesus Cristo, hinaut nga hingpit na siya nga mamaayo.

⁹²⁵ Amahan, ginadihogan namo kining bililhon nga gamay'ng mutya niini nga pamilya, ang gamay'ng pagpitik sa kasingkasing, sa Ngalan ni Ginoong Jesus, nga usa niadto ka adlaw gitugyan na nganha Kaniya, ug nagaampo ako nga Imong ayohon kini . . . ? . . .

⁹²⁶ Oh Dios, nasayod Ka man sa hangyo sa among igsoong babaye ug nagapasalamat kami Kanimo tungod sa iyang maisogon nga pagtoo. Karon, hinaut nga ang mga butang nga iyang gihangyo, nga . . . ? . . . gidulaan niya niadtong gamay pa siya, ug Dios, hinaut nga buhian na sa kaaway ang maong babaye ug hinaut nga mopauli siya nga maayo na, Ginoo. Nagaampo kami alang nianang tawhana, usab, nga iyang gihangyo nga maiampo, nagsaad Ka man, "Kung mangayo kamo og bisan unsa pinaagi sa Akong Ngalan, pagabuhaton Ko kini." Ginaampo ko nga itugot Mo kini nga hangyo, sa Ngalan ni Jesus. Amen. Panalanginan ka sa Dios.

⁹²⁷ Ginoo, ingon nga nagakamatay na kining ugat sa agtang sa among igsoong lalaki, nagapangamuyo kami alang sa kinabuhi nga mogitib niini, samtang ginapandongan namo siya og mga

kamot ug ginapangamuyo kini, sa Ngalan ni Jesus, nga ang maong ugat mamaayo gayud.

Amahan nga Dios, ginapandongan namo og mga kamot ang among igsoong babaye human nga gidihogan siya og lana, sa Ngalan ni Ginoong Jesus Cristo, nagapangamuyo kami alang sa iyang kaayohan. Amen.

⁹²⁸ Langitnong Amahan, ingon nga nagabarug ang among igsoong babaye sa daghan kaayo nga mga kalampusan nga Imong gihatag, nagabarug pud siya para sa usa sa Imong alagad, usa ka ministro, nga ginerbiyos og ayo; ang among kasingkasing aduna gyu'y kalooy para kaniya ingon nga hingsayran namo kung unsa ang iyang giagian. Ginaampo ko, Dios, nga dihogan Mo ang among igsoong babaye nga nagatindog dinhi para sa maong lalaki ug dihogi pud siya alang sa iyang kaayohan. Nagaampo ako, sa Ngalan ni Cristo. Amen...?... Nasayod ang Ginoo...?...

⁹²⁹ Maayo. Nalipay kaayo ako. Kana'y pagdihog gayud nga iya sa Ginoo. Ginoong Dios, human nga nahilwas na kining babaye gikan sa yawa nga iyang gipakig-awayan sulod sa daghan nang mga katuigan, usa ka adlaw Imo siyang gipaadto didto sa maong balay ug dayon mikunsad ang Espiritu, "MAO KINI ANG GINAINGON SA GINOO," human nga mituaw siya, mihigda siya sa may altar, gibuhat na niya ang tanan nga nahibaloan niya nga buhaton, apan gikinahanglan gyud ang MAO KINI ANG GINAINGON SA GINOO. Karon, nagaduol siya para sa nagasuka nga anak sa iyang igsoong babaye; dili na makalakaw, nga lagpas usa na ka tuig ang panuigon. Ginaampo ko, Ginoo, nga itugot Mo ang mga panalangin sa Dios para kaniya sa Ngalan ni Jesus Cristo. Nalipay gyud ako tungod niana, igsoon, nga nalahi na ang hitsura, usab. Ug halayo ka na sa kamatayon karon, dili ba?

Amahan nga Dios, ginaampo namo nga panalanginan Mo ang among igsoong babaye samtang ginadihogan namo siya ug ginapandongan siya og mga kamot ug ginapangamuyo kining butang nga Imong giingon: "Kini nga mga ilhanan maganunot kanila nga nagatoo. Pagapandongan nila sa ilang mga kamot ang mga masakiton, mangaayo sila." Ginapamahayag namo nga mga magtotoo kami, Ginoo, busa nagaampo kami nga aduna Ka'y buhaton, sa Ngalan ni Jesus...?...

⁹³⁰ Amahan nga Dios, ingon nga hingsayran ko ang kasingkasing niining luoy'ng babaye, tungod nagpahayag man siya, ginaampo namo nga kaloy-an Mo siya ug itugot ang hangyo nga iyang gipangayo. Oh Amahan nga Dios, alang sa iyang pamilya, alang sa iyang mga anak, ilabina, sa iyang batang lalaki, Dios, ginaampo ko karon, nga itugot Mo kining mga butanga...?...sa tibuok kong kasingkasing, ginapangamuyo ko kini, sa Ngalan ni Jesus. Amen.

Amahan nga Dios, samtang ginadihogan namo og lana kining babaye, ug ginaampo siya sa Ngalan ni Ginoong Jesus, nga ayohon Mo unta siya ug himoon siya nga mamaayo na alang sa kahimayaan sa Dios.

⁹³¹ West ang imong ngalan, di ba?

Amahan, nagaampo kami para sa luoy'ng babaye. Nagapangamuyo siya para sa iyang amahan. Karon, ginaampo ko nga tugyanan Mo ang iyang amahan, og pagtawag diha sa iyang kasingkasing, Ginoo. Ginatunguha gyud niya nga maluwas ang iyang amahan. Ayaw niya nga maanaa kini sa kalibutan sama niining, batang lalaki, nga kaugalingon niyang anak, iyang kaliwat. Ginaampo ko, Amahan, nga kaloy-an Mo unta siya, sa Ngalan ni Cristo.

⁹³² Panalanginan ka, anak ko, hinaut nga ihatag sa Dios kanimo ang butang nga imong gipangayo.

Minahal nga Dios, nagaampo kami alang sa kalooy para kaniya, ug ginapangamuyo namo nga malooy Ka gayud, samtang ginadihogan namo siya . . . ? . . .



MGA PANGUTANA UG MGA TUBAG
MGA HEBREOHANON BAHIN III CEB57-1006
(Questions and Answers on Hebrews Part III)

SERYE MAHITUNGOD SA PAMATASAN, KAHAN-AYAN UG DOKTRINA SA IGLESIA

Kining Mensahe ni Igsoong William Marrion Branham, una giwali sa Ingles niadtong Dominggo sa gabii, Oktubre 6, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org